

賢首五教儀

清浙水慈雲沙門灌頂續法集錄



清刻龍藏佛說法變相圖

引

殆一

天台賢首隨宜示法說天台賢首法者不自
知也後人起念便隔作兩截重天台失天台
重賢首失賢首矣執相泥名分河立幟此末
法大弊通人宜無所揀擇軒輊於其間也賢
首宗闕五教儀百亭法師為補綴成之以毒
攻毒以楔出楔且憑楮墨施平等莫向耆端
安是非殆不獨為賢首宗之功臣矣東南義
虎畧見一斑為兩宗左右袒者即勿寓目焉
可也

康熙庚申立秋日順天府府丞錢唐戴京曾
題

賢首五教儀序

華嚴稱根本法輪不唯爲開漸之本亦且爲攝末之本竺乾震旦咸最尊尚諸佛歷祖遞代師承自龍樹依之判二種般若天親依之闡六相圓融杜順依之而演三觀雲華依之而開十玄至賢首大師則依此而立宗判教離台家之四以爲五復得清涼憲章啟十門而會性相二教圭峯祖述叙五義而揀空性兩宗此皆神明天縱博瞻旁通故能各騁辯才弘敷妙趣或造論或釋經法界宗旨燦然明備而一大時教已罄無遺蘊矣厥後繼圭峯而起者雖代有哲人然而兼綜條貫洵蔑以加莫能更讚一詞乃昧者不察讀一不讀一廢目而任耳伐異以黨同或譏其伏斷肯無或指爲教觀兩失在台衡從上諸師或慮

兩家未裔濫以賢首之旨混入己宗故弗惜哢哢而貶駁過當何意曾玄輩遂拾牙瀆逞狂矜妄肆詆訶橫起攻擊不至飲水分河不止噫嘻復知固有大謬不然者哉先師寶輪大師博極諸宗尤於華嚴宿有緣契精研深入心領神會嘗痛賢首未墜之緒僅爾如綫誓願振興絕業以繼往開來闡法後力弘此宗五教十玄蓋無時無處不高提圓唱也著五教解謂論論賢首宗未知圓義解二篇大旨謂賢首大師之離四以爲五非悖天台實殆一備天台之所未備清涼紹隆之即天台以清涼大師爲大元勲亦匪爲過中間晰兩家之殊途若鏡懸會兩家之同歸若璧合且分銖不爽纖累無偏則又若衡平向使悻悻者見此應無從置喙矣先師謂天台當以清涼大

師爲大元勲立亦謂先師實天台元勲不徒

稱清涼嫡裔也立侍師有年徒以脫白也晚

塵封智錫致望海驚心入山空手而慈雲百

兄法師抱穎悟絕倫之姿親承提命往還咨

決遂得髓於言下然深藏若良賈年來杜門

元一

三

却掃單與淨滿晨夕娛遊禪觀之餘則檢是

宗教部及諸祖著述研磨對會博觀約取先

則支分條列而派析之後則徹委窮源而滙

聚之錄成一書首分時次叙儀次立教又次

判宗終以明觀時則有先後通別儀有本末

顯密教有始終頓圓宗有小大性相觀則有

方便有因緣有對法有觀門有六相有十玄

言簡義詳理融旨顯信解行證了然眉列讀

此而猶謂之有教無觀得乎猶謂之伏斷修

證俱無指示得乎今而後法界宗旨將不終

屈抑也已然則是書也法師固不負爲先師

嫡子溯而上之將爲圭峯爲清涼爲賢首以

至龍樹諸大師之大元勲抑併無歉於天台

彼悻悻尋賢首隙者益無容置喙而平心以

觀可矣乃命名曰賢首五教儀法師自謂竊

比於高麗師稟玄義而錄出四教儀云爾夫

誰曰不然茲將授梓屬立弁端立甚喜華嚴

根本法輪儼揭天日也遂合掌讚歎不顧鄙

陋而爲之辭如此

梅塢興福教院法弟真立和南撰

序

孔子不可無思孟子老子不可無莊周釋尊不可無慶喜爲道之須傳也南嶽不可無智者戒賢不可無玄奘達摩不可無慧可爲教之須人也又智者不可無章安玄奘不可無慈恩慧可不可無僧璨爲其授受有源而不竭奕葉相承而無盡也迨於賢首大師何獨不然以言乎師則有杜順雲華開其先以言乎資則有清涼圭峯紹其後其立教也有始有終有頓有圓斷則斷其厚薄證則正其淺深位則品其高下行則定其遠近顯法相若然燭之朗明揀機益比析薪之分割其判宗也有小有大有性有相相則妄相爲相空則真空亦空頓則無所不絕似影離於天日圓則無所不融如像舍於海空其分時也有先有

殆一

後有別有通非先無以知其爲開漸之頓非後無以知其爲攝末之本非別無以見說法之次第非通無以見教理之圓融其叙儀也有本有末有顯有密非本無以了一乘之頓實非末無以識三乘之權漸非顯無以決擇其一定非密無以測度其不定其明觀也有方便有因緣有對法有觀門有六相有十玄非方便無以辯修證非因緣無以明德用非對法無以解無盡非觀門無以入法界非六相無以顯圓通非十玄無以彰無礙何者凡

殆一

五

夫見色爲實色見空爲斷空故開真空絕相門使之觀色非實色舉體是真空觀空非斷空舉體是幻色如是於理則見矣於事猶未也復開理事無礙門使觀不可分之理皆圓攝於一塵本分限之事亦通過於法界如是

以理望事則可矣以事望事猶未也又開周
遍合容門使觀全事之理隨事而一一可見
全理之事隨理而一一可融然後一多無礙
大小相舍則隱顯施爲神用不測矣教觀既
周時儀已備則判釋諸佛說法儀式至矣盡
矣無復加矣以此自修無法不通以此教他
無機不被是以三帝歸崇兩朝悅服李長者
論讚於前崔學士傳美於後至於海內海外
莫不揚其化天上下靡不仰其徽質諸千
古以上之聖賢而無訛俟諸百世以下之俊
傑而不惑遂令法門隆盛代有哲人長水流
布於東吳蒼山崛起於西蜀雲棲敷演於南
海交光發明於北嶺猗歟休哉奈何今義學
家不得其門而入見其教部廣大意旨幽深
即如賢首大師著述凡有一百餘卷清涼國

師現流傳者約有四百餘卷圭峯大師疏註
總有九十餘卷浮狂者詆爲葛藤愚鈍者視
爲砂石誰復能探其微窺其奧哉幸我乳峯
得水大師自弘法以來朝夕提撕時爲演唱
特未布諸方策普令一切見聞耳續法雖忝
輪下性極顛蒙晝夜叅隨日漸薰熟竊謂此
皆賢家所傳心法若不傳於後葉在已則有
悞法之愆在他安得正眼之益爰將先師常
所樂說者錄之復尋諸大部中所切要者集
之十餘年間考閱再三窮思至四始成六卷
名之曰五教儀庶得華嚴宗旨彌播於塵寰
法界心印重光於昔日燈燈相續化化無窮
矣謹述願未冀見此衷至於知我罪我所不
暇計焉

時


康熙十四年歲次乙卯秋仲望日
古杭慈雲灌頂行者續法題

給一

六


賢首時儀教觀圖

如來無造^①法界智輪



法界觀境普

◎現前一心
知見心得◎



融無盡圖



賢首大師判釋如來一代時教不出右圖
三觀初祖杜順集成五教二祖雲華草創
儀等四祖清涼添足宗等五祖圭峰加揀
今圖標三祖賢首一師者蓋教觀由三祖
而圓備宗儀由三祖而建興述作功德推
尊獨在故不舉餘祖耳後之學法者務知
開宗立教之主餘祖自該顯矣

雲山灌頂行者續法識

賢首五教儀卷第一之一

清浙水慈雲沙門灌頂續法集錄

○總釋此儀分二
初總標章門

賢首大師判釋如來一代時教不出三時十

儀五教六宗三觀

○次別釋法義五初
三時二先總標

言三時者有別有通

○二別釋二先別
三時三初畧標

別三時者一日出先照時二日昇轉照時三

日沒還照時華嚴云或日初分時入或日中

分時入或日後分時入法華謂初善中善後

善是也

○二詳釋三一先照時二初通明時
教二先引華嚴證釋二一能依時

二先
勝舉

第一日出先照時者

○次證

△華嚴經云譬

如日出先照須彌山等諸大高山如來應正

等覺亦復如是成就無邊法界智輪常放無

礙智慧光明先照菩薩摩訶薩等諸大山王

卷一

○二所說教△若約所說教相者○二引證

因二初標起△經云爾時世尊於菩提

樹下初成正覺時○二明所見機△普見一

切衆生皆成正覺乃至普見一切衆生皆般

涅槃○二具△普見一切衆生貪瞋癡慢諸

煩惱中有如來身智常無染汙德相備足○

緣悟△無一衆生而不具有如來智慧但

以妄想執着而不證得我欲教以聖道令其

永離妄想於自身中得見如來廣大智慧如

我無異○二正△即於三七日中遂為此等

衆生於菩提揚稱於大方廣法界敷演萬行

因華以嚴本性令成萬德佛果○三教益一

△其有往劫與我同種善根曾得我於劫海

之中以四攝法而攝受者○二叙今益二先

△始見我身聞我所說即皆信受入如來慧

○後復引△乃至逝多林內我入師子頻申

三昧大衆皆證無盡法界○三結△此一時

中爲圓頓大根衆生轉無上根本法輪名爲

直顯教令彼同教一乘人等轉同成別所謂

初善或日初分時入也○次引法△故法華

方便偈云我始坐道場時即自思惟若但讚

佛乘衆生沒在苦不能信是法破法不信故

信解偈云爾時長者處師子座眷屬圍繞諸

人侍衛出內財產注記券疏窮子見父馳走

而去即勅使者追捉將來窮子驚喚迷悶躡

地○二別指△其所說經即華嚴梵網等也

○二轉照時二先總二初引華嚴

第二日昇轉照時者中有二義先總後別○

次證△先總明者華嚴經云但以山地有高

下故照有先後如來智輪亦復如是隨諸衆

生根欲不同智慧光明種種有異楞伽亦云

日出光等照下中上衆生如來照世間爲分

部諸法○次所說教△若約所說教相者○

二引證三先△經云除先修習學小乘者着

相憍慢不信法者及溺貪愛水着於五欲者

深入諸邪見生死險道者如是等衆生諸根

悉暗鈍着樂癡所盲云何而可度○次以大

△我於三七日思惟如是事若我遇衆生盡

教以佛道彼即沒苦海毀謗不信故疾入於

惡道若以小乘化乃至於一人我則墮慳貪

此事爲不可進退難爲遂○後微諸△尋念

過去佛所行方便力始知過去佛皆以三乘

引然後令悟入究竟一佛乘故我所得道亦

應說三乘作是思惟時十方佛皆現梵音慰

喻我善哉釋迦文第一之導師得是無上法

隨一切諸佛而用方便力我聞慰喻音隨順諸佛意始往波羅奈轉四諦法輪讚示涅槃法度陳如五人漸漸諸處乃至千萬亦爲求緣覺者說十二因緣亦爲求大乘者說六波羅蜜中間爲說方廣般若諸甚深法淘汰如上聲聞緣覺引進權乘諸小菩薩○三結△此一時中爲下中上三類衆生轉依本起末法輪名爲方便教令彼三類人等轉三成一所謂中善或日中分時入也○次引法華經證△故法華方便偈云復作如是念我出濁惡世如諸佛所說我亦隨順行以方便力故爲五比丘說爲諸衆生類分別說三乘雖復說三乘但爲教菩薩○後別二初標列後別明者於日中分照有三轉謂初轉時中轉時後轉時也○二廣釋三先初轉時

始一

十一

初轉時者華嚴云次照黑山如來智輪次照聲聞緣覺謂佛初於鹿苑爲鈍根下類衆生轉小乘法輪說一切諸法皆因緣生以破外道自然性等又說緣生無我翻彼外道實有我執此一轉時唯就境明實有依他然猶未說大乘法空真如妙理由是名之爲隱實教令彼凡夫外道轉凡成聖也故法華云長者知子愚癡狹劣即以方便更遣餘人眇目矬陋無威德者汝可語之云當相顧除諸糞穢倍與汝價窮子聞之歡喜隨來爲除糞穢淨諸房舍其所說經即提胃阿舍等也○次中轉時中轉時者華嚴云次照高原如來智輪次照決定善根衆生隨其心器示廣大智謂佛次於中時爲中根一類衆生轉三乘法輪說一切諸法皆唯識現以破小乘心外有法從因

緣生又說緣生假有翻彼小乘實有法執此一轉時始約心說盡空遍計然猶未說一乘真空法性妙理由是名之爲引攝教令彼二乘人等轉小成大也故法華云長者有智漸令入出經二十年執作家事其所說經即方

廣深密等也○

三後轉時

後轉時者華嚴云然後普照一切大地如來智輪然後普照一切衆生乃至邪定亦皆普及爲作未來利益因緣令成熟故謂佛又於後時爲利根上類衆生傳一乘法輪說一切諸法本如來藏妙真如性以破權乘不了心境俱空無性又說緣生即空翻彼權乘二無我執此一轉時直據性顯中歸圓成然猶未說一乘佛性生佛平等究竟真常實相妙理由是名之爲融通教令彼三乘人等轉權成

實也故法華云爾時長者自知不久示其金銀真珠玻瓈諸物出入皆使令知其所說經即般若妙智等也○三還照時二先通明時教二初引華嚴等證釋依時

第三日沒還照時者此乃義取出現經意說云如日沒時還照高山如來智輪最後還照菩薩摩訶薩等諸大山王十定品云譬如日天子周行照曜晝夜不住日出名晝日沒名夜菩薩亦復如是法界品云譬如日輪無有晝夜但出時名晝沒時名夜菩薩智輪亦復殆一

如是無有分別但隨心現教化衆生○二所說教

三一△若約所說教相者○二引證△經云過

四十餘年漸漸見其根熟即中下機成上上品如是之人我今亦令得聞是經入於佛慧遂於靈鷲山中告大衆云世尊法久後要當

說真實汝等應當一心信解無有餘乘唯一
佛乘開示悟入佛之知見普皆與授阿耨多
羅三藐三菩提記顯示三五乘性衆生法身
平等入一乘道乃至臨欲滅度之時在於拘
尸那城娑羅雙樹間作大師子吼顯常住法
決定說言一切衆生皆有佛性凡是有心定
當作佛究竟涅槃常樂我淨皆令安住秘密
藏中即與華嚴海會師子頻申大衆頓證無
有別異。○三結 △此一時中爲上上根衆生
轉攝末歸本法輪名爲開會教令彼偏教五
乘人等轉偏成圓所謂後善或日後分時入
也。○次引法華經證釋 △故法華方便偈云我見佛
子等志求佛道者我即作是念如來所以出
爲說佛慧故今正是其時正直捨方便但說
無上道教化諸菩薩無聲聞弟子信解偈云

父知子心漸已曠大即聚親族說是我子凡
我所有舍宅人民悉以付之恣其所用子念
昔貧今於父所大獲珍寶甚大歡喜。○後別指經
部 △其所說經即法華涅槃等也。○三通妨
義出入二初
畧明三時

問準上判釋則三時名義非憑一經論耶答
取衆經論理究竟故。○二廣辨還照 △問經

中無有還照之語今者何爲而開判耶。○次答

釋二初別以二義明其判釋三初總標 △答開有二義。○二別釋三

一取經意蓋日初出先照高山日若

垂沒亦應還照諸山王故如彼天台亦開平

地爲三以成五。食時馬中正午三也加幽 取

幽谷爲二而合四。晉華嚴云譬如日出先照

次照金剛寶山然後普照一切大地四也而

云爲二合四者如妙玄云猶如日出先照高

山次照幽谷後照平地 故疏鈔云我佛本爲

一事出現於世四十餘年未顯真實今分一代時教豈妨判有前後分析權實空有取捨偏圓漸頓方知佛法微妙深玄譬猶不泛大海豈識邊涯不諳木石安知真寶故智論釋法施云依隨經論廣作義理爲立名字皆名

法施

○二約教理

△二約教理華嚴依本起末故

有潛流而無後照法華涅槃攝末歸本故有會流而無先照今雙取之本末無礙先後圓足非本無以垂末故華嚴中影顯法華涅槃日出潛流義云譬如日出先照須彌山等諸大高山又如大海其水潛流四天下地及八十億諸小洲中非末無以歸本故涅槃法華中影顯華嚴日沒會流義云如閻浮提日入之時衆生不見以黑山障故而是日性實無沒入衆生不見生沒入想聲聞弟子亦復如

始一

十四

是爲諸煩惱山所障故不見我身以不見故便於如來生滅度想而我實不畢竟永滅又如日天子能除諸暗此經亦復如是能破一切不善之暗譬如四河出阿耨達池若有天人諸佛說言是河不入大海當還本源無有是處菩提之心亦復如有佛性者若聞不聞若修不修悉皆應得阿耨菩提又如一切川流江河諸水之中海爲第一此經亦復如是於諸經中最爲深大若不爾者則日唯有出無沒入故普照地後諸大高山不得還照益故過中照已應如昏暮世間皆暗冥故何以經云今復轉最妙無上大法輪亦還令汝得聞是經入於佛慧又百川中無海潛流從何本源出故穿鑿求者終不能得益故江河乾時後應無水入中流故何以經云於一佛

卷二

十五

乘分別說三譬如從牛出乳從乳出酪○

結三

示△故知不可偏執一文一義而自疑難也

○次通以六句揀其具關二先總標△但經論中或有名無

義或有義無名或名義俱全或名義皆闕今

於前三句中復開六句而料揀之一少分名

二全分名三少分義四全分義五少分名義

六全分名義○次別釋六一分名△少分名者如華

嚴十定品云日出名晝日沒名夜涅槃初卷

云聖慧日明從今永滅無上法船於斯沉沒

後分云慧日滅沒大涅槃山一切衆生喪真

慈父四分律云喻如日沒時世界皆暗暝△

全分名者如本起經云菩薩處胎時晨朝爲

色界諸天說法日中欲界日晡鬼神華嚴十

定品云或日初分或日中分或日後分般若

云初日分以身布施中日分後日分亦以恒

沙等身布施△少分義者如華嚴五十世界

初成喻云譬如三千世界初始成時先色天

次欲天次人處及餘衆生如來出現先化菩

薩次化二乘後及餘諸衆生五十一法界出

生喻云譬如法界常出一切聲聞獨覺菩薩

解脫而法界無增減如來智慧恒出一切世

出世間種種智慧而如來智無增減皆明先

頓後漸義也四十七云或時爲說差別三乘

或時爲說圓滿一乘普皆濟度令出生死此

明先漸後頓義也五十四輪依起喻云譬如

樹林依地輪地依水輪水依風輪風依空輪

空無所依一切佛法依慈悲慈悲復依方便

方便依四大智智依無礙慧慧無所依五十

一四寶出生喻云譬如大海有四寶珠具無

量德能生海內一切珍寶如來大智慧海於

中有四大智寶珠具足無量福智功德由此能生一切衆生聲聞獨覺學無學位及諸菩薩智慧之寶此皆依本起末義也五十二文字攝入喻云譬如書字普入一切事一切語一切算數一切世間出世間處而無所住如

卷一

十六

來音聲普入一切處一切衆生一切法一切業一切報中而無所住一切衆生種種語言皆悉不離如來法輪何以故言音實相即法輪故諸河入海喻云一切智慧無量無邊不可思議佛子此閻浮提有二千五百河流入大海西拘耶尼有五千河流入大海東弗婆提有七千五百河流入大海北鬱單越有一萬河流入大海佛子此四天下如是二萬五千河相續不絕流入大海此皆攝末歸本義也法華藥草喻品末云因緣開示是我方便

卷一

十七

今爲汝等說最實事是先權後實也化城喻中東方諸梵請云唯願度脫開涅槃道東南諸梵請云唯願轉法輪顯示諸法相南方諸梵請云願轉無上法輪上方諸梵請云願示大涅槃道是先半後滿也智勝威音之說先三後一也鑿井譬珠之譬先小後大也乃至王膳顯實也良醫開權也涅槃三云譬如阿耨達池出四大河如來亦爾出一切命起末也八云譬如衆流皆歸於海一切契經皆歸大乘大涅槃經歸本也五云譬如長者唯有

一子以愛念故晝夜殷勤教其半字而不教誨毘伽羅論何以故以其幼稚力未堪故子既長大堪任讀學時彼長者教半字已次爲演說毘伽羅論如來亦爾以諸聲聞無有慧力是故如來爲說半字九部經典而不爲說

毘伽羅論方等大乘若諸聲聞有堪任力我亦爾時爲諸弟子說於半字九部經已次爲演說毘伽羅論大乘經典所謂如來常存不變先半後滿也七云譬如女人生育一子嬰孩得病是女愁惱求覓醫師醫師既來合三種藥酥乳石蜜與之令服因告女人且莫與乳須藥消已爾乃與之是時女人即以苦物用塗其乳藥至消已母人以水淨洗其乳喚其子言來與汝乳是兒聞已漸漸還飲如來亦爾爲度一切教諸衆生修無我法爲修空故說言諸法悉無有我如是修空永斷我心入涅槃已我於爾時說如來藏是故比丘不應生怖應自分別如來祕藏不得不有先權後實也○四全△全分義者華嚴五十一龍王降雨喻云譬如阿那婆達多龍王與大密

雲徧閭浮提普霑甘雨百穀苗稼皆得生長江河泉池一切盈滿如來亦爾興大悲雲遍十方界普雨無上甘露法雨令一切衆生皆生歡喜增長善法滿足諸乘又如摩那斯龍王將欲降雨先起大雲彌覆虛空凝停七日待諸衆生作務究竟過七日已降微細雨普潤大地如來亦爾將降法雨先興法雲成熟衆生爲欲令其心無驚怖待其熟已然後普降甘露法雨演說甚深微妙善法漸令滿足一切智智無上法味婆達降雨華嚴也摩那興雲轉照三教漸成熟也後降法雨法華涅槃也又海寶飲縮喻云譬如大海有四熾然光明大寶布在其底性極猛熱常能飲縮百川所注無量大水一日藏大寶光明照觸海水悉變爲乳二離潤大寶光明照觸其乳悉

變爲酪三火燄光大寶光明照觸其酪悉變
爲酥四盡無餘大寶光明照觸其酥變成醍
醐如火熾然悉盡無餘佛子若大海中無此
四寶從四天下乃至有頂其中所有悉被漂
溺如來大智慧海有四種大智慧寶具足無

卷二

十九

量威德光明此智寶光觸諸菩薩乃至令得
如來大智佛子諸菩薩修集一切助道法時
起無量散善波浪一切世間天人阿修羅所
不能壞如來以滅一切散善波浪大智慧寶
光明觸彼菩薩令捨一切散善波浪持心一
境住於三昧又以除一切法愛大智慧寶光
明觸彼菩薩令捨離三昧味着起廣大神通
又以慧光普照大智慧寶光明觸彼菩薩令
捨所起廣大神通住大明功用行又以與如
來平等無邊無功用大智慧寶光明觸彼菩

薩令捨所起大明功用行乃至得如來平等
地息一切功用令無有餘佛子若無如來此
四智寶大光照觸乃至有一菩薩得如來地
無有是處大智慧海華嚴也有四智寶根本
輪中具後二時經教法也飲縮百川大水乾
枯百界中性修貪愛水也日藏照觸海水變
爲乳者阿含教滅凡外戒善人天善禪及餘
三途一切愛水而轉成我空也離潤照乳變
爲酪者深密教滅一切二乘偏真三昧法愛
而入法空起諸神通化生嚴土也火燄照酪
悉爲酥者妙智教滅一切三乘着相修行執
着二空種種法愛而成俱空起大明行入於
實相般若也無餘照酥成醍醐者法華涅槃
教滅一切權乘有修有證有佛有生種種法
愛而得圓滿菩提歸無所得生佛平等唯一

乘性入於第一義諦法界空也法華火宅喻中若我但以智慧神力捨於方便爲諸衆生讚如來知見力無所畏者衆生不能以是得度如彼長者雖復身手有力而不用之華嚴教也但以智慧方便於三界火宅拔濟衆生

爲說三乘聲聞辟支佛佛乘如來以是方便誘進衆生如彼長者爲說羊車鹿車牛車諸子即時爭出火宅轉照中三教也如來若見無量衆生以佛教門出三界苦便作是念是諸衆生皆是我子等與大乘不令有人獨得滅度皆以如來滅度而滅度之如彼長者見諸子等安隱得出火宅自惟財富無量等以大車而賜諸子即法華也信解品窮子喻涌出品初後入佛慧方便品始坐道場但讚佛乘無二無三趣波羅奈於一佛乘分別說三

第一

三

見求佛者爲說佛慧無有餘乘唯一佛乘皆是三照義也又受記品繫珠喻中以無價寶珠繫其衣裏華嚴教也遊行求索得少便足轉照中教也指示其珠貿易如意法華教也化城喻中十六王子請大聞大覆說大經一

一所化六百萬億那由它恒河沙等衆生即說華嚴佛慧也於今有住聲聞地者應以是法漸入佛道所以者何如來智慧難信難解阿含方廣般若教也如來自知涅槃時到衆又清淨便集諸菩薩及聲聞衆爲說是經世間無有二乘而得滅度唯一佛乘得滅度耳法華涅槃教也譬喻品中佛告舍利弗言我昔教汝志願佛道先照也汝今悉忘而便自謂已得滅度轉照也還令汝念本行道故說大乘經還照也涅槃八中一藥流味喻云譬

第二

三

如雪山有一味藥名曰樂味其味極甜過去世中有轉輪王造作木桶以接其藥是藥熟時從地流出集木桶中其味真正王既沒已其後是藥或醋或鹹或甜或苦或辛或淡如是一味隨其流處有種種異是藥真味停留在山猶如滿月凡夫薄福雖以掘鑿加功苦至而不能得復有聖王出現於世以福因緣即得是藥真正之味輪王造桶接藥華嚴會也王沒之後隨流成異方便教也聖王復出即得真味法華涅槃會也九云譬如大船從海此岸至於彼岸復從彼岸還至此岸如來正覺乘大涅槃大乘寶船周旋往反濟度衆生在在處處有應度者悉令得見如來之身從海此岸先照也彼岸轉照也還至此岸還照也又云如菴羅樹及閻浮樹一年三變有

時生華光色敷榮有時生葉滋茂蓊鬱有時凋落狀似枯死如來亦爾於三界中示三種身有時初生有時長大有時涅槃而如來身實非無常初時生華頤也中時長葉漸也後時凋枯圓也十四中五味喻云譬如從牛出乳從乳出酪從酪出生酥從生酥出熟酥從熟酥出醍醐佛亦如是從佛出於十二部經從十二部經出修多羅從修多羅出方等經從方等經出般若波羅蜜從般若波羅蜜出大涅槃猶如醍醐從牛出乳最初華嚴也酪生熟酥轉照中阿含法相無相也涅槃醍醐還照法華涅槃也○五分△少分名義者華嚴五十云譬如日出於閻浮提無量衆生皆得饒益所謂破暗作明變濕令燥生長草木成就穀稼廓徹虛空開敷蓮華行者見道居

者辦業何以故日輪普放無量光故如來智
日以無量事普益眾生所謂滅惡生善破愚
為智大慈救護大悲度脫令其增長根力覺
分令生深信捨離濁心令得見聞不壞因果
令得天眼見沒生處令心無礙不壞善根令

卷一

主

智修明開敷覺華令其發心成就本行何以
故如來廣大智慧日身放無量光普照耀故
此唯先照名義也五十九云菩薩正法日出
現於世間戒品圓滿輪神足速疾行照以智
慧光長諸根力藥滅除煩惱暗消竭愛慾海
乃至五十中先照山王次照黑山高原後照
大地法喻皆明先照轉照名義也六十云譬
如空中日運行無暫已如來亦如是神變恒
相續此唯轉照名義也五十二云如日舒光
照法界器壞水漏影隨滅最勝智日亦如是

卷一

三三

眾生無信見涅槃此唯還照名義也涅槃十
九云佛日將沒大涅槃山大王佛若去世王
之重惡更無治者亦唯還照一也

賢首五教儀卷第一之一

音釋

須彌唐言妙高菩薩摩訶薩菩薩此云覺
此云大道此云戰勝覺道此云入汗音
心衆生此云戰勝券音勤契躋音碧雨
也近多此云太子名波羅奈此云江繞城
不能楞伽此云不可波羅奈此云江繞城
行首楞伽此云不可波羅奈此云江繞城
范波羅蜜此云到般若華言智慧淘汰音陶太
沙泥此云水比丘翻乞眇音藐一矧音短也
清沐此云無玻梨水玉阿耨多羅三藐三
阿舍此云法拘尸那此云角城城具三
菩提華言無上拘尸那此云角城城具三
住仙娑羅此云堅固冬夏不改故音魚
人故娑羅此云堅固冬夏不改故音魚

已曰析音息分諳音暗練歷也又阿耨達
焉中音割也亦云阿那婆達多此識悉曉記憶也閻浮提此
云無熱惱池名也時也勝金此樹果汁流下河拘耶尼此云牛貨
中染石成金最勝故又鬱單越此
故弗婆提此云勝勝南洲故又
勝處或翻勝生於四洲中膳餽
有情處貨皆勝餘三洲故膳也

賢首五教儀卷第一之二

殆二

清浙水慈雲沙門灌頂續法集錄

○六全
名義

全分名義者華嚴五十云譬如日月隨時出現大山幽谷普照無私如來智慧普照一切

一

無有分別隨諸衆生根欲不同智慧光明種

種有異出現普照者月沒日出先照大山也

日沒月出還照大山也隨時普照轉照幽谷

也根欲不同五會所被機也光明有異三時

能被教也又云譬如日出生盲衆生雖未曾

見然爲日光之所饒益何以故因此得知晝

夜時節受用調適離衆患故如來智日亦復

如是毀戒毀見生盲衆生無信眼故不見諸

佛智慧日輪雖不見佛亦爲智日之所饒益

何以故以佛威力令彼衆生所有諸苦皆消

滅故晝夜時節者初日分中日分後日分也
受用三時飲食也以佛威力者因此如來智
慧日輪始得聞知初中後照時分所被一切
聲教而亦令彼離苦得樂也七十三云譬如
日輪出時名晝沒時名夜菩薩智輪亦復如
是教化衆生言其止住前劫後劫華嚴直顯
教中開發衆生宿世善根未種者令種即名
過去前劫如日初出名之爲晝也轉時行布
教中已種者令增長即名現在中劫如日昇
中名爲餉午也法華開會教中已增長者令
成熟念念令無量衆生於阿耨菩提得不退
轉即名當來後劫如日入沒名之爲夜也則
前後劫是約現在三世明矣四十六云一切
諸佛於一時中知一切時具淨善根入於正
位無所住着而能示現若晝若夜初中後時

乃至盡於未來際劫恒爲衆生轉妙法輪不斷不退無有休息示現晝夜初中後者別明如來一代教中三種時也盡未來者總結無盡化中三種時也涅槃二云譬如日初出光明甚暉燄既能還自照亦滅一切暗如來神通光能除我苦惱處在大衆中譬如須彌山今聞入涅槃佛日墜於地法水悉枯涸我等定當死如來般涅槃衆生極苦惱初出先照也日墜還照也轉照自攝二十四云世尊若因佛性發阿耨多羅三藐三菩提何故如來廣爲衆生說十二部經世尊如優陀延山日從中出至於正南日若念言我不至西還東方者無有是處佛性亦爾若不聞不戒不施不修不智不得阿耨菩提者無有是處佛讚善哉善男子世有二人一善問難二善能答

卷二

二

善問難者汝身是也善能答者謂如來也善男子因是善問即得轉於無上法輪若因佛性發菩提者華嚴也如日東出說十二部者方廣等也如日正南不聞不修悉皆應得菩提轉無上輪者涅槃也如日西沒九云譬如日出有三時異謂春夏冬冬日則短春日處中夏日極長如來亦爾於此三千大千世界爲短壽者及諸聲聞示現短壽譬如冬日爲諸菩薩示現中壽若至一劫若減一劫譬如春日唯佛觀佛其壽無量譬如夏日善男子如來所說方等大乘微密之教示現世間雨大法雨若有人能受持是典開示分別利益衆生當知是輩真是菩薩譬如盛夏天降甘雨若有聲聞緣覺之人聞佛如來微密之教譬如冬日多遇冷患菩薩之人若聞如是微

卷二

三

密教誨如來常住性無變易譬如春日萌芽
開敷而如來性實無長短爲世間故示現如
是即是諸佛真實法性此則以一年分爲三
時也短壽如冬變化土中化身壽也如今釋
迦八十唱滅即是化身緣促同促壽量之義
劫壽如春受用土中應身壽也如彼彌陀阿
僧祇劫即是應身緣長同長壽量之義無量
如夏法性土中法身壽也猶如虛空無始無
終即是法身常住不變無量壽義壽量既爾
說教亦然方等大乘即遮那在法界土說大
方廣華嚴教也如盛夏日常初照義如來密
教即釋迦在變化土說阿含等權乘教也如
寒冬日常中照義如是常住微密教誨即如
來在不毀淨土中說法華涅槃一乘教也如
春陽日常後照義五云如婆羅門所有語論

終不欲令利利毘舍首陀等聞何以故以此
論中有過惡故如來正法則不如是初中後
善是故不得名爲祕藏初善說頓也中善開
漸也後善顯實也機理並契故不覆藏三十
一云我於爾時告善星言我所說法初中後
善其語巧妙字義真正所說無雜具足成就
清淨梵行華嚴皆是稱性善巧之說故云巧
妙即名善語初善也阿含諦緣之法真實不
虛故云真正即名真語方廣以逐機性隨計
破著應不失時故云無雜即名時語般若權
實雙明諸法如義故云具足即名義語中善
也法華等賜一乘大白牛車涅槃純談佛性
醍醐甘露法味故云梵行即名法語後善也
乃至法華序品三善皆此三時之義餘可例
思△準如今家判釋統該一大藏矣

問既經論散說何不合爲一二開爲五六而必欲立三時耶答有五所以一釋尊說法用三時故如因果三說涅槃三教法華三入光明三輪深密三爲楞伽三照二衆經論中常明三故如梵網光明三請法華涅槃三善金

略二

剛三分華嚴三定智論三覓成論三年三諸佛化生多三會故如毘婆尸尸棄聲德彌勒佛等四世出世間恒重三故世如三世三際三分三周出世如三時三生三祇三益五折衷諸說三爲中故若盡理言之亦可合爲一

二開爲九十今則總相會通分爲十重一總名爲一音時以如來一代時教不離一音故如流支等二或分爲二此更有三初一本教時二末教時如教章二一頓教時二漸教時如護延諸德三一平道時二屈曲時如印敏

略二

五

等師上三說中皆前屬華嚴後屬鹿苑終於雙林一切經教三或分爲三此亦有二初一根本時二起末時三歸本時如吉藏法師次一圓說時二漸說時三頓說時如光統律師四或分爲四此亦有二初一頓教時亦名別教一乘時華嚴也二小教時亦名別教小乘時阿含也三權教時亦名同教三乘時深密妙智也四實教時亦名同教一乘時法華涅槃也則不違光宅雲師次一圓滿教時華嚴也二有相教時阿含也三無相教時般若也四常住教時涅槃也如虎邱岌公五或分爲五此復有四一初華嚴二阿含三般若四深密五法華涅槃則不違相宗二初華嚴二阿含三深密四妙智五法華涅槃則不違性宗三初稱性教二有相教三無相教四同歸教

五常住教如宋朝及師四初華嚴二阿含三方等四般若五法華涅槃如智者大師六或分爲六此亦有二一初圓頓教時二人天教時三有相教時四無相教時五同歸教時六常住教時如隱士劉公次一圓頓教時二有相教時三無相教時四抑揚教時五同歸教時六常住教時如道場慧觀等七或分爲七此亦有二一初華嚴二梵網三阿含四方廣五般若六法華七涅槃則不違海東曉師二初華嚴二阿含三大集四深密五妙智六法華七涅槃則不違波頗三藏八或分爲八一圓頓教時二人天教時三有相教時四無相教時五抑揚教時六同歸教時七常住教時八不定教時如南北諸師九或分爲九一華嚴二提冒三阿含四方廣五般若六深密七

妙智八法華九涅槃則不違真諦唐三藏等十或分爲十一華嚴二梵網三提冒四阿含五大集六淨名七深密八妙智九法華十涅槃則不違大衍護身耆闍師等然十重中一則太簡十則太繁繁則膠於名相簡則昧其源流是以今家遍收開合判立三時則與教理自不違也○三時儀同異

問釋尊時儀與一切諸佛爲同耶爲異耶答約教有同異就理則無異教異者衆生機有千差如來化儀萬別故依華嚴根本輪中或以音聲爲教或以香飯爲教或以光明而作佛事或以佛身而作佛事或現異相或復揚音或動睛或不瞬或憶念微笑或聲歎嘖呻就聲名教中或唯說三乘或唯說一乘或先大後小或先小後大或先一後三或先三後

一或先大中小後大或先一次三後一或顯密同時或頓漸齊演故華嚴云今見一切佛土所有衆事種種不同所謂說法調伏教儀法住各有差別教同者此土以聲名句文而爲教體十方諸佛土中亦有以音聲語言文

卷三

七

字而作佛事此土如來先圓頓次權漸後圓頓十方諸佛亦有以先一次三後一故法華云如三世諸佛說法之儀式我今亦如是說無分別法又云舍利弗當知諸佛法如是以萬億方便隨宜而說法理無異者諸佛出世唯欲衆生盡皆悟入一法界心故我世尊初成正覺即說華嚴其奈機有利鈍利者得入鈍者如盲故不獲已從一施三復說阿含深密妙智漸漸調伏至純熟已然後會三歸一說法華涅槃根最鈍者具歷五會於阿含成

小果益深密但得始益妙智得終頓益直至法華涅槃方得圓益又有根稍利者不必具歷五會或但經四番三番二番便得悟入一眞法界故法性論云中下鈍根菩薩三處入法界初則般若次則法華後則涅槃無量義經云次說摩訶般若華嚴海空宣說菩薩歷劫修行即是因般若入法界也法華云始見我身入如來慧今聞是經入於佛慧即是因法華入法界也像法決疑經云或見如來入涅槃或見如來住世一劫若無量劫或見報身蓮華藏世界海爲千百億釋迦牟尼佛說心地法門或見法身同於虛空無相無礙遍同法界即是因涅槃入法界也時會雖殊入理則一法華云十方三世一切諸佛皆以無量無數方便種種因緣譬喻言辭而爲衆生

演說諸法是法皆爲一佛乘故是諸衆生從佛聞法究竟皆得一切種智至於餘佛土中或見色聞香而入法界或覺觸知味而入法界如五十三知識解脫境界三十二菩薩不二法門二十五無學眞實圓通發覺雖不同

歸元實無異也若會融之不唯理無優劣教亦無別如有國土唯說一乘初時說大猶今先照也中時說大猶今轉照也後時說大猶今還照也或有國土唯說三乘宿必下種已聞大法猶今說頓也現在應以是法漸入猶今開權也當必熟脫還聞大法猶今顯實也或先大後小或先一後三一大華嚴也三小阿含等也後必說一大猶今法華談也或先小後大或先三後一三小阿含等也一大法華等也宿必說一大猶今華嚴談也或顯密

略二

八

同時但從其顯揀去其密或頓漸齊演但取其定捨其不定則亦有三時次第相也聲教既爾餘教亦然如衆香國但以衆香令諸天人得入律行菩薩各各坐香樹下聞斯妙香即獲一切德藏三昧得是三昧者菩薩所有

功德皆悉具足猶今說華嚴也若聲聞人未入正位食此飯者得入正位然後乃消已入正位食此飯者得心解脫然後乃消猶今說阿含也若未發大乘意食此飯者至發意乃消猶今說深密也已發意食此飯者得無生忍然後乃消猶今說妙智也已得無生忍食此飯者至一生補處然後乃消猶今說法華涅槃也香味如是餘法例知則十方無量百千萬億國土中諸佛世尊說法儀式無不同也故華嚴云佛刹與佛身衆會及說法但隨

聖

九

衆生心如是見有殊非一切如來大仙之過咎上且會通諸佛別三時相如此通相如下

○後通三時
三初總標

通三時者開有十重一唯約一念時二盡該一化時三遍周三際時四攝同類劫時五收

異類劫時六以念攝劫時七劫念重收時八異類界劫時九彼此攝入時十以本收末時

○次別釋十初
唯一念時

第一唯約一念時者謂於一剎那中即遍法界無盡之處頓說無量諸法門海華嚴云如來於一語言中演說無邊契經海淨名云佛以一音演說法衆生各各隨所解楞伽云如日月輪一時遍照一切色像諸佛如來淨諸衆生自心過習亦復如是頓爲示現不可思議諸佛如來智慧境界法華云如來說法常

以一味令諸世間普得具足如大雲起普遍世界一時等澍其澤普洽○二盡一化時
三初總明

第二盡該一化時者謂從我佛初成道時乃至如來般涅槃夜於此一代時化之中普遍

重重法界之處常說種種無盡經法○二別
釋五

初華嚴會
時通至後
△如華嚴教別但在初先照時分

通則至後華嚴前八會中永無聲聞至第九會方有聲聞爾時五百在祇園中已證聖果

驗知舍利弗等先已聞小乘教方預入法界會則華嚴說通於阿舍後矣楞伽頌云真如

空實際涅槃及法界種種意生身我說皆異名若不了無我依教不依義於諸經律論而起淨分別無量義云次說般若歷劫修行華嚴海空法華云我今亦令得聞是經入於佛慧像法決疑云今日坐中無央數衆各見不

同或見如來入涅槃或見如來住世一劫若減一劫若無量劫或見如來丈六之身或見小身或見大身或見報身蓮華藏世界海爲千百億釋迦牟尼佛說心地法門或見法身同於虛空無有分別無相無礙遍同法界或見此處山林土沙或見七寶或見此處乃是三世諸佛所行之處或見此處即是不可思議諸佛境界真實之法性論云鈍根菩薩三處入法界初則般若次則法華後則涅槃故知華嚴之說直爾通至涅槃後也○

二阿舍會

時通△若阿舍教別論在初轉時通論亦至初後如華嚴中明小乘戒善四諦因緣即四諦品明諦十藏品明戒六地明因緣則阿舍說通於前也四分遊行等說十二年後方制廣戒楞伽明聲聞乘差別相涅槃明迦留陀

治二

十一

夷入聚落被害作結戒緣起增一明身子五分法身不滅阿舍說如來涅槃有患脊痛等相遺教經云初度陳如後度須跋釋論云從初鹿苑至涅槃夜所說戒定慧結爲修妬路等藏是知阿舍亦通後也○

三方廣會時通初後

△若

方廣深密等教別論在中轉時通論亦至初後初者華嚴中明十地十如八識四智等楞伽頌云甚深大方廣知諸刹自在我爲佛子說非爲諸聲聞普曜經云第二七日提胃波利等五百賈人施佛妙寶佛與授記當得作佛號曰密成密跡力士經說佛初成道七日思惟已即於鹿園中以衆寶莊嚴法座廣集三乘衆梵王請佛爲轉法輪廣益三乘衆得大小果等六年內即說驚崛勝鬘等經後者方廣抑揚般若亦云二乘智慧猶如螢火苦

薩一日學智如日之照豈非抑揚法華云我此九部法隨順衆生說入大乘爲本以故說是經方等陀羅尼經云先於王城授聲聞記今於舍衛國復授聲聞記昔於波羅奈已授聲聞記身子云世尊不虛所言真實故能第

二第三授我等記光明經中分別三身三乘十地十度乃至人天因果法相涅槃云護大乘者受持九部受決經中佛授園監闍王記楞伽頌云象脇與大雲涅槃央掘摩及此楞伽經我皆制斷肉又云眞如空實際涅槃及法界種種意成身我說是心量則方廣談直通初後也○四般若會時通初後△若般若妙智等教別論在後轉時通論亦至初後何者如大智度論云從得道夜乃至涅槃常說般若華嚴須彌頂上偈讚品云法性本清淨如空無

有相一切無能說智者如是觀凡夫見諸法但隨於相轉不了法無相以是不見佛初利會爾夜摩兜率雲集菩薩偈讚義然大品經云佛在鹿野轉四諦法輪無量菩薩得無生法忍住初地二地乃至十地又云不見一法出法性外者法性即是法界智論云三藏中明法空爲大空摩訶衍中明十方空爲大空楞伽云此空無生無自性無二相悉入一切修多羅中佛所說經皆有是義法華云本聲聞人在虛空中說聲聞行今皆修行大乘空義究竟涅槃常寂滅相終歸於空十二金光明云無量餘經已廣說空是故此中畧而解說衆生根鈍於智慧不能廣知無量空義故此尊經畧而說之釋論云須菩提何故更問菩薩畢定不畢定答云須菩提於法華中聞諸

菩薩受記作佛今於般若中更問畢定不畢
定爲未入者故又會宗品舉十大經雲經大
雲經法華經般若最大大明品云諸餘善法
入般若中涅槃說佛性亦名般若故知般若
前至華嚴後至涅槃也○五法華涅槃通
至前二初法華△

若二

十三

若法華涅槃等教別論在後還照時分通則
至前華嚴問明品覺首等菩薩問文殊言云
何佛境界知文殊答云非識所能識亦非心
境界其性本清淨開示諸羣生圓覺彌勒問
云於諸輪迴有幾種性修佛菩提幾等差別
迴入塵勞當說幾種教化方便度諸衆生惟
願不捨救世大悲令諸修行一切菩薩及未
世衆生慧目肅清照曜心鏡圓悟如來無上
知見方等陀羅尼云昔於波羅奈授聲聞記
今於王舍城復授聲聞記楞伽云大慧白言

如來何故授阿羅漢阿耨多羅三藐三菩提
記如來答言我爲無餘涅槃界故密勸令彼
修菩薩行授嚴聞記楞嚴中如來責云如何
世間三有衆生及出世間聲聞緣覺以所知
心測度如來無上菩提用世語言入佛知見
阿難白言惟願如來示我在會諸蒙暗者捐
捨小乘畢獲如來無餘涅槃令有學者從何
攝伏疇昔攀緣得陀羅尼入佛知見須菩提
言蒙如來發性覺真空空性圓明得阿羅漢
頓入如來寶明空海同佛知見法華云始見
我身聞我所說即皆信受入如來慧於一佛
乘分別說三今見佛子求佛道者常爲汝等
讚一乘道又云雖示種種道其實爲佛乘又
身子云我昔從佛聞如是法見諸菩薩受記
作佛我等不預斯事甚自感傷失於如來無

量知見而今從佛聞所未聞未曾有法斷諸疑悔身意泰然快得安隱此則法華通至於前○次涅槃△釋論云從初發心常觀涅槃行道提胃說泥洹道阿含明涅槃相及二空等央掘勝鬘明佛性常住楞伽云若如來是作則是無常若是無常一切作法應是如來我及諸佛皆不忍可謂以現智證常法故證智是常如來亦常大慧諸佛如來所證法性法住法位如來出世若不出世常住不易在於一切二乘外道所得法中非是空無然非凡愚之所能知頌云緣於本住法我及諸如來於三千經中廣說涅槃法金剛云若復有人得聞是經信心清淨則生實相當知是人成就第一希有功德世尊是實相者即是非相是故如來說名實相法華壽量品云成佛已

卷二

十

來甚大久遠壽命無量阿僧祇劫常住不滅安樂行品云觀一切法猶如虛空不動不退常住一相涅槃三云我坐道場菩提樹下初成正覺爾時無量阿僧祇恒河沙等諸佛世界有諸菩薩亦曾問我是甚深義然其所問句義功德亦皆如是如是問者則能利益無量衆生四云善男子大涅槃者即是諸佛如來法界涅槃義者即是諸佛之法性也五云解脫者名曰虛寂又虛寂者墮於法界如法界性即真解脫二十八云佛既成道已梵天勸請唯願如來當爲衆生廣開甘露說無上法佛言梵王一切衆生常爲煩惱之所障覆不能受我正法之言梵王復言世尊一切衆生凡有三種所謂利根中根鈍根利根能受唯願爲說佛言梵王我今當爲一切衆生開

卷二

十五

甘露門即於波羅奈國轉正法輪宣說中道一切衆生不破諸結非不能破非破非不破故名中道不度衆生非不能度是名中道非一切成亦非不成是名中道二十二云菩薩摩訶薩修大涅槃知見法界解了實相空無所有無有和合覺知之相得無漏相無所作相如幻化相熱時燄相乾闥婆城空虛之相又涅槃明空與大品中說第一義空無異明常與淨名中說離五非常得五常身無異此則涅槃通至於前故知法華涅槃之說直爾通至華嚴前也○三通△問若爾何有三時五會前後答若就佛意種熟脫三時時不廢故一代時中大小並陳三一不定約機意各隨已見自有三時五會差別又就如來說教實大小頓演時無前後但所被機宜悟解不

同自有頓受或從漸入若漸入者則見如來三時五會說法次第若頓受者則見如來一代時中教法融通故有通別二時相也

賢首五教儀卷第一之二

音釋

毘伽羅此云文摩那斯此云阿修羅此云正女端男醜故亦云非辟支此云緣覺那天有天福無天德故音茂市賣也又以時物由宅此云萬億貿音茂市賣也易掘音掘穿菴羅此云奈其果似桃盛貌修多羅亦云修妬路優陀延亦云優音翁此翻契經從此山出現故名釋迦此云能光明故阿僧祇翻無遮那此云徧無量故阿僧祇翻無遮那此云徧婆羅門此云淨行刹利此云田主毘舍此云毘婆尸翻勝觀尸棄彌勒此云流支此

覺希北 皮音及高貌 波頗 此云智光 警欬
印度人 人名也 輕曰 警 呻 張口貌 須菩提 此云空生
重曰 欬 呻 欠 哇 也 舍利弗 此云身子 亦 迦留陀夷 此云黑光
陳如 此云火 須跋 華言賢善聰 提胃 會立
胡波利 會立云 翻金挺 驚崛 亦云央掘摩羅 言
為雙 陀羅尼 此云總持 舍衛 此云聞物 或
故 好 忉利 華言三十三 夜摩 此翻時分 兜
道 華言知足 於五 摩訶衍 此翻大 甚 鮮 泥
率 欲知止足故 乾闥婆 此云香陰
洹 華言圓寂 亦云寂滅 乾闥婆 新云尋香
帝釋之 樂神也

賢首五教儀卷第二

殆三

清浙水慈雲沙門灌頂續法集錄

○二遍三際時

第三遍周三際時者謂盡前後際各無邊劫恒常周遍演說諸經初無暫息華嚴云不可

聲

說不可說佛刹微塵等劫說異句身味身音聲充滿法界一切衆生無不聞者盡一切未來際劫常轉法輪如來音聲無異無斷不可窮盡餘如不思議品梵網云三世諸佛已說今說當說我今亦如是說四分律云諸世尊大德爲我說是事如過去諸佛及以未來者現在諸世尊能勝一切憂皆共尊敬戒此是諸佛法法華云如諸佛所說我亦隨順行即趣波羅奈爲五比丘說又云善哉釋迦文得是無上法隨諸一切佛而用方便力我等亦

皆得最妙第一法爲諸衆生類分別說三乘是故以方便分別說諸果彌陀云無量壽佛威神無極十方世界無量無邊不可思議諸佛如來莫不稱歎楞伽云我念去來世所有無量佛菩薩共圍繞演說楞伽經世尊亦應爾住彼寶嚴山菩薩衆圍繞演說清淨法維摩云此經廣說過去未來現在諸佛不可思議阿耨菩提所以者何諸佛菩提皆從此生諸佛賢聖所共稱歎背生死苦示涅槃樂十方三世諸佛所說般若云一切諸佛及諸佛阿耨菩提法皆從此經出楞嚴云此是微塵佛一路涅槃門若我說是般怛羅咒經恒沙劫終不能盡又持地菩薩云聞諸如來宣妙蓮華佛知見地我先證明而爲上首涅槃云如來演說一偈之義經無量劫義亦不盡所

謂若戒若定若慧施等○

四攝同類時

第四攝同類劫時者謂彼三際無邊劫中一

一劫內各攝無量同類劫海如長劫唯攝長

劫短劫唯攝短劫然時與劫各有多相如華

嚴明時有八類謂長短染淨廣狹多少劫有

十二類謂長短一無數有量無量有盡無盡

一念不可說一切非於中復有十類謂成壞

劫染汙劫染淨劫淨染劫清淨劫無邊莊嚴

劫無量大莊嚴劫莊嚴滅劫莊嚴成劫普清

淨劫於彼無量同類劫中恒說一切權實教

門華嚴云一一地獄中經於無量劫

根本劫唯攝根本劫長劫春屬秋短劫唯攝春屬秋短劫也

為度衆生故而能

忍是苦不惜於身命常護諸佛法無我心調

柔能得如來道梵網云吾今來此娑婆世界

此大多時唯攝彼天多時彼洲少時亦唯攝此洲少時餘例知八千返說心

地法楞伽云住一切剎兜率陀宮

狹劫色究竟天廣劫成如來身楞嚴云應以菩薩聲聞

身得度者即現菩薩聲聞身而為說法淨攝

淨應以人非人等身得度者即皆現之而為

說法此證染法華云我說然燈佛等也與成又

復言其入於涅槃滅壞如是皆以方便分別

頌云是諸罪衆生以惡業因緣過阿僧祇劫

有盡攝不聞三寶名諸有修功德柔和質直

者則皆見我身常在無盡劫此說法我此土

安隱天人常充滿寶樹多華果散佛及大衆

莊嚴成衆生見劫盡大火所燒時憂怖諸苦

劫相攝惱如是悉充滿莊嚴滅涅槃云往昔衆生壽

百歲時攝有量劫恒沙衆生受地獄報我見是

已即發大願受地獄身我於爾時在地獄中

經無量歲無量劫為諸罪人廣開分別十二

部經諸人聞已壞惡果報令地獄空○五收異類時

第五收異類劫時者謂彼無邊一一劫中各攝無量異類劫海如長劫攝短劫短劫攝長劫等於彼一切異類劫內恒說諸法華嚴云長劫與短劫平等短劫與長劫平等一劫與無數劫平等無數劫與一劫平等有量劫與無量劫平等無量劫與有量劫平等有盡劫與無盡劫平等無盡劫與有盡劫平等不可說劫與一念平等一念與不可說劫平等一

切劫入非劫非劫入一切劫淨名云即演七日以爲一劫即促一劫以爲七日多少時相攝楞伽云或有現變化或有先時化染淨劫相攝於彼說諸乘皆是如來地法華云是諸菩薩種種讚法而讚於佛如是時間經五十小劫佛神

力故令諸大衆謂如半日又云六十小劫身心不動聽佛所說謂如食頃長短劫相攝又云以方便力故現有滅不滅莊嚴滅劫與莊嚴成劫相攝也○六念攝劫時

第六以念攝劫時者謂於一念之中即攝前後無量無邊同異類劫一念既爾餘一切念一一念中皆各普攝盡前後際一切劫海如是時劫說無盡教華嚴云於一念中盡知前際後際及現在一切世界成壞劫故發菩提心頌云一念普觀無量劫同異類也無去無來亦無住如是了知三世事超諸方便成十力楞伽云譬如心意一念也於無量百千由旬無量同異也之外憶先所見種種諸物念念相續一切念也疾詣於彼各攝無邊同異劫也非是其身及山河石壁所能爲礙意生身者亦復如是如幻三昧力

通自在諸相莊嚴憶本成就衆生願故猶如

意去生於一切諸聖衆中淨名云諸有衆生

類同異形聲及威儀無畏力菩薩一時一念

能盡現或現劫盡燒天地皆洞然劫壞或作日

月天梵王世界主劫成或時作地水或時作風

火法華云我以如來知見力故觀彼久遠猶

若今日亦一念間攝○七復重多同異劫也收時

第七劫念重收時者謂一念中所攝劫內復

有諸念而彼諸念復攝諸劫一念既爾餘一

切念劫內諸念攝劫亦是則念念既不盡

劫劫亦無窮如因陀羅網重重無盡於彼諸

劫說諸經海華嚴云於一念頃能知東方阿

僧祇世界念攝所有衆生種種差別解劫攝

念念如是盡阿僧祇劫多念相南西北方四

維上下亦復如是重收例菩薩摩訶薩入可

卷三

五

數劫即不可數劫劫內諸念各攝多劫也入一切劫即

一念一念攝多頌云不可說諸劫即是須臾

頃亦明莫見修與短究竟剎那法圓覺云心

中了知生住滅念分剎頭數如是周遍四威

儀中分別念數念攝無不了知漸次增進乃

至得知百千世界一滴之雨念攝猶如目覩

所受用物又云如是初靜從於一身至一世

界覺亦如是念攝善男子若覺遍滿一世界

者一世界中有一衆生起一念者皆悉能知

百千世界亦復如是念攝楞伽云諸菩薩以

本願方便願一切衆生悉入涅槃念收若一

衆生未涅槃者我終不入念收淨名云一切

諸法念亦無在無不在相收楞嚴云一爲

無量一攝無量爲一多入無量義云佛一切

時念劫相說大小法○八異類

攝入也

第八異類界劫時者謂前之七重且約同類如今娑婆一類界等今辯樹形江河形等無量無邊異類界刹刹既同處而有不同時劫亦有時劫相同而有長短各別分齊然世界形相略開二十種華嚴華藏世界品云佛子彼一切世界種或有作須彌山形或作江河形或作迴轉形或作旋流形或作輪輞形或作壇墀形或作樹林形或作樓閣形或作山幢形或作普方形或作胎藏形或作蓮華形或作佉迦形或作衆生身形或作雲形或作諸佛相好形或作圓滿光明形或作種種珠網形或作一切門闥形或作諸莊嚴具形如是等若廣說者有世界海微塵數又收彼界總成八類謂穢世界淨世界小世界大世界麤世界妙世界狹世界廣世界並盡彼界

時劫常說一切諸法華嚴云於一微細毛孔中不可說刹次第八毛孔能受彼諸刹諸刹不能遍毛孔入時劫數不可說受時劫數不可說於此行列安住時一切諸劫無能說又云或有雜染或清淨受苦受樂各差別斯由業海不思議諸流轉法恒如是一毛孔內難思刹等微塵數種種住一一皆有遍照尊在衆會中宣妙法於一塵中大小刹種種差別如塵數平坦高下各不同佛悉往詣轉法輪一切塵中所現刹皆是本願神通力隨其心樂種種殊於虛空中悉能作一切國土所有塵一一塵中佛皆入普爲衆生起神變毘盧遮那法如是無量壽云羅網寶樹演發無量微妙法音流布萬種溫雅德香其有聞者塵勞垢習自然不起譬如比丘得滅盡三昧隨

其時節風吹散華又寶蓮花周滿世界一一
寶花出三十六百千億佛一一諸佛又放百
千光明普爲十方說微妙法七寶池中八功
德水波揚無量自然妙聲隨其所應莫不聞
者正法念云諸天遊樂池中鳬鴈皆出音聲

第三

七

宣揚偈頌開示五欲畢竟無常不可耽玩大
般若云淨土樹林內外物中常有妙音說一
切法皆無自性楞嚴云林木池沼皆演法音
涅槃云七寶林樹華果茂盛微風吹動出微
妙音一一園中有五泉池是諸池中復有諸
華是諸華中一一各有師子之座一一座上
有一王座以大乘法教化衆生楞伽云何故
諸國土猶如日月形須彌及蓮花卅字師子
像何故諸國土如因陀羅網覆住或側住一
切寶所成何故諸國土無垢日月光或如花

果形篋篋細腰鼓何因佛世尊一切剎中現
異名諸色類佛子衆圍繞法華云自從是來
我常在此娑婆世界說法教化亦於餘處百
千萬億那由他阿僧祇國導利衆生處處自
說名字不同年紀大小又以種種方便說微

妙法能令衆生發歡喜心○

九相攝入時

第九彼此攝入時者即彼異類界中所有時
劫亦復各別相收或同異類界時互相攝入
若念若劫重重無盡同前四五六七悉於彼
時恒說諸門華嚴云一毛端處分正也所有剎
其數無量不可說盡虛空量諸毛端一一處
剎悉如是上總下別彼毛端處諸國土無量種類
差別住有不可說異類剎有不可說同類剎
不可言說毛端處皆有淨剎不可說此明剎界也
或復於一毛端處不可說劫常安住如一毛

端餘悉然所住劫數皆如是此明時劫也彼佛法

身不可說彼佛分身不可說演說法門不可

說調伏衆生不可說此明佛法也上毛端下微塵亦先總乃至

法界悉周遍其中所有諸微塵分依也世界若

成若住壞其數無量不可說別次一微塵處無

邊際無量諸刹普來入十方差別不可說刹

海分布不可說界刹也一一刹中有如來壽命

劫數不可說劫時也諸佛所行不可說甚深妙

法不可說佛法也又云我見十方世界海劫數

無量等衆生上總下別或長或短或無邊以佛音

聲今演說我見十方諸刹海或住國土微塵

劫或有一劫或無數以願種種各不同或有

純淨或純染或復染淨二俱雜或無量劫入

一劫或復一劫入多劫或一切劫莊嚴事於

一劫中皆現觀或一劫內所莊嚴普入一切

殆三

八

無邊劫始從一念終成劫悉依衆生心想生

一切刹海劫無邊以一方便皆清淨有清淨

劫一佛興或一劫中無量現往昔修行刹塵

劫獲大清淨世界海諸佛境界具莊嚴永住

無邊廣大劫楞伽云住色究竟天於彼成正

覺具力通自在現化於此成上同類界劫化下異類界劫化

身無量億遍遊一切處令愚夫得聞如響難

思法此橫遍遠離初照中轉後還亦離於有界土也

現劫無過未劫非多而現多不動而普遍說

衆生身中所覆之真性此豎窮時劫也化佛於諸刹

演三乘一乘佛有三十六復各有十種隨衆

生心器而現諸刹土此總明同異界劫相攝入也淨名云

住不可思議解脫菩薩斷取三千大千世界

如陶家輪着右掌中擲過恒沙世界之外攝

入一又菩薩以一切佛土衆生置之右掌飛

切也

到十方遍示一切而不動本處

攝一切入一切也

又

十方世界劫盡燒時以一切火內於腹中火

事如故而不爲害

攝一切入一也

又於下方過恒河

沙等諸佛世界取一佛土舉着上方過恒河

沙無數世界如持針鋒舉一葉而無所燒

攝一入一也時維摩詰入於三昧現神通力以其

右手斷取妙喜世界置於此土妙喜世界雖

入此土而不增減於是世界亦不迫隘如本

無異

上明解脫境此以實事證

楞嚴云一一同中顯現羣

異一一異相各各見同

界劫俱攝

如是乃至十方

虛空滿足微塵一一塵中現十方界現塵現

界不相留礙

塵界既爾時劫剎然

不動道場遍十方界

此入彼也身舍十方無盡虛空

彼入此也於一毛端現

寶王刹

正攝依也

坐微塵裏轉大法輪

依攝正也法華

云自我得佛來所經諸劫數無量百千萬億

載阿僧祇

總明同異類界劫相攝入也

常說法教化無數

億衆生

十本收未時

第十以本收末時者謂以非劫爲劫故

非劫本劫

未也如華藏界中以非劫爲劫劫即非劫念等

亦爾以時無長短離分限故以染時分說彼

劫故以時無別體依法上立法既融通時亦

隨爾故於此無量不可說劫常說諸教初無

休息華嚴云菩薩摩訶薩知一切劫即是非

劫而真實說一切劫數善男子菩薩智輪遠

離一切分別境界不可以生死中長短染淨

廣狹多少如是諸劫分別顯示

劫即非劫也

何以

故菩薩智輪本性清淨離一切分別網超一

切障礙山隨所應化而普照故

非劫即善男

子譬如日輪無有晝夜

本非劫也

但出時名晝沒

時名夜

末即劫也

菩薩智輪亦復如是無有分別

亦無三世但隨心現教化衆生言其止住前

劫後劫以真如法身本也遍一切法末也與一切

法而共相應遍一切處持諸世間遍一切時

遍在晝夜半月一月年歲成壞劫盡未來際

常住無盡遍住一切衆生界安立一切衆生

爲衆法眼無間無斷頌云華藏世界海法界

等無別莊嚴極清淨安住於虛空劫即非劫此世

界海中刹種難思議一一皆自在在各各無雜

亂一切刹種中世界不思議或成或有壞或

有已壞滅有刹住一劫或住於十劫乃至過

百千國土微塵數或於一劫中見刹有成壞

或無量無數乃至不思議非劫即劫或有刹有佛

或有刹無佛或有唯一佛或有無量佛國土

若無佛他方世界中有佛變化來爲現諸佛

事一一佛刹中一佛出興世經於億千歲演

殆三

十一

說無上法衆生非法器不能見諸佛若有心

樂者一切處皆見一一刹土中各有佛與世

一切刹中佛億數不思議此中一一佛現無

量神變悉過於法界調伏衆生海佛身無有

量能示有量身隨其所應觀導師如是現佛

身無處所充滿一切處如空無邊際如是難

思議饒益衆生故如來出世間衆生見有出

而實無興世不可以國土晝夜而見佛歲月

一刹那當知悉如是衆生如是說某日佛成

道未如來得菩提實不繫於日本如來離分

別非世超諸數三世諸導師出現皆如是譬

如淨日輪不與昏夜合本而說某日夜諸佛

法如是末三世一切劫不與如來合而說三

世佛導師法如是楞伽云不生而現生不滅

而現滅普於諸億刹頓現如水月一身爲多

身隨機心中現遠離常無常而現常無常恒如是觀物不生於惡見一切法無生亦復無有滅於彼諸緣中分別生滅相淨名云法不可住本若住於法是則住法末無住則無本本從無住本立一切法末楞嚴云即一切法離一切相非唯即與離二無所著本末即切同異所不能至同異界法華云如來如實知見三界之相無有生死若退若出亦無在世及滅度者非實非虛非如非異非劫即如三界見於三界非劫即常在耆闍崛山共大菩薩諸聲聞眾圍繞說法頌云是法住法位世間相常住非劫即道場證知已於阿僧祇劫常在靈鷲山及餘諸住處非劫即我常知眾生行道不行道隨所應可度爲說種種法○三
妨六初通
恒說妨

問依此說時則無始終何容有此一代時中諸部經教答一乘玄門諸佛齊證故一切如來法爾皆於無邊世界常轉如是無盡法輪令諸眾生返本還源窮未來際無有休息但隨見聞說有三時五會之別諸慈悲者爲下劣眾生於無盡說中略取此等結集流通故有此等諸部教典今尋於此見無邊法如觀牖隙見無際空而此時說即同無盡以一時即一切時一說即一切說故華嚴云恒以佛日普照法界隨本願力常現不沒恒住法界無有變異○二通涅槃
三
三
問若此多劫常恒說者何故如來有涅槃耶答一切諸佛本不涅槃如華嚴法界品中開梅檀塔見三世佛無涅槃者又復涅槃亦是說法攝生與成道說法無差別故法華壽量

品云爲度衆生故方便現涅槃而實不滅度
常住此說法華嚴出現品云若有衆生應以
涅槃而得度者如來則爲示現涅槃而實如
來無生無滅無有滅度是故說法總無休時

○三通諸教妨三
初華嚴本教

卷三

十三

問智度論云須臾多佛晨朝成道日暮涅槃
唯留化佛度諸衆生則知佛土亦有不說華
嚴教耶答非一切佛土中皆用言語說法如
淨名云有以佛所化人而作佛事乃至有以
八萬塵勞作佛事等則知須臾多佛以所化
身而爲說法正是華嚴無盡教相中之一教
相耳何云不說○二法華涅槃△問據古德共云
如燈明佛晨旦說法華中夜便滅度則法華
之外非有別時更說涅槃謂人根利故聞法
華竟不須復說涅槃又迦葉佛時亦爾則知

涅槃或說不說或有國土唯說三乘究竟不
破如多寶佛或有國土唯說一乘無三可破
如勝雲佛則知法華亦有說不說不同華嚴
我不見有一佛國土其中如來不說此法何
云法華涅槃之說亦該通十方耶答說法華
即是說涅槃以佛之知見不異佛性故說三
乘即是說一乘諸有所作常爲一事故說一
乘即是說法華以頓圓別教與漸圓同教儀
法雖殊而說一乘入佛慧無有別故則知法
華涅槃之說亦恒遍法界也○三阿含△問
稱性本教可爾逐機末教云何亦常演耶答
未不離本故依本而成故攝論云無不從此
法界流無不還歸此法界本源既遠枝派自
長是故人天小教等說亦無始終時也○四
相過妨二初
時處雜亂

問既諸經說皆悉常遍則五會時處豈不雜亂如菩提場說華嚴時既遍虛空周於毛道盡未來際未知鹿野苑等亦說華嚴不設爾何失二俱有過若彼不說即說處不遍說時不常若彼亦說時處即成雜亂何故以經唯云菩提場說華嚴鹿野苑說阿含今何鹿苑亦說華嚴豈不成雜亂耶答說華嚴菩提場處既遍十方一切塵道即彼鹿野苑等皆有菩提場會是故寂場無不常遍說阿含鹿野苑處既遍法界乃至塵毛即寂場等皆有鹿苑是故鹿苑無不常遍既為門不同亦不成雜亂也○二彼此相見△門若約為問不同為互相見不若相見者還成雜亂若不相見何以知遍答若約華嚴與阿含等全教相攝則彼此互無各遍法界而有隱顯不同不見也可

殆三

十四

若約諸教相資則彼此互有同遍法界而有主伴不同相見也可餘一一會一一經處皆亦如是準以思之△五通餘佛妨二初說教同異問諸佛說教亦如是不答此佛既爾餘佛例然經云三世諸佛已說今說當說我等諸佛亦如是說○二時處相違△問餘佛說經時處與遮那說經時處為相見不設爾何失二俱有過謂若相見即乖相遍若不相見不成主伴答見與不見二義俱成謂二互相見主伴義成見與不見相遍義成但見則同遍不見各遍以為異耳文有四句一主主不相見遮那為主時十方餘佛但得為伴不得為主若餘佛為主遮那亦即為伴不得為主二伴伴不相見如諸佛為遮那伴時遮那更不得為伴遮那為餘佛伴時餘佛亦不得又為伴矣三

殆三

十五

主伴互相見如遶那為主見餘伴佛伴佛亦見遶那四伴主互相見如遶那爲伴餘佛爲主兩得相見若互不相見即各遍法界彼此相攝而互無故若互得相見即同遍法界彼此相資而互有故爲門不同亦無雜亂常相

融攝亦無障礙○

六通餘教妨

問餘教云何答聲教旣爾餘教例然是故通論開爲十例或以音聲或現妙色或以奇香或以上味或以妙觸或以法境或內六根或四威儀或弟子人物或一切所作皆堪攝物具如不思議品說若別言聲亦有十例一如來語業圖音自說二如來毛孔出聲說法三如來光明舒音演法四令菩薩口業說法五令菩薩毛孔亦出音聲說法六令菩薩光明亦有音聲說法七令諸刹海出聲說法八令

一切衆生悉爲說法九遍三世中皆以音聲說法十以一切法中皆出聲說法故普賢行品云佛說菩薩說刹說衆生說三世一切說如音聲說法有此十種餘色香等皆各具十是則已爲百門說法準知內內外外根根塵

塵無不恒常周遍而說一切無盡法矣餘如

指歸華玄等釋○

二十儀三初總標

言十儀者一本末差別門二依本起末門三攝末歸本門四本末無礙門五隨機不定門六顯密同時門七一時頓演門八寂寞無言

門九該通三際門十重重無盡門○

次別釋十一差

別門三先正明

第一本末差別門者謂本末同時始終一類各無異說○次出相△然有三位一若小乘中則初度陳如後度須跋中間亦說小益小

如四阿含經及五部律等二若約三乘則始

終說三通益三機如密迹經等三若約一乘

則始終唯爲圓機說於圓極如華嚴經等其

中不通小乘復攝九世該於前後更無異說

○三揀△然此三類依於此世根性定者常

開如上一類之法故佛所演各通始終更無

前後○二起末門
二初正明

第二依本起末門者此有五類謂初爲菩薩

說大二爲緣覺三爲聲聞四爲善根衆生五

爲邪定如出現品日照高山及三千初成喻

中廣辨其相皆明先大後小○二揀△約法

名從本起末以於一佛乘分別說三故十八

本二皆大乘出故約機各是一類之機非約

一機前大後小○三歸本門
二初正明

第三攝末歸本門者依無量義初時說小次

希三

十七

說中乘後時說大故也法華亦云昔於波羅

奈轉四諦法輪今復轉最妙無上大法輪深

密妙智說皆先小後大○二揀△然此門中

有二類人一者一人備歷小大如四大聲聞

等二者先稟小人未必後時稟大以小性定

故而聞後時說大故異前始終俱小後稟大

人未必要從小來以有頓悟機故而知先來

說小故非前始終俱大○四無
礙門

第四本末無礙門者謂初舉照山王之極說

明非本無以垂末後顯歸大海之異流明非

末無以歸本故本末交映與奪相資方爲攝

生之善巧矣是故通論總有五位一根本一

乘如華嚴經二密意小乘三密意大乘四顯

了三乘上三如深密經五破異一乘如法華

經○五不
定門

第五隨機不定門者謂上之四門初門明三

類機始終常定次門明五類機異時常定三

門明一類機自淺之深四門明二類機初機

聞頓後機從淺至深更有一類不定之機或

從小乘次入三乘後入一乘亦有從小直入

一乘或多類機隨聞一句異解不同○六顯密門

第六顯密同時門者謂同聽異聞若互相知

者是顯不定若互不相知者即是秘密顯密

同時亦無前後○七頓演門

第七一時頓演門者謂上來諸門一時頓演

華嚴云如來一語中演無邊經海無量義云

佛一切時說大小等○八寂冥門

第八寂寞無言門者謂從初得道乃至涅槃

不說一句般若云我從成道已來不說一字

汝亦不聞涅槃云若知如來常不說法是名

具足多聞楞伽云我某夜成道至某夜涅槃

於此二中間我都無所說緣自得本住故我

作是說彼佛及與我悉無有差別○九該通門

第九該通三際門者謂此上諸門盡通三際

經云一法門中無量門無量千劫如是說○

十無盡門

第十重重無盡門者謂前之九門隨時隨處

重重無盡皆無前後經云毘盧遮那佛願力

周法界一切國土中恒轉無上輪○三通結

此上十門圓通無礙是則前後即無前後無

前後之前後耳○三五教二初總標

言五教者一小乘教二大乘始教三終教四

一乘頓教五圓教○二別釋五初略出名義五一小教名義

初小乘教者即愚法二乘教異大乘故逐機

設故隨他語故以其明諸法數一向差別所

謂揀邪正辨聖凡分欣厭析因果也。○二始教名義

二大乘始教者亦名分教但明諸法皆空未盡大乘法理故名爲始但明一切法相有成佛不成佛故名爲分。○三終教名義二初正釋十九

三終教者亦名實教由明緣起無性一切皆如定性二乘無性闡提悉當成佛方盡大乘至極之說故名爲終以稱實理故名爲實。○

二結會

上之二教並依地位漸次修成故總名漸。○

四頓教名義二先正釋二初約當法立名

四一乘頓教者但一念不生即名爲佛不依地位漸次說故如思益云得諸法正性者不從一地至於一地楞伽云初地即爲八無所有何次。○二約對他受稱

不同於前漸次修行不同於後圓融具德故立名頓。○後解妨

問此若是教更何是理答頓詮此理故名頓教別爲一類離念機故亦爲對治空有俱存三種着相人故即順禪宗。○五圓教名義

五圓教者統該前四圓滿具足一位即一切位一切位即一位是故十信滿心即攝五位成正覺等依普賢法界性相圓融主伴無盡身刹塵毛交遍互入故名圓教如華嚴云顯現自在力爲說圓滿經無量諸衆生悉受菩

提記等。○二詳辨所詮二先別約所詮辨異二初標

若廣約所詮法相辯者。○二釋五一小教法相三初總明四一

法數多少

初小教中說有七十五法。○次二空差別△唯明人空不明法空縱說法空少不明顯。○三所依根

本△但依六識三毒建立染淨根本故阿含

云貪恚愚癡是世間根本等○四結成△未

盡法源故多諍論○二別釋二先

總相如是若別明者略舉十門法義差別○

次勸義分門

說唯六識義分爲心意識○二種△除佛一

人有菩提性餘諸衆生無佛種性○三行△

方便資加見修證中修至忍位得不退轉○

四時△聲聞下根極疾三生得羅漢果最極

遲者經六十劫獨覺中根極疾四生遲經百

劫如來上根定滿三祇○五依△但分段身

至究竟位○六斷△斷煩惱障證我空理○

七回△既趣寂後皆無回心○八果△佛果

相好唯是無常○九化△娑婆閻浮爲佛報

土三千百億即攝化境○十佛△此釋迦身

治三

二十

乃是實報非法非化或立爲二即有生身化

身佛別○三結

如是等義廣如小乘經論中說○二始教法

明二先法相二

二始教中廣談法相少及法性其所云性亦

是相數○次對前△說有百法決擇分明故

少諍論○後無相二初△又說諸法一切皆

空○次對後△不說不空中道妙理○二別

彰劣

總相如是若別明者開爲二門○次分門釋

他教二△先且對他教辨異於中分二○二別

初總

初相宗法義略舉十門○二釋九初唯

說有八識唯是生滅依生滅識建立生死及

涅槃因○二乘性中△法爾種子有無永別

是故五性三乘決定不同○三真如中△既

所立識唯業惑生故所立真如常恒不變不

許隨緣○四三性中離義△依他起性似有不無非

即無性真空圓成經說空義但約所執○五生

佛中永△既言三性五性不同故說一分衆

生決不成佛名生界不滅○六二諦中離義△真俗

二諦迥然不同非斷非常果生因滅○七四相中

前後△同時四相滅表後無○八斷證中△

根本後得緣境斷惑義說雙觀決定別照以

有為智證無為理義說不異而實非一○九佛

身中有為義△既出世智依生滅識種故四智心

品為相所遷佛果報身有為無漏○三結

如是義類廣有衆多具如深密等經瑜伽雜

集等論○後空宗三初標

次空宗法義略有五門○二釋五初無本性中無性義

說一切法皆無自性即是真如以此無性而

為其名凡愚不了着於法相故但標名而遮

其非○二真智知中真智義△能了此者即名真智○

三二三諦中二諦義△所詮法義不出二諦差別法相

乃名為俗無為義性即名為真○四三性中各具義

△有謂依計空謂圓成○五佛德中空義△雖說佛

身五求不得得即虛妄無得乃真離一切相

名佛功德故以有我為妄無我為真○三結

如是義類亦有衆多具如諸部般若等經中

觀百門等論○後約當法二初總

次正約當法廣明復有十門○二別十一心識

說賴耶識為諸法依從業種生唯是生滅○

二種性△就有為中立五種性由法爾故無始

時來一切有情有無永別○三行位△資等五

位乾等十地修至加行性地位中得不退墮

○^{四時}△成菩提道定滿三祇○^{五依}△亦
是分段至究竟果○^{六斷}△聲聞緣覺斷煩
惱種分斷所知菩薩俱斷○^{七回}△決定性
者趣寂不迴不定性者並迴向大○^{八果}△
三十二相是化身好八萬四千是報身德但
此修生及佛法身俱常無常○^{九化}△以釋
迦身隨他受用實報淨土在首羅天化身充
滿百億閻浮○^{十佛}△如來法身唯真境界
釋迦佛身化非法報或分生身法身二佛或
開三身或立四佛○^{三結}
如是等義詳如佛地阿毘達磨大品等經顯
揚智度攝論中說○^{三終教法相三初總明}
^{二先對相顯二初對後}
^彰
三終教中多談法性少及法相其所云相亦
會歸性○^{二對前}△盡大乘說故無諍論○
^{顯勝}
^{三三}

後對空顯二△由明不空真如中道○^{二對}
初對後彰劣
勝△不但說空以爲至極○^{二別釋二先}
總相如是若別明者亦開二門○^{義二先對}
他教二△先且對他教辯異於中亦二○^二
初總
二先對相
辨二初標
初對相宗揀顯法義亦有十門○^{二釋九初}
義
所說入識通如來藏隨緣成立生滅與不生
滅和合而成非一非異○^{二乘性}△一切衆
生平等一性皆同一乘同一解脫○^{三真如}
義
△但是真如隨緣成立○^{四三性}△依他
無性即是圓成○^{五生佛中}△一理齊平故
說生界佛界不增不減○^{六二諦}△第一義
空該通真妄真非俗外即俗而真故雖空不
斷雖有不常○^{七四相中}△四相同時體性
^{一時義}

即滅○八斷證中△緣境斷惑不二而二有

相即義

能所斷二而不二說為內證照惑無本即是

智體照體無自即是證如非智外如為智所

證非如外智能證於如○九佛身中△既世

無為義

出世智依如來藏始本不二則有為無為非

一非異故佛化身即常即法不墮諸數況於

報體即體之智非相所遷○後對空辨

二初標

次對空宗揀顯法義亦有五門○二釋五初

無本性中

本性

但明自性清淨本然常住真心方為實理此

真如體唯是一心即以此心為其名目權乘

不了住平等空非諸法性故令認體而表其

是○二真智知△一心真實本自能知通於

中真知義

理智徹於染淨○三二三諦△所詮法義具

中三諦義

足三諦色等即空是為真諦空即色等乃為

俗諦一真心性非色非空能色能空名為中

道第一義諦就二諦中一真法性目之為真

種種義相稱之為俗○四三性中△遍計執

通具義

性情有理無依他起性相有性無圓成實性

情無理有相無性有○五佛德△一切諸佛

中有義

自體皆具常樂我淨真實功德身智通光一

一無盡性自本有不待機緣故以無我為妄

有我為真○後約當法

二初總

後正約當法廣明亦有十門○二別十

一心識

說梨耶識乃是真如隨緣合成是故八識通

略三

二十四

如來藏非唯生滅○二種△就真如中立種

性

性故徧諸眾生皆有佛性○三行△信等五

位

十二位之中修至初住即得不退○四時△

分

行成佛果不定三祇亦無百劫修相好業○

五依△地前留惑受分段身初地斷種受變

易身○六斷△於二障中正使習氣三賢伏

現見道除種地上侵習佛位究淨○七回△

一切二乘無不回心○八果△報身相好八

萬四千修生法身亦常無常○九化△所住

依果在三界外數世界種無量恒沙爲一佛

界所攝化境○十佛△如來法身唯以妙智

或以境智釋迦佛身亦法報化或開二佛三

身或立四佛五身○三結

如是等義詳如勝鬘本業仁王瓔珞等經佛

性實性起信論等中說○四頓教法相三

四頓教中總不說法相唯辯真性○次△一

切所有唯是妄想一切法界唯是絕言五法

與三自性俱空八識及二無我盡遣訶教勸

離毀相泯心生心即妄不生即佛○三△亦

無佛無不佛無生無不生○四△如淨名默

住顯不二等是其意也○二別釋二先

總相如是若別明者亦有十門法義差別○

次勸教分門

說一切法唯一真如○二種△離言說相名

爲種性○三行△一念不生即名爲佛有何

行位漸次差別○四時△既唯一念無時可

說○五依△所依身分亦不可說○六斷△

一切煩惱本來自離○七回△二乘聲聞非

迴不迴○八果△一切佛身唯一法身相盡

離念平等平等不可說有功德差別亦不可

說常與無常○九化△依真而住非有國土

○十佛△如來法身非智非境釋迦佛身法

非報化是故唯立一實性佛○三結

如是等義廣如淨名圓覺楞伽寶積等經般

若涅槃論等中說○五圓教法相三

五圓教中所說唯是無盡法界○二釋△性海

圓融緣起無礙相即相入如因陀羅網重重

無際微細相容主伴無盡○三結△十十法門

各攝法界○二別釋二先結前起後

總相如是若別明者亦有十門法義差別○

次勸義分門十一心識

說一法界性起爲心或開十心以彰無量○

二種性△菩薩種性即因即果盡三世間一切

諸法甚深廣大與法界等○三行位△攝前諸

教所明行位始從十信乃至佛地六位不同

隨得一位得一切位○四時分△一切時分悉

皆不定念劫圓融自在無礙○五依身△但分

段身至於十地○六斷感△斷除惑障一即一

切○七回心△一切二乘並已迴竟悉無所迴

○八果相△佛實相好有十蓮華藏世界海微

卷三

二十六

塵數相彼一一相皆遍法界業用亦爾然德

用體通常無常○九化境△靈山淨土華藏世

界無量雜類諸國土海皆是十佛攝化境界

○十佛身△如來法身境智存泯或具或絕釋

迦佛身非但三身亦即十身故立十佛以顯

無盡○三結指

如是等義廣如法華涅槃華嚴等經十地不

思議等論說○後總出判教所以

以上諸教所指經論然取多分略出一二實

非局判以一經一論中容有多教故下俱做

此○三別明斷證二初標

若別出斷證分齊者○二釋五一小教斷證三初聲聞二先教理

二初總

初小教中先明聲聞依四諦教斷煩惱障○

次別二先依諦立教二初正釋四一苦△言四諦者一苦諦別

則二十五有總則六道生死二十五有者謂

四洲四惡趣六欲并梵天四禪四空處無想

及那含也六道者謂地獄畜生餓鬼修羅及

人天也雖然苦樂不同畢竟生死相續○二集

△二集諦即見思惑亦云見修又云四住染

汙無知界內惑等○三減△三減諦滅前苦集

顯偏真理因滅會真滅非真諦○四道△四道

諦略則戒定慧廣則三十七品一四念處謂

觀身不淨觀受是苦觀心無常觀法無我二

四正勤謂未生惡者令惡不生已生惡者令

惡消滅未生善者令善發生已生善者令善

增長三四如意足謂欲念進慧四五根謂信

進念定慧五力同上信等根名六七覺支

謂念擇進喜輕安定捨七八正道謂正見思

惟語業進定念命○二結△然四諦中前二

爲世間因果謂苦果集因後二爲出世因果

謂滅果道因聲聞根鈍知苦斷集慕果修因

故世出世皆前果後因也○次斷障證△言

煩惱者即見思惑見是分別思是俱生○二釋

二先△見有八十八使謂貪瞋癡慢疑五鈍

使身見邊見邪見見取戒取五利使歷三界

四諦下增減不同成八十八謂欲界苦下十

使具足集滅下各七使除身邊戒道下八使

除身邊見共爲三十二上二界四諦下各除

瞋使餘皆如欲界共爲二十八二界合成五

十六并前欲界三十二共有八十八也○次思

△思有八十一品謂三界分爲九地欲界合

爲一地四禪四空爲八欲界地中有九品貪

瞋癡慢謂上上上中上下中上中中下下

上下中下上上一品獨潤二生上中上下

二品共潤二生中上一品獨潤一生中中中
下二品共潤一生下上一品獨潤半生下中
下下二品共潤半生具不善性及有覆性故
潤七生上八地中各有九品唯除瞋使以爲
定力所攝伏故唯有覆性不多潤生三界共

有八十一也○結三△前分別惑名之爲羸強

思計度而生起故亦名發業煩惱能發業故

後俱生惑名之爲細與身俱生任運起故亦

名潤生煩惱能潤生故○次行位△其間行

位略開爲五○一資糧△一資糧位修三觀

行初五停心觀一多貪衆生不淨觀二多瞋

衆生慈悲觀三多散衆生數息觀四多癡衆

生因緣觀五多障衆生念佛觀二別相念觀

即上四念處是三總相念觀謂觀身不淨受

心法皆不淨乃至觀法無我身受心亦無我

卷三

无

但此位中惟觀苦諦伏煩惱惑○行二加△二

加行位有四一煖位觀四諦修十六行二

頂位用觀同前轉更明朗三忍位有三下忍

過觀八諦修三十二行中忍縮觀漸減緣行

乃至一行二剎那在名中忍滿即入上忍上

忍惟觀欲界苦諦但有一行二剎那在前一

剎那盡名上忍滿即入世第一四世第一位

亦惟觀欲界苦即上忍位二剎那中後一剎

那盡名世第一滿引入無漏見道此之四位

漸能伏除煩惱分別○三通△三通達位即

初果位從世第一後心生苦忍真明次於八

諦下發八忍八智總十六心十六心中前十

五心無間道時名預流向至十六心解脫道

時名預流果此位斷三界八十八使分別見

惑見真諦故又名見道○四修△四修習位

習

謂於欲界九品俱生思煩惱中若斷前六品
斷至第五品解脫道時名一來向斷至第六
品解脫道時名一來果若斷後三品斷至第
二品解脫道時名不還向斷至第三品解脫
道時名不還果若斷上八地七十二品俱生

思煩惱中斷至第七十一品解脫道時名羅
漢向自從預流正住果後進斷修惑已來齊
此解脫皆修道攝○五無學△五無學位謂斷

至第七十二品解脫道時證五分法身名羅
漢果此位斷分別俱生煩惱並盡子縛已斷

果縛猶存名有餘涅槃若灰身泯智名無餘

涅槃○次辟支二先人

次明辟支有二類別○二別釋二△一緣覺

值佛出世稟十二因緣教所謂一無明二行
三識四名色五六入六觸七受八愛九取十

有十一生十二老死然此觀境與前四諦開
合異耳謂無明行愛取有五支合為集諦餘
識名色入觸受生老死七支開為苦諦觀因
緣智即為道諦十二支滅即為滅諦但緣覺
人先觀集諦若生起門觀者謂無明緣行乃

至生緣老死若還滅門觀者謂無明滅則行
滅乃至生滅則老死滅由觀因緣覺真諦理
故名緣覺○次獨覺△二獨覺出無佛世獨宿

孤峰觀物變易自覺無生故名獨覺○次行

△雖名不同行位無別此人斷三界分別俱

生與聲聞同更侵煩惱習氣故居其上○三

二初

後明佛○二法二先修善△從本因地初發

心時緣四諦境發四弘願一未度者令度即
眾生無邊誓願度此緣苦諦境二未解者令

解即煩惱無盡誓願斷此緣集諦境三未安

者令安即法門無量誓願學此緣道諦境四

未得涅槃者令得涅槃即佛道無上誓願成

此緣滅諦境○二修行二先三祇修六度二初總標△既已發

大心須行行填願於三祇劫修六度行○別

釋二初行相三先初祇△言三祇者且約我佛釋迦修

行菩薩道時論分限者從古釋迦至尸棄佛

值七萬五千佛名初一阿僧祇從此常離女

身及四惡趣然不自知當來作佛若望聲聞

位即五停心總別念處○次二△次從尸棄

至然燈佛值七萬六千佛名第二阿僧祇此

時用七莖蓮華供養布髮掩泥得受記莚號

釋迦文爾時自知作佛口未能說若望聲聞

位即煖位○後三△次從然燈至毘婆尸佛

值七萬七千佛名第三僧祇滿此時自知亦

向人說必當作佛自他不疑若望聲聞位即

頂位○相二滿△經如許時修行六度然修六

度各有滿時如尸毘王代鵠檀滿普明王捨

國尸滿羣提仙人爲歌利王割截無恨忍滿

大施太子抒海并七日翹足讚弗沙佛進滿

尚闍黎鵲巢頂上禪滿助嬪大臣分闍浮提

七分息諍智滿○次百劫種相好△修度滿後更住

百劫種相好因修百福成一相如云大千盲

人治差爲一福等若望聲聞是下忍位○後

如來△次入補處生兜率託胎出胎出家降

魔安住不動爲中忍位次一剎那入上忍位

後一剎那入世第一位發真無漏三十四心

頓斷分別俱生煩惱習氣在於染變化土成

劣應身佛坐生草座說小乘諦緣之法令彼

一類下下凡夫外道轉凡成聖也

賢首五教儀卷第二

音釋

維摩此云淨名般怛羅唐言傘蓋用娑婆

此云堪忍眾生由旬此云限量如此方界

能忍此土苦故秦言能作天楞嚴淫禁

者八十里因陀羅主即帝釋也楞嚴淫禁

楞者名一切事竟嚴者名固即一切事究竟堅固也

音善築土為壇法勒迦唐言廣大生息圭山云凡音

也毘盧遮那理智不分之真身也云凡音

乃佛胸前吉祥海雲相也監除也狹者

此是吉祥萬德之所集耳聞提

闍崛靈鷲須扇多佛名此迦葉飲此云闍提

涅槃云一闍云信提云不瑜伽此翻頤耶

具信不具足名曰闍提首羅此翻大自在天

亦云阿梨耶梁云無首羅具云摩薩首羅

沒鐵磨翻為藏識阿毘達磨此云無比法新那舍此云羅漢

華言應供謂應華言應供謂應新華言應供謂應

提秦言歌利此云惡生又云杼音汝舒漂

酌取翹音喬翹足弗沙唐言增盛明闍黎

也華言軌範謂於弗沙達勝義故闍黎

衆中作軌範故弗沙達勝義故闍黎

賢首五教儀卷第三

殆四

清浙水慈雲沙門灌頂續法集錄

○二始教斷證二先統
論四教或位三初標

二始教中總諸大乘經論所明修斷不離二
種執障所示行證不出八重地位○二釋二
先執障

二初惑二先惑
體二初二執△二種執障者謂執有二一

者我執執蘊等法有實主宰名為我執二者
法執執蘊等法心外實有名為法執此由迷
於二空而起從境得名封閉我法堅執不捨
名為執故○次二
障△障亦有二一煩惱障謂

執遍計所執實我薩迦耶見而為上首百二
十八根本煩惱及彼等流諸隨煩惱此皆擾
惱有情身心能障涅槃名煩惱障二所知障
謂執遍計所執實法薩迦耶見而為上首見
疑無明愛恚慢等覆所知境無顛倒性能障

菩提名所知障又煩惱障亦名事障續諸生
死故所知障亦名理障礙正知見故又事障
亦名煩惱礙能障真如根本智故理障亦名
智慧礙能障世間自然業智故此由惑於二
智而起從心得名覆蔽真心礙智不起名為
障故○次惑相二初生
起因緣二相△二執障中復各有
二一者俱生無始時來虛妄熏習內因力故
恒與身俱不待邪教及邪分別任運而轉故
名俱生二者分別亦由現在外緣力故非與
身俱要待邪教及邪分別然後方起故名分
別○二相續粗
細三相△此俱生分別中又有三種
一者現行麤中麤也二者種子麤中細細中
麤也三者習氣細中細也○二斷△若斷煩惱
覺人無我離分段死名為小乘兼斷所知覺
法無我離變易死名為大乘○後地
位△八重

地位者謂從凡夫終大涅槃中間經歷正修行路畧分八重階降廣有五十六位一者十信二者十住三者十行四者十向五者四加六者十地七者等覺八者妙覺○三然其修行優劣斷證權實前後四教自有差別也

○後別明初教斷證

今先初教斷證相者一十信初伏二障與小教停心位齊二十住雙伏二障中少伏煩惱障分別現行三十行雙伏二障中少伏所知障分別現行四十向伏除二障分別現行分此四十位即唯識資糧位大品乾慧地與小教別總相念位齊五四加行伏二障分別種子除分別現行細分少能伏除俱生現行麤分此即唯識加行位大品性地與小教加行位齊六十地中初地始斷二障分別種子

始四

二

更斷俱生現種一分即唯識見道位大品八人地見地與小教通達位齊三地斷二障俱生現種三分即大品薄欲地與小教二果齊五地斷二障俱生現種五分即大品離欲地與小教三果修習位齊七地斷二障俱生現

種七分即大品已辦地與小教四果無學位齊八地斷二障俱生現種八分即大品辟支佛地與小教辟支位齊九地斷二障俱生現種九分與小教佛果位齊十地已去小教絕分七等覺斷二障俱生現種十一分進斷佛分地一分此三地即大品菩薩地自二地至此即唯識修習位八妙覺斷二障分別俱生現種習盡即唯識究竟位大品佛地在於淨變化土成勝應身佛坐天衣座說大乘空相之法令彼小乘及諸下根凡夫外道轉小成大

始四

三

也○三終教斷證二先總明

二覺據顯三初總標

三終教中所說斷證行位皆隨一性而立故

開雖有八重地位合則唯是三種覺性○二別

釋三初△如起信論明三覺心一本覺即凡

夫不覺位也蓋凡夫時覺性本具無明迷覆

成不覺故二始覺從初發心直至等覺菩薩

位也始能解行證故於內復有三位覺異一

名字覺初心十信也二相似覺三賢四加也

三隨分覺十地等覺也三究竟覺即如來妙

覺位也唯佛如來能究竟故○二三佛性△又佛

性論明三佛性一住性佛性凡夫迷障時也

二引出佛性菩薩解行時也三至得佛性如

來證入時也○三三法界△又法界論明三法界

一眾生法界凡夫雜染位也二菩薩法界菩

薩染淨位也三如來法界佛果純淨位也○

二結△總之三相別異一性總同若識三相

則有行位淺深高下而不生於上慢若明一

性則知理性地地是同而不生於自屈是故

此教與後二教漸頓圓雖異所顯理唯一也

餘如下釋○二別釋八位斷證

今先十信初信中具三位一不覺屬本覺二

發心三成信此位即畧伏二執與小停心始

十信齊七信具伏二執中實伏分別俱生現

行麤分與小總相始十向齊十信具伏二執

中實伏分別俱生現行細分成始覺中名字

覺也與小加行始世第一齊二十住初住具

伏二執中實除我執分別俱生現行麤分與

小初果始初地齊五住具伏二執中實除我

執分別俱生現行細分與小三果始五地齊

七住具伏二執中實除我執分別俱生現盡

更除法執分別俱生現行麤分與小四果始
七地齊十住具伏二執中實除法執分別俱
生現行細分與始教十地齊三十行初行具
伏二執中實伏我執分別俱生種子麤分與
始教等覺齊二行具伏二執中實伏法執分
別俱生種子麤分與始教妙覺齊三行具伏
二執中實伏我執分別俱生種子細分自此
已去始教絕分十行具伏二執中實伏法執
分別俱生種子細分四十向初向具伏二執
中實除二執分別俱生種子麤分十向具伏
二執中實除二執分別俱生種子細分五四
加行具伏二執習氣成始覺中相似覺也六
十地初地斷二執分別俱生現行種子盡更
斷習氣一分十地斷二執習氣十分七等覺
斷二執習氣十一分進斷佛地習氣一分成

殆四

五

始覺中隨分覺也從發心來皆當始覺上因
圓竟八妙覺斷二執現種習氣盡得究竟覺
即果滿也在於受用土中成受用身佛坐金
剛座說大乘藏心之法令彼權教菩薩及二
乘人并一類中根凡夫外道轉權成實也○

四頓教斷證
二先出意

四頓教中就實言無斷證約妄說有感位又
在當教本無階差對前後論便成高下也○

次正
釋

先明十信初信中亦具三位一不覺本覺住
性性也二發心此位即頓伏二執先已伏分
別俱生現行麤分與小總相始十向終七信
齊三成信頓伏二執中先伏分別俱生現行
細分與小加行始世第一終十信齊七信頓
伏二執中先除我執分別俱生現行麤分與

小初果始初地終初住齊十信頓伏二執中
先除我執分別俱生現行細分成始覺中凡
夫名字覺也與小三果始五地終五住齊二
十住初住頓斷二執中先除我執分別俱生
現盡更除法執分別俱生現行與小四果始
七地終七住齊七住頓斷二執中先伏分別
俱生種子麤分與始妙覺終二行齊十住頓
斷二執中先伏分別俱生種子細分與終十
行齊三十行初行頓斷二執中先除分別俱
生種子麤分與終初向齊十行頓斷二執中
先除分別俱生種子細分兼伏習氣與終十
向四加行齊四十向初向頓斷二執分別俱
生現種更斷習氣一分與終初地齊十向頓
斷二執習氣十分與終十地齊五四加行斷
前習盡進伏初地習氣成始覺中地前相似

覺也六十地初地頓斷習氣十一分與終等
覺齊二地頓斷習氣十二分與終妙覺齊三
地已去終教不知名目十地頓斷習氣二十
分七等覺頓斷習氣二十一分進斷佛地習
氣一分成始覺中入地隨分覺從發心來皆
當始覺引出性也上因圓竟八妙覺頓斷二
執現種習盡證如來究竟覺至得性也在於
法性土中成法性身佛坐虛空座說一乘真
性之法令彼漸教菩薩及二乘人并諸一類
上根凡夫外道轉漸成頓也○五圓教斷證
二先出意
五圓教中行位因果無非法界法界圓融行
位無礙今對終頓明行布相理實初後盡圓
融也○次正
釋
先明十信初信中亦三位一不覺本覺衆生
雜染法界也二發心此位即圓伏二執究已

伏分別俱生現行細分與小加行始世第一
終十信頓初信齊三成信圓伏二執中究已
除我執分別俱生現行麤分與小初果始初
地終初住頓七信齊五信圓伏二執中已除
我執分別俱生現行細分與小三果始五地
終五住頓十信齊七信圓伏二執中已除我
執分別俱生現行盡更除法執分別俱生現行
與小四果始七地終七住頓初住齊九信圓
伏二執中已伏分別俱生種子麤分與始妙
覺終二行頓七住齊十信圓伏二執中已伏
分別俱生種子細分成始覺中名字覺也與
終十行頓十住齊二十住初住圓斷二執中
已除分別俱生種子麤分與終初向頓初行
齊十住圓斷二執中已除分別俱生種子細
分兼伏習氣與終四加頓十行齊三十行初

行圓斷二執分別俱生現種更斷習氣一分
與終初地頓初向齊十行圓斷習氣十分與
終十地頓十向齊四十向初向圓斷習氣十
一分與終等覺頓初地齊二向圓斷習氣十
二分與終妙覺頓二地齊十向圓頓習氣二
十分與頓十地齊五四加行斷前習盡進伏
初地習氣成始覺中相似覺也六十地初地
圓斷習氣二十一分與頓等覺齊二地圓斷
習氣二十二分與頓妙覺齊三地已去頓教
不知名目十地圓斷習氣三十分七等覺圓
斷習氣三十一分進斷佛地習氣一分成始
覺中隨分覺也從發心來皆當始覺菩薩染
淨法界也上因圓竟八妙覺圓斷二執現種
習盡得究竟覺如來純淨法界也在於無障
礙法界土中成無障礙法界身佛坐師子座

說一乘法界之法令彼偏教菩薩及一切迴心佛果二乘并一類上上根凡夫外道轉偏成圓也○四重揀機 益二初標

若揀別前後隨機攝益差別相者○二釋五 初機教 機益三

初小教中所益機宜有四種性一人種性中復二一闡提無善根種性者二凡外有善根種性者但外道是邪善凡夫是正善二天種性亦分邪正邪中有二一外道天無想等也二魔王天即欲頂色頂二自在也正者凡夫天也欲界六天色至廣果及四空天三聲聞種性四辟支種性此二各有二種一回心從人天來二直進不由彼至此四種根同於提胃阿舍會上見劣應身佛住染變化土隨短時分隱實施權聞說戒善諦緣諸法○二攝 益二 益四

總先

然彼四類人中各有二種一者鈍根若解若證止住自分更不前進名為定性祇成當教因果為當教攝二者利根若解若證超出自分徙前增進名不定性即通餘教因果餘教來攝又不定中復分三類一者具超具歷五教後入法界故二者不定超於五教中關而後別二不定故三者直超隨於一教得入法界故○後人天 後別二

今先人天戒善論之聞人天教修諸戒善起九

六行觀但求世樂不慕涅槃即名鈍根人天乘攝但成世間有漏戒善得界內離苦解脫此復有二一者得樂已休更不前進是乃定性人天鈍中鈍者當教所攝設遇始教但為增潤二者厭三界苦樂求涅槃名不定性人

天鈍中利者後遇諸教必被彼攝轉成餘果。若知戒善是因緣生起我空觀求出生死希涅槃樂二乘來攝即成出世無漏中麤染戒善得麤染解脫若識戒善唯識所現起唯識觀爲諸衆生經劫修行始教相宗來攝若悟戒善真空無相起真空觀爲諸衆生修無相行始教空宗來攝此二皆成出世中淨妙戒善得淨妙解脫若知戒善藏心本具作唯心觀爲諸衆生從性起修終教來攝即成無漏中亦麤亦妙戒善得即麤即妙解脫若解戒善唯一真性作真性觀爲諸衆生修無性行頓教來攝即成出世法中無麤無妙戒善得非麤非妙解脫若了戒善法界緣起作法界觀普爲法界稱性圓修圓教來攝即成無漏界中普融無盡戒善得一切無障礙解脫自

小乘來皆名利根具直等超亦復不定○後二

次辯四諦十二因緣聞二乘諦緣教即解諦緣是因果法起六行觀着我我所求諸有樂此則落前人天教乘即成世間有漏諦緣但滅界內諸惡道苦不得出世涅槃真樂是中機宜亦有二類一者不回即前一類定性人天二者直往自有一類如是種性故此諦緣爲彼助潤今後雖爾終當轉入若知諦緣是因緣生心外實有起我空觀欲速出三界樂求涅槃樂此成聲聞辟支佛乘對後諸教亦名鈍根但成小乘生滅有量有作諦緣證入無餘涅槃此亦有二一者回心即前人天不定性者二者直進法爾如是種性成者二中又二一者居滅已休更不前進名爲定性二

乘鈍中鈍者唯當教攝即至始分亦但增潤
二者自不滿足更求上進名不定性二乘鈍
中利者諸教來攝轉入受被始終不定若識
諦緣皆唯識現作唯識觀普爲自他三祇修
行分教相宗來攝即成大乘無量相諦緣證

為四

入無住涅槃若了諦緣皆如幻現作即空觀
雖衆生空而修幻行始教空宗來攝即成大
乘無生相諦緣證入真空涅槃若知諦緣本
如來藏起唯心觀隨順法性作諸功德實教
來攝即成大乘無量性諦緣入真常涅槃若
悟諦緣唯真如性起真如觀雖知寂滅修自
證行頓教來攝即成大乘無生性諦緣入寂
滅涅槃若了諦緣是法界起作法界觀徧十
法界修普賢行圓教來攝即成一乘無作不
思議普融無盡諦緣證入如來究竟無障礙

為四

十一

大般涅槃自分教來皆名利根具直等超亦
復不定○三問

答

問何位轉入被攝何教攝授引進答初所攝
入人先人天中上根者聞法信解時中根者
修久得力時下根者純熟伏惑時於此三位
隨其發解起行小大而得轉入小始終頓圓
也次二乘中上根者方便位時中根者見修
道時下根者無學果時亦隨其解行淺深而
得回入始分終頓圓也二能攝入教先人天
中約教道似位小世第一始十向終頓圓十
信已下者約證道真位小初果始初地終頓
圓初住已上者皆能引攝人天不定性人進
於小始終頓圓也次二乘中似位始十向等
真位始初地等引進小乘入於大也問將何
教理攝耶答有就他教而爲點示如攝人天

還用戒善小乘還用諦緣亦如上明有依自教而爲開悟如人天求出世間決擇偏真即用四諦攝之若覺苦空樂獨善寂即用因緣攝之如二乘達諸法相捨離二執即用分教相宗攝之了諸法空得二無我即用始教空宗攝之並如下釋問具直不定超相云何答知諸戒善本無有我超小也亦無有法超始也唯是藏心超終也性本離言超頓也緣起無盡超圓也此具超相了戒善法空無有相超始也唯一真性超頓也性起重重超圓也此不定相悟戒善相交融攝離此法界別無有法此即人天戒善直超圓教相也諦緣準知○二始教機益
三初機教

前二類此三性中復各二種一者前來二者現進同於深密般若會上見勝應身佛住淨變化土隨長時分權實雙明聞說法相真空諸法○二攝益
二先相

若聞大乘唯識法相即識法相是三界有起六行觀與煩惱雜修諸禪善此亦落前人天乘教即成世間因果法相但能伏業不能斷惑若知法相是生滅法依於六識三毒而有起偏真觀樂求出世孤調解脫此亦落前二乘小教即成出世無漏法相斷界內煩惱障

是二機宜亦有二類一者不回即前教中定性人等二者直往法爾有此一類種性故此法相亦爲助潤若悟法相依八識有作唯識觀三祇百劫廣修萬行此成大乘相宗分教對後諸教亦名鈍根但成唯識法相斷界外

所知障此亦有二一者回心即前教中不定性人二者直往本來自如是種性二中又二一者經後三教或歷二教始入法界然後圓果此等三乘鈍中鈍者在終頓中亦名定性爲今教攝二者聞後終教即求上進此不

殆四

十三

定性鈍中利者爲彼教攝若了法相一切皆空作無生觀雖諸法空不捨一切始教空宗來攝即成真空無相亦但斷所知障若解法相唯心緣起起藏心觀深達實相三無差別性宗實教來攝即成真如實相漸斷二障種子若達法相是理實性起真性觀了諸法相在在寂滅性宗頓教來攝即成常寂滅相頓斷二障習氣若明法相普融無盡作圓融觀法法遍周事事無礙性宗圓教來攝即成無盡法界相圓斷二障現種習氣自終教來皆

名利根具直等超亦復不定○次空又聞大乘真空無相即解其空超諸有苦起六行觀止惡行善求現未樂此亦落前人天乘教即成世間有漏法空但曉斷空不達理空若知真空無我我所作苦空觀厭患無常住於滅道此亦落前二乘小教即成出世無漏生空滅界內分段死然此二根亦復有二一不回即前定性等二直往法爾有者故此無相亦爲增潤若悟真空無諸法相起三空觀亦爲衆生不着相施此成大乘空宗始教對後諸教亦名鈍根但成一味真空滅界外變易死此亦有二一回心即前不定性人二直進自有此類種性二中又二一經後三教二教後得圓果亦名定性鈍中鈍者爲今教攝二過後終教即便轉入名不定性鈍中利

者彼教來攝若識真空唯遮境有起八識觀
捨二我執自覺覺他分教相宗來攝即成二
無我空亦但斷變易死若達真空但是一心
作一心觀隨諸性起成就自他終教來攝即
成緣起性空斷亦分亦變生死若悟真空性
本離言作法性觀從無本處化諸眾生頓教
來攝即成無生性空斷非分非變生死若了
真空理實法界作無礙觀一多即入同時具
足圓教來攝即成第一義法界空斷界內界
外二種不思議無盡生死自終教來皆名利
根具直等超亦復不定○三結
例
然始分中所攝入人上根者十信三賢時中
根者四加見道時下根者修道無學時隨其
解行權實轉入後三教也能攝入教約似位
終頓圓十信已還真位終頓圓初住已上皆

論四

十四

能引進三乘入於後三教也餘準前知○終三

教機益三
初機教

三終教中所益機宜亦不離乎五性三乘中
亦有二一者前來二者現進同於妙智涅槃
會上見受用身佛住受用土隨彼多少時分
廢權立實聞說藏心緣起之法○二攝
益△若
聞如來藏心即識藏心體是六識起六行觀
背染向淨作有漏福此亦落前人天乘教猶
稱在纏性淨藏心不得出纏離垢淨故若知
藏心唯一意識作苦空觀永捨貪欲除諸事
死四
十五
障此亦落前二乘小教即入空如來藏成無
我無形覺知菩提若達藏心乃阿賴耶作唯
識觀轉染依淨成於四智此亦落前相宗分
教若解藏心心如幻夢作真空觀滅諸識想
斷所知障此亦落前空宗始教是二教人皆

入不空如來藏成無染無起正覺菩提上四
人中皆有二類一者回心即前教內定不定
性二者直往現在法爾有此四性故此藏心
爲彼助潤若悟藏心隨緣不變作唯心觀體
用常熏法身顯現此成大乘性宗實教對後
頓圓亦名鈍根但入亦空亦不空如來藏成
無常亦無斷正遍知菩提此亦二種一者回
心即前教中定不定人二者直往現入終教
有如是人二中又二一者直至圓教後入法
界即歷頓教亦終實攝此則名爲鈍中鈍者
二者遇後頓教或回向頓或轉入圓彼教來
攝此則名爲鈍中利者若解藏心性本寂滅
起一性觀泯絕無寄成自覺境頓教來攝即
入非空非不空如來藏成無作聖所行上妙
正遍知菩提若了藏心總該萬有起帝網觀

該因徹果證十玄門圓教來攝即入俱無障
礙如來藏成無盡法所依無上正遍知菩提
從頓教後名爲利根具直等超亦復不定○
三結 △然終實中所攝入人上根者十信時
中根者三賢時下根者十聖時隨其解行勝
劣轉入後二教也能攝入教約似位頓圓十
信已下真位頓圓初住已上皆能引入於頓
圓也○四頓教機益
二初機教 四頓教中所益機宜中有二類一者前來五
乘性也二者現進有無性也同於圓覺楞伽
會上見法性身佛住法性土隨彼廣狹時分
斥權讚實聞說真性寂滅之法○二攝 △若
聞真如法性即解真性是六識性起欣厭觀
改惡遷善求人天報此則落前人天乘教還
住本有真性未成圓明性故若悟真性是偏

真性起生空觀斷見思惑得人無我此則落
前二乘小教即入我空真如法性成小乘淨
智若識真性是唯識性作唯識觀遠離遍計
入圓成實此則落前相宗分教若達真性是
真空性起無相觀滅一切有入三無性此則
落前空宗始教是二教人皆入法空真如法
性成大乘一切智若知真性是緣生性起藏
心觀背塵合覺入如來藏此則落前性宗終
教即入不空真如法性成大乘正遍智上五
人中皆有二類一者回心即前教中定不定
者二者直往即現教中進此種性故此真性
爲彼助潤若了真性是無生性作法性觀離
能所取如實而住此成一乘頓教對後圓教
亦名鈍根但入離言真如法性成一乘不動
智此亦二種一者回心即前教內定不定性

結四

十七

二者直往現進頓教有如是者二中又二一
者聞後圓教猶滯於頓待行證盡然後歸圓
此則名爲鈍中鈍者二者一聞圓教即入於
圓此則名爲鈍中利者若達真性是法界性
作十玄觀妄盡還源性性無盡圓教來攝即
入一法界大總相真如法性成一乘不思議
智對本頓教此名利根○三結△然頓教內
所攝入人上根者十信時中根者地前時下
根者地上時並能回頓向圓也能攝入教似
位圓信真位圓住皆能以圓引頓也○五圓
益三初
機教
五圓教中所益機宜亦有二類一者前來三
五乘也二者現進有無性也同於法華華嚴
會上見無盡法界身佛住無障礙法界土隨
彼一切非一切時分會權顯實聞說法界無

盡之法○二攝益

△若聞圓融法界即解法界

是世間法起欣厭觀捨諸惡業快得善利此則落前人天乘教還住在纏性淨法界未得出陣圓明故若識法界是出世法起諦緣觀厭老病死盡諸苦際此則落前二乘小教即證無爲法界歸清淨無際性若了法界是百法門起法相觀專心佛道修種種行此則落前相宗分教若悟法界是十八空起破相觀心無所著求無上慧此則落前空宗始教是二教人俱證有爲法界歸無邊不失性若達法界是二門義作緣性觀了諸緣起求最上乘此則落前性宗終教即證亦有爲亦無爲法界歸無量隨順性若了法界是一心性作空性觀安住法性猶如虛空此則落前性宗頓教即證非有爲非無爲法界歸一性無斷

性上六人中皆有二類一者回心即前教內定不定性二者直往即現教中進此種性故此法界爲彼助潤若知法界是十門起主伴觀盡無盡界說法利生此成圓教若對前教前皆名鈍唯此爲利能證無障礙法界歸無限莊嚴性此亦二種一者回心即前教內定不定者二者直往現來圓教有如是者○三問△問上之六人何時入圓答遲速各異終必歸圓所以者何金剛種故佛無捨改終省悟故皆住性故圓爲極故其餘超相及攝入義例前可知○五總爲釋通二初隨難解釋三先解釋立敬妨難六初人問教中爲何不立人天乘耶答以無斷證階位等殊故不別立爲教乃是漸入小乘方便故在小教中收問後機益中何又開耶答世

出世間法益不同故於小前重明其教乘也

○次小△問聲聞四諦教行立四向果唯斷

正使與緣覺因緣教行不立分果兼侵習氣
行相各別云何合爲一教耶答教行雖別理
果是同同證生空理故同得有餘無餘涅槃

指四

十九

果故斷位雖殊名智是一並成盡智無生智
故並名爲小乘故去異取同故合一也又諦
緣開合教亦同也同生空觀同斷見思同得
小果則行斷果盡無別也故佛在世將緣覺
乘攝屬聲聞名聲聞藏半字小乘由此不別
分也問此與天台藏教何別答彼藏教者爲
有事六度菩薩故今小教者不收菩薩以事
六度分教攝故問何以疏家並云小教即是
天台藏耶答小教所攝法門不異於彼故指
同也問既不異彼何無菩薩答法相雖同義

意各別何者爲欲引小將大乘義復淺說之

似彼小乘理實二乘無分唯始教有故此小

教無菩薩也問小不收大可爾小乘三藏則

同何又改藏轉名小耶答彼立藏名多招難

故今立小乘則無濫涉大乘失也○三始△

問破相始教說乾慧等十地立相分教明資

糧等五位空教斷見思證真空相教斷二執

證真如如是等相皆別何不分爲二耶答十

五地位雖殊見修道相是同况皆許三乘共

一斷證階位亦無別故何可分二又見思執

障似異見斷分別修斷俱生不殊就煩惱障

即是界內見思所知障即是界外見思乃至

真空真如無非二無我理是等皆同故合一

也問此始分教與性相二宗同耶異耶答少

有不同彼分爲二性中合空今判爲三性中

開空空與相宗同許定性無性皆不成佛故
立爲初教性宗唯顯一乘盡得成佛故立爲
終教問云何判一性宗爲始終二耶答義有
權實故經有正兼故相則密意依性說相空
則密意依性說空皆非了義權也性則直顯
中道法性方名了義實也相則正深密兼方
廣性則正妙智兼般若深密說相般若談空
始分也妙智顯性終實也由此分二問空性
既別云何彼宗合爲一耶答彼以般若妙智
教部是一同故況相宗立相而彼宗談空顯
性皆不立相故合一也問相宗深密三時中
二時明空皆許成佛三明不空有成不成性
宗妙智三時中二明不空有成不成三時明
空皆許成佛若爾云何約義分教相耶答約
說經時先般若明但空理亦許定性俱不成

略四

二十

佛兼顯真空法性及一乘盡成佛義次深密
明法相理說定性等俱不成佛後妙智明真
空法性中道說無性等盡得成佛般若深密
即相宗家二三時也深密妙智即性宗家二
三時也今依深密第二三時及妙智第二時
中明但空法相有不成義判爲始分依妙智
第三時中明法性空盡成佛義判爲終實況
今家立教正約法義不但據時義則一經容
有多教權實頓彰時則前後有定不定始終
難辨餘如別說○四終△問性宗終教所立
略四三時五位等法亦同相宗分教云何別開爲
一答相宗時教意以一乘爲權三乘爲實性
宗時教意以三乘爲權一乘爲實相宗五位
依諸法相前後迢然性宗五位依一法性而
顯階降乃至起行伏惑斷障皆異不同故別

立也○五頓教△問頓教唯辨一性不立斷證

階位云何別分爲一教耶答以無位之位爲此教之位不同前漸不同後圓故別分也問何前頓中亦明斷證答爲對前後明優劣故亦即顯頓無位而位位而無位離言旨故問

天台四教皆有絕言四教分之故不立頓今者別立有何義意答天台不立者以彼四教中皆有一絕言並令忘詮會旨故耳今乃開者爲顯前四絕言之外復有頓詮言絕之理別爲一類離念之機不有此門逗機不足故

又此頓教亦非天台圓即頓義○六圓教△問

華嚴疏云一乘有二一同教一乘同頓同實故二別教一乘唯圓融具德故既同頓實何異頓實而別立一圓教耶答即此同中必有別義如事理無礙必即事事無礙耳猶彼江

水入海亦鹹以別異同立圓教也況前之四

教不攝於圓圓必攝四如百川不攝大海大海必攝百川斯則前四是局圓教是通通局相異何可合耶問既一圓教分同別者應成二教而爲六耶答雖分同別但是一教由揀

收義有二門耳由別教故迥異餘宗由同教

故普收一切故成五也○二解釋名義妨難

問昔有說言此之五教與天台四教但開合有異而大況是同然歟否歟答既云大同不無小異理實無同無不同以此五教所詮義理不唯同於天台亦且同於諸宗此約總相會通也若果盡同何須更立此約別相明也細審可知問五教名義憑何聖典答向引教證即所憑也今再陳之小乘愚法教如阿舍俱舍大乘始終二教如法鼓經中以空門爲

始不空門爲終彼云一切空經是有餘說唯
有此經是無上說一乘頓教如寶積經說爲
頓教修多羅心地觀經名爲頓悟法門又上
始終二教通名爲漸所有解行並在言說因
果階位從微至著故此一乘教敵名爲頓言

拾四

二二

說頓絕理性頓顯解行頓成佛果頓證故圓
覺經云是經名爲頓教大乘頓機衆生從此
開悟亦攝漸修一切羣品楞伽云漸者如菴
羅果漸熟非頓頓者如鏡中像頓現非漸一
乘圓教如華嚴云爲善伏太子所說名爲圓
滿修多羅等故立此五名也問散說可爾一
典是何答採集衆典義理盡故若欲指者經
論共五一楞伽頌出總名魏云迦葉拘留孫
拘那含及我離於諸煩惱一切名正時過彼
正法後有佛名如意於彼成正覺爲人說五

拾四

二二

法唐云迦葉拘留孫拘那含牟尼及我離塵
垢皆出純善時純善漸減時有導師名慧成
就大勇猛覺悟於五法二譯皆云五法即此
五種教乘法也五佛咸說千佛亦然三世既
爾十方皆然則佛佛無不唱此五教法也故
今判立五教名義二起信論等出別義初起
信論云爲二乘鈍根故如來但爲說人無我
小教義也論云復次真如依言說分別有二
種一者如實空以能究竟顯實故二者如實
不空以有自體具足無漏性功德故如實空
始教義也如實不空終教義也論云從本以
來離言說相離名字相故名真如以一切言
說假名無實但隨妄念不可得故上之二種
依言真如漸教義也此之絕言真如頓教義
也論云心真如者即是一法界大總相法門

體圓教義也次華嚴賢首品云一切世界羣生類𡵚有欲求聲聞乘求緣覺者轉復少求大乘者甚希有求大乘者猶爲易能信此法甚爲難又第九地偈云若衆生下劣其心厭沒者示以聲聞道令出於衆苦若復有衆生

諸根小明利樂於因緣法爲說辟支佛若人根明利有大慈悲心饒益諸衆生爲說菩薩道若有無上心決定樂大事爲示於佛身說無盡佛法聲聞辟支小教也大乘菩薩始終頓也此法無上佛乘圓教也三法華即火宅四乘臨門三車中羊車鹿車二乘小也第三牛車大乘始終頓也四衢等賜大白牛車一乘圓教也四大乘同性經云聲聞法辟支法菩薩法諸佛法皆悉流入遮那智海聲聞辟支小教也菩薩始終也佛法頓也智海圓也

畧引如斯具如餘說○三解釋分
判妨難

問古云不分教相意畧有五理本一味殊途同歸故二一音普應一兩普滋故三原聖本意唯爲一事故四隨一文衆解不同故五多種說法即成枝流故以斯五義故不可分分之乃令情構異端是非競作故以不分爲得若爾云何今又分耶答古分教者亦有多義一理雖一味詮有淺深故須分之使知權實故二約佛雖則一音一兩就機差而教亦別故三本意未申隨他意語而有異故四言有通別就顯說故五由辨權實不住枝流善會佛意有開顯故六王之密語所爲別故七不識權實以深爲淺失於大利以淺爲深虛其功故八莊嚴聖教令深廣故九諸聖教中自有分故十諸大菩薩亦開教故以斯多

義開則得多而失少合則得少而失多但能
虛已求宗不可分而分之亦何爽於大旨故
今分之○二通會諸教
二先問難

問諸德立教各自有據或有合爲二三或有
開爲六七今判爲五是何意耶○次答通三
先正出所

以△答立五教者有多義意一釋尊說法開

五乘故二諸佛利生多五行故如涅槃經約
教病行小也現諸障相故嬰行始也示修善
相故聖行終也佛之所行故梵行頓也修十
一空故天行圓也第一義天故三世出世教

並用五故世教如五常出世如五戒又父子
有親君臣有義夫婦有別長幼有序朋友有
信亦世間五教也爲毀說戒爲貪說施爲癡
說慧爲疑說信爲懈說聞亦出世五教也四
衆經論中常明五故如五語五身五眼五根

五行五法等五結集法藏類成五故謂小乘
三藏之外加一雜藏及菩薩藏也六乘教相
攝唯有五故謂判五教中含二意一以乘攝
教謂小乘愚法教大乘始教終教一乘頓教
圓教二以教攝乘謂小教二乘始教終教三
乘頓教圓教一乘故教義云初一即愚法二
乘教後一即別教一乘中間三者有其三義
一或總爲一謂三乘教二或分爲二所謂漸
頓三或開爲三謂於漸中開出始終二教若
乘教相攝者亦二先一乘一別教一乘二同
教一乘圓也三絕想一乘如楞伽頓也四佛
性平等一乘如涅槃終也五密義意一乘如
攝論八意等始也小也次三乘一小乘中三
謂始別終同以俱成羅漢故二始教中三始
終俱別以有入寂不入寂故三終教中三始

終俱同並成佛故四頓教中三始終俱離無
佛無不佛故五圓教中三始終俱圓汝等所
行是菩薩道同入一乘究竟故七行位理等
五無多故謂五位中修真如觀證法界性小
則淺於大大則勝於小分則待於實實則全
於分始則餘於終終則盡於始漸則歷於頓
頓則泯於漸偏則歸於圓圓則融於偏是知
斷證唯此五耳無剩義也八會通諸說五爲
盡故謂諸德分判或多或少或少則不足多則
枝蔓今家取中會爲五教庶於教理不容餘
議矣○次別爲會通
二初總標△然雖立五若融通之
亦可合爲一二開爲七八蓋由聖教意趣無
邊不可局執而爲其是故今遍收諸釋且畧
勒爲五重○次別釋五一
總合爲一△初或總合一名
爲一圓音教謂圓教攝於前四前四一一同

七四

二六

圓本末鎔融如海中百川故一代之教唯是
如來一大善巧攝生方便一音所演則不違
流支羅什二師立一音也○二別開
爲二△二或
別開二此更有四一對小顯大初是半字後
四皆滿則不違曇牟慧遠二師聲聞菩薩藏
也二對權顯實前二是三乘後三爲一乘則
不違信行禪師三一也三對三顯一前三是
漸後二是頓則不違護延二師漸頓也四對
末顯本前四是曲巧順機後一乃直顯本法
則不違印敏二公屈曲平道教也○三別開
爲三
△三或分爲三此亦有四一初二乘教次
一三乘教後三一乘教三四泯二異前存三
故則不違戒賢深密三教及真諦玄奘三輪
教也又可初一小乘教次三大乘教亦名共
教大品等經共二乘說故亦名偏教偏於漸

七四

三

頓故後一一乘教亦名不共教華嚴等經不
共二乘說故如智論明亦名圓教圓融無礙
故梁論云如來成立正法有三種一立小乘
二立三乘三立一乘第三爲最勝故名善成
立則不違智光妙智三教也二初三名漸教
次一不定教後一名頓教則不違南北諸師
漸中諸教開合不同或分爲二小即半字教
始終即滿字教此同菩提流支說也或分爲
三小即有相教始即無相教終即常住教此
同武丘岌師說也或分爲四小即有相教始
即無相教終即同歸教常住教此同宗愛旻
岌師說或分爲五小即有相始即無相分即
抑揚終即同歸實即常住此同定林柔次慧
觀等師說也又小即人天有相始即無相終
即同歸常住此同劉公說也三初三名漸教

次一名頓教後一名圓教則不違光統三教
四初四名枝末教同教名攝末歸本教別教
名根本教則不違吉藏師立也○四別開△爲四
四或分爲四此亦四門一初名別教小乘如
四阿含等二名同教三乘如深密般若等三
四名同教一乘如法華圓覺等五名別教一
乘如華嚴經中間三教始分存三是同終頓
泯二是同故各一也則不違光宅海東四乘
矣二初名小教二三名漸教四名頓教五名
圓教此約歷位無位故開漸頓爲四則不違
大衍四宗矣三初名小乘教二中始名無相
教分名法相教三四五名法性教則不違天
台四教矣四初名小教二名權教三四名實
教五名圓教則不違生公四輪矣○五別開爲五
△五或分爲五此有三門一如前所立以漸

中有始終故亦不違波頗三藏立五教也二
初名小乘教次名大乘相教三名大乘無
相教四名一乘真性教五名一乘圓融教則
不違護身五宗教矣三若依五乘分教亦可
初名人天因果教次名二乘斷滅教三名大
乘法相教四名大乘破相教五名一乘顯性
教此如圭山原人論說○三總顯△又此五
教隨一相收中有二門一以本收末門謂於
圓教內或唯一圓教以餘相皆盡故或具足
五教以攝彼方便故頓教中或唯一頓教亦
以餘相盡故或具足四教亦以攝方便故熟
教中或一或三初教中或一或二小乘中唯
一皆準上知之二以末歸本門謂於小乘內
或一以據自宗故或五以後四教皆有爲方
便故初教中或一是自宗故或四謂於後三

殆四

三九

教皆有作方便故熟教中或一或三頓教中
或一或二圓教中唯一皆準上知之是則諸
教本末句數結成教網大聖善巧長養機緣
無不周盡故華嚴云張大教網下生死海漚
人天魚置涅槃岸此之謂也

賢首五教儀卷第三

音釋

薩迦耶

此云身見謂於五蘊退音豆投也合也

留孫

此云所應斷又拘那含牟尼此云金

金構

音姑牽蔓音慢延長也勒音肋絡也絡其

羅什

具云鳩摩羅曇牟具云曇牟識或云

中印
度人旻民漉
音六
撈也

賢首五教儀卷第四之一

殆五

清浙水慈雲沙門灌頂續法集錄

○四六宗二
初總標

言六宗者一隨相法執宗二唯識法相宗三真空無相宗四藏心緣起宗五真性寂滅宗

殆五

六法界圓融宗一隨相法執宗者謂一切我法中起有無執故即小乘諸師依阿含緣生等經造婆沙俱舍諸部論等○二別釋三先

一法執宗

二先總

於中又六○後別六一
我法俱有

一我法俱有宗此中有二一入天乘二小乘謂犢子法上賢胄正量密林山部等彼立三聚法一有爲聚法三無爲聚法二非二聚法初二法是法後一是我又立五法藏一過去二現在三未來四無爲五不可說藏此即是我

以不可說是有爲無爲故然此一部諸部論師共推不受呼爲附佛法外道以諸外道所計雖殊皆立我故○二法有我無

二法有我無宗謂薩婆多上座多聞等彼說諸法二種所攝一名二色或四種所攝謂三世及無爲或五種所攝謂一心二心所三色四不相應五無爲故一切法皆悉實有於諸法中並不立我以無我故異外道計又於有爲之中立正因緣以破外道邪因無因然外道見雖有九十五種或計二十五諦從冥生等或計六句和合生等或謂自在梵天等生或謂微塵宿作等生或執時方虛空等而爲世間及涅槃本統收所計不出四見謂數論計一勝論計異勒沙婆計亦一亦異若提子計非一非異若計一者則謂因中有果若計

異者則謂因中無果三則因中亦有無果四則因中非有無果餘諸異計皆不出此雖多不同就其結過不出二種從虛空生即是無因餘皆邪因然無因邪因乃成大過謂自然虛空等生應常生故以不知三界由乎我心

從癡有愛流轉無極迷正因緣故異計紛然安知因緣性空真如妙有耶廣明異計如瑜伽顯揚婆沙中百金七十論等○三法無去來

三法無去來宗謂大眾說轉鷄亂制多西山北山法藏欽光部等唯說現在諸有爲法及

無爲法耳以過未之法體用俱無故○四現實

四現通假實宗謂說假部就前現在有爲法中在五蘊爲實在界處爲假隨應諸法假實不定其成實論未經部師即是此類○五俗妄真

殆五

二

實

五俗妄真實宗即說出世部等謂世俗法皆假以虛妄故出世法皆實非虛妄故○六諸名

六諸法但名宗即一說部等謂一切我法但

有假名無實體故○二法相宗

二唯識法相宗者謂一切諸法皆唯識現故即無着天親依方廣深密等經造瑜伽唯識

論等○三無相宗

三真空無相宗者謂一切諸法皆空無相故

殆五

即提婆清辯依般若妙智等經造百論掌珍

論等○四緣起宗

四藏心緣起宗者謂一切諸法唯是真如隨緣具恒沙性德故即堅慧馬鳴依勝鬘涅槃等經造寶性起信論等○五寂滅宗

減宗

五真性寂滅宗者謂相想俱絕直顯性體故
即馬鳴龍樹依楞伽般若等經造真如三昧
智度論等○六圖融宗

六法界圓融宗者謂無盡法界如因陀羅網
主伴重重圓融無礙故即龍樹天親依華嚴

等經造不思議十地論等○次別爲揀會二初詳揀諸宗以

除溫二先統就能宗義有判揀淺深

然此六宗後後深於前前初一唯小乘後五
唯大乘次即相宗三即空宗四五六即性宗
初即小教二三即始教四即終教五即頓教

六即圓教又第二亦名二諦俱有宗謂勝義
諦理真實故不無世俗因果不失故是有如
深密瑜伽等第三亦名二諦俱空宗謂無爲
勝義離相故非有有爲緣生如幻故是無如
掌珍頌云真性有爲空如幻緣生故無爲無

有實不起似空華等即般若三論中一分之

義第四亦名二諦無礙宗謂真是即俗之真

俗是即真之俗如仁王等第五亦名二諦混

絕宗謂語真必攝俗故真絕言俗必攝真故

俗絕如維摩等第六亦名二諦無盡宗謂真

即俗而真空重重無際俗即真而俗有歷歷

不窮如華嚴經等○次逐約所詮法相對揀同異二先總標

若恐混濫逐爲對揀略開八重○次別釋八初料揀性

相兩宗濫

先料揀性相兩宗濫中又五義初唯識半分

具分別相宗八識唯約生滅即半分也性宗

生滅與不生滅和合而成阿梨耶識是具分

也又相宗云影外有質爲半頭唯識質影俱

影爲全頭唯識若望性宗如來藏心則彼全

頭生滅八識亦名爲半頭也二真如隨緣凝

然別相宗唯識論釋真如云真無虛妄如無變易若隨緣變豈稱真如凝然義也性宗勝鬘經云依如來藏有生死依如來藏有涅槃隨緣義也三緣境斷惑即離別相宗謂根本智雙觀真俗能斷迷理迷事隨眠後得智唯

殆五

觀事境但斷迷事一種隨眠離也性宗謂智體惑體無二體故涅槃云明與無明其性無二故能一斷一切斷即也四證理能所即離別相宗謂能證根本智是有爲所證真如理是無爲就能所證心境相對是不即也性宗謂理智不分能所混融華嚴云無有智外如爲智所證亦無如外智能證於如二既不存一亦奚立故能一證一切證是不離也五轉智不轉智別相宗謂出世四智心品依生滅識種轉成故爲四相所遷性宗謂世出世智

殆五

五

依如來藏性始本不二何待轉成即體之智非相所遷○二料揀空性兩宗濫

次料揀空性兩宗濫中亦五義一我法有無別空宗有我爲妄無我爲真般若云如來說有我者即非有我而凡夫之人以爲有我性宗無我爲妄有我爲真涅槃云無我者名爲生死有我者名爲如來二法義真俗別空宗俗諦爲法真諦爲義如智論說性宗真諦爲法俗諦爲義華嚴云法者知真諦義者知俗諦三心性二名別空宗一向目諸法本源爲性智度論云色色性空掌珍論云有爲性空緣生如幻楞嚴云識性虛妄猶如空華性宗多分目諸法本源爲心勝鬘云自性清淨心起信云一切法唯是一心楞嚴云諸所緣法唯心所現四真智真知別空宗以有分別爲

知無分別爲智真智了空故智深知淺性宗以證聖理爲智徹聖凡爲知靈知本有故知通智局起信云真如自體真實識知五佛德空有別空宗說佛以空爲德般若云離一切相即名諸佛色見聲求皆爲邪道性宗明諸佛富有萬德相好身智神通光明常樂我淨真實功德於佛體中一一無盡性自本有不得機緣如起信涅槃中說○三揀空相與性宗濫三料揀空相兩宗與性宗濫亦五義別一三乘一乘別空相二宗明有三乘以深密第三時中具說三乘普爲發趣一切乘者第二時諸部般若亦同此說性宗明唯一乘法華云十方佛土中唯有一乘法妙智經及梁攝論皆同此說二五性一性別空相兩宗明有五性大般若云於聲聞乘性決定者聞此法已

速能證得自無漏地於獨覺乘性決定者聞此法已速依自乘而得出離於無上乘性決定者聞此法已速證無上正等菩提於彼三乘性不定者聞此法已皆發無上正等覺心深密有性者成無性不成意亦同此性宗明唯一性涅槃云一切衆生同有佛性皆同一乘三生佛不增減別空相二宗皆云五種性中無種性人決不成佛守衆生界名不增減十輪云三乘各定差別皆以性定五故善戒地持說二種性無種性人終不能得菩提但以人天善根而成熟之性宗謂一理齊平名不增減是故不增不減經云愚癡凡夫不如實知一法界故不能實見一法界故起邪見心謂衆生界增衆生界減四成佛不成佛別空相二宗明有不成佛深密云一切趣寂聲

聞種性雖蒙諸佛種種方便終不能令證佛
菩提大般若五百九十三中說有五性大意
同此性宗謂決定盡得成佛密嚴云二乘必
無灰斷涅槃槃云一切衆生皆有佛性凡
是有心定當作佛五同位不同位別空相二

釋五

七

宗爲引愚法二乘漸向大故故位相與彼同
大品明三乘共十地立乾慧等唯識亦許三
乘斷證階位大同即資糧等性宗約自教論
深勝於彼故斷證位相與彼懸隔故彌勒所
問經論云一切聲聞辟支佛不能如實修四

無量不能究竟斷諸煩惱但能折伏一切煩

惱等斷證既爾地位準知○

四揀空性
與相宗濫

四料揀空性兩宗與相宗濫亦五義別一立
相顯性別相宗多談法相縱少說性亦法相
數如無爲有六種等是立相也空性二宗多

明法性縱少說相亦會歸性但空宗空性無
性性宗真性實性如金剛三昧及起信中說
六度行即一法性等是顯性也二唯心真妄
別相宗依生滅八識建立染淨根本唯識云
等流習氣爲因緣故八識體相差別而生名
等流果果似因故異熟習氣爲增上緣感第
八識酬引業力恒相續故立異熟名感前六
識酬滿業者有間斷故名異熟生從異熟起
不名異熟即前異熟及異熟生名異熟果果
異因故攝論云無始時來界一切法等依由
此有諸趣及涅槃證得即唯心中妄也空宗
般若云色不異空空不異色受想行識亦復
如是楞嚴云如來藏中性色真空性空眞色
水火風識亦復如是性宗起信云依如來藏
有生滅心楞伽云藏識海常住旣言常住即

藏心也明非唯生滅矣故通唯心中真也三
二諦即離別相宗明離瑜伽四重二諦中初
一世俗唯局世俗後一勝義唯局勝義中間
六諦各通世俗勝義何者望前爲勝義望後
爲世俗一一差別區分不同故不即也空性
二宗明即中論云定有則着常定無則着斷
掌珍論云真性有爲空無爲無起滅有與有
爲俗諦也無與無爲真諦也仁王云於解常
自一於諦常自二通達此無二真入第一義
涅槃云世諦者即第一義諦故不離也四四
相一時前後別相宗明前後謂前生住異三
相屬現在後一滅相屬過去先有後無相差
別故空性二宗顯同時般若云過去不可得
現在不可得未來不可得既三世皆空何有
不即起信云四相俱時而有皆無自立本來

殆五

八

平等同一覺故五佛身有爲無爲別相宗說
佛身有爲佛地論云大覺地中無邊功德略
有二種一者無爲功德淨法界攝二者有爲
功德四智所攝唯識云四智心品總攝佛地
一切有爲功德皆盡空性二宗明無爲般若
云如來說三十二相即是非相須菩提言如
我解佛所說義無有定法名阿耨菩提亦無
有定法如來可說所以者何一切賢聖皆以
無爲法而有差別淨名云佛身無爲不墮諸
數涅槃云如來真實是無爲法○
五料揀性相空三宗濫亦五差異一遮揀表
顯異相宗唯表如深密等三種時教五重觀
法斷二障證二空轉八識成四智五位百法
皆依法相而示唯識乃名方便密意依性說
相教也空宗唯遮如般若等破五蘊非四諦

殆五

九

五揀性相
空三宗濫

空業空報無證無修生死涅槃猶昨夢凡夫諸佛等空華八十一科皆約破相而示空理乃名方便密意破相顯空教也性宗有遮有表說一切衆生皆有寂滅靈知之心以此一真心性對彼染淨諸法全據全收全揀之非生非佛非性非相但尅體直指寂滅靈知即是心性餘皆虛妄故華嚴云非識所識亦非心境知性本淨開悟羣生楞伽云寂滅者名爲一心全收之染淨諸法無不是心如鏡現影影皆鏡故華嚴云知一切法即心自性起信云三界虛偽唯心所作全據門攝前破相全收門攝前立相如是收揀一切並皆直指自心即是真性不約事相而示亦不約破相而談又非方便隱密之意故此乃是正直顯示真心即性教也二諦理多少異相宗明

八諦瑜伽謂世俗有四一世間二道理三證得四安立即假名無實隨事差別方便安立假名非安立四諦也勝義有四一世間二道理三證得四勝義即體用顯現因果差別依真顯實廢詮談旨四諦也空宗所說世出世間一切諸法不出二諦仁王般若云有無本自二譬如牛二角照解見無二二諦常不即餘如掌珍中論等說性宗明三諦以緣起色等諸法爲俗諦緣無自性即空爲真諦一真心實相體非空非色能空能色爲中道第一義諦仁王云以三諦攝一切法空諦色諦心諦故我說一切法不出三諦餘如纓絡大品本業等經所說或明一諦如楞嚴云故我今時爲汝開示第一義諦又云大威德世尊善爲衆生敷演如來第一義諦仁王云初住一

心足德行於第一義而不動第一義諦常安
隱窮源盡性妙智存金剛三昧云大慈滿足
尊智慧通無礙廣度衆生故說於一諦義皆
以一味道終不以小乘餘如涅槃等說三真
妄空有異相宗真有妄空謂入諦中初俗則

第五

空遍計執故後三世俗及四真諦皆有依圓
有故空宗真空妄有仁王云法性本無性第
一義空如諸有本有法三假集假有性宗真
妄俱空第一義空該通真妄故涅槃云第一
義空者不見空與不空仁王云般若無相二
諦虛空或空有無礙真非俗外即俗而真故
仁王云解心見不二求二不可得非謂二諦
一非二何可得梁論亦云智障甚盲瞋爲真
俗別執中論云因緣生法即空假中四三性
空有即離異相宗遍計是空依圓是有唯識

第五

十二

頌云遍計所執自性無有依他起性分別緣
生圓成於彼常離前性故此與依非異不異
又明三法皆有性也空宗遍依是有圓成是
空密嚴頌云名爲遍計性相是依他起名相
二俱遣是爲第一義又明三法皆無性也性

宗謂遍計性情有理無依他性相有性無圓
成性情無理有相無性有則三法中皆具空
有也教義云三性各有二義真中二義者一
不變義二隨緣義依他二義者一似有義二
無性義所執中二義者一情有義二理無義
約真中不變依他無性所執理無由此三義
故三性一際同無異也此則不壞末而常本
也經云衆生即涅槃不復更滅又約真如隨
緣依他似有所執情有由此三義亦無異也
此則不動本而常末也經云法身流轉五道

名曰衆生又相宗明依他外別有圓成是所顯理離也空性二宗依他無性即是圓成即也又相宗有空宗無離也性宗空有無礙即也五心境存泯異相宗唯遮境有識揀心空解深密云諸識所緣唯識所現瑜伽論云菩薩於定位觀境唯是心空宗心境俱泯中邊論云以塵無有故本識即不生般若謂五蘊皆空三心不得性宗明存泯無礙密嚴云如來清淨藏世間阿賴耶如金與指鑲展轉無差別華嚴云法性不違法相法相不違法性楞嚴云即一切法離一切相唯即與離二無所著○六揀空宗與頓宗濫六料揀空宗始教與性宗頓教濫亦五差異一直指曲顯異空宗始教密意破相顯性故揀却諸餘是曲顯也如般若等所說真妙理

性每云不生不滅非性非相等是遮揀也無我相無法相亦無非法相等是專意破相也性宗頓教顯說自心即性故的示當體是直指也如圓覺等所說真妙理性每云知見靈覺寂空澄湛等是表示也自性清淨真實識知等是專意顯性也如說鹹云不淡是曲明云鹹是直顯說水云不乾是巧示云濕是的指也二談空顯性異空宗始教不說諸法相唯談但空理般若云是諸法空相空中無色仁王云以衆生空故得置菩提空以菩提空殆五故得置衆生空以一切法空故空性宗頓教總不說空相唯辨真性理圓覺云知幻即離離幻即覺非作故無本性無故起信云當知真如非有相非無相非一相非異相三遣顯存泯異空宗遺相明空空存相泯金剛云

凡所有相皆是虛妄若見諸相非相即見如
來又云應離一切相發菩提心大品云諸法
畢竟空即是涅槃故又云以何義故名爲菩
提空義故是菩提頓教遺迹顯性空相俱泯
淨名云得是平等無有餘病唯有空病空病
亦空楞嚴云了知味性非空非有圓覺云有
無俱遣是則名爲淨覺隨順楞伽云智者不
分別空及與不空自性無自性但唯是心量
五法二無我自性心意識於佛種性中皆悉
不可得四性體本無異空宗以一切諸法無
性爲體智論云從因緣生即無自性無自性
故即畢竟空中論云以有空義故一切法得
成涅槃云因緣故有無性故空頓教以寂滅
靈知本性爲體楞嚴云真淨妙心本來遍圓
如是乃至大地草木蟬動含靈本元真如楞

伽云云何本住法謂法本性如金等在鑛若
佛出世若不出世法界法性皆悉常住圓覺
云衆幻滅無處成道亦無得本性圓滿故故
知性字雖同而其體各異也五認名認體異
謂一切法皆有名體智度論云地水火風是
四物名堅濕煖動是四物體今且以水言之
水名也濕體也清濁凝流冰波功能也心性
亦爾心名也知體也善惡止修迷悟功能也
然濕一字貫彼清等萬義之處此之知體亦
貫善等萬用之中空宗爲對初學及淺機恐
隨言生執故但標心性之名而遮其非或廣
以善等義用而引其意如舉水名或說清濁
等用不指濕體彼愚鈍者亦但認名而迷其
體例同楞嚴七處破心是也楞伽云如來應
正等覺以性空實際涅槃不生無相無願等

諸句義說如來藏如來以種種智慧方便善巧或說如來藏或說爲無我種種名字各各差別金剛三昧云非義語者皆悉空空無空無之言無言於義不言義者皆是妄語如義語者實空不空空實不實頓教乃對久學及上

根令忘言認體故以一言直指當人現前見聞覺知之體令其認得體已方於體上照察真妄染淨義用一旦豁然莫不貫通如指濕體不舉水名及清等用彼利智者亦但認體而捨名用例同楞嚴十番顯見是也彼經須菩提言初在母胎即知空寂蒙如來發性覺真空頓入如來寶明空海同佛知見楞伽云大慧空無生無二離自性相普入一切修多羅凡所有經悉說此義諸修多羅悉隨衆生希望心故爲分別說顯示其義而非真實在

殆五

古

於言說如鹿渴想誑惑羣鹿鹿於彼相計着水性而彼無水如是一切修多羅所說諸法爲令愚夫發歡喜故非實聖智在於言說法華云唯有一乘法無二亦無三除佛方便說但以假名字引導於衆生說佛智慧故○七

據

實宗與同宗蓋

七料揀性宗實教與一乘同教蓋亦五差異一但即不但即異終教談理事相即頓教談理事相泯圓教不唯理事即泯自在而且事即泯無礙法華云如來如實知見三界之相非實非虛非如非異故知實教但即無泯頓教但泯無即圓教泯即全具也二普融不普融異終則空有相即名爲圓融頓則空有相泯亦名圓融然融處狹小猶未普遍圓則不唯具前二融亦且圓具即泯雙存即泯互

殆五

十五

奪存奪無礙三種圓融則此融處方名爲普遍也故法華云此經甚深微妙諸經中寶是法華經藏深固幽遠無人能到涅槃云若苦非苦若有若無若實不實若真不真若滅不滅若二不二如是等種種法中有所疑者今

應認問我當隨順爲汝斷之三真中非真中異空宗無相宗有終教存頓教絕皆偏於邊而非中也縱雙存兩絕名中亦非究竟後之圓教即空即有即存即絕非空非有非存非絕如是遮照同時方爲純真第一圓融中道如楞嚴云即以此心中中流入圓妙開敷從真妙圓重發真妙一切妄想滅盡無餘中道純真法華云疑悔永已盡安住實智中於諸佛所受持佛智開示衆生令入其中涅槃云非虛非實斷一切實而亦是實非生非滅永

斷生滅而亦是滅非相非非相斷一切相而亦是相四漸歷非漸歷異終教雖依如來藏性本覺大智名爲相即而有斷證初後階降是漸歷非圓超也圓教依於諸法實相一切種智一攝一切一切入一因該果海果徹因源是圓超非漸歷也楞嚴云如是乃超信住行向加地等覺圓滿菩提歸無所得頌云銷我億劫顛倒想不歷僧祇獲法身如龍女於須臾頃便成正覺五攝末不攝末異終教依自一教義立爲圓教末圓教攝前四教義立爲終教本法華云如佛爲諸法王此經亦復如是諸經中王涅槃云譬如衆流皆歸於海一切契經諸定三昧皆歸大乘大涅槃經何以故究竟善說有佛性故

賢首五教儀卷第四之一

音釋

婆沙

此云廣解亦云俱舍此翻藏即包攬

音讀小

薩婆多此云說勒沙婆此云苦行

牛也

若提子此翻邪命亦云見提婆樹此云龍也

音讀蟲

動貌

殆五

十六

賢首五教儀卷第四之二

殆六

清浙水慈雲沙門灌頂續法集錄

○八揀同宗
與別宗濫

八料揀性宗一乘同教與一乘別教濫亦五
差異一開顯直顯異同教開顯開前三乘之

殆六

權顯今一乘之實法華云開方便門示真實
相涅槃云譬如耕田秋耕爲勝此經亦爾諸
經中勝如諸藥中醍醐第一善治衆生熱惱
亂心是大涅槃於諸經中爲最第一別教直
顯直顯一乘根本實義無有昔權可對說故

華嚴云此法門名爲演說如來根本實性不
思議究竟法此法門唯爲趣向大乘菩薩說
唯爲乘不思議乘菩薩說如日初出先照須
彌山等諸大山王是則合共爲同不共名別
也二會歸流出異同教是會歸謂三乘咸會

一乘九界同歸佛界法華云本聲聞人在虛
空中說聲聞行今皆修行大乘空義涅槃云
迦葉白言我今始知差別無差別義何以故
一切菩薩聲聞緣覺皆當歸於大般涅槃譬
如衆流歸於大海別教是流出謂若無一乘
本法何有三乘末教如無海本不能流末華
嚴云譬如大海潛流四天下地有穿鑿者無
不得水攝論云無不從此法界流涅槃云譬
如從牛出乳從乳出酪是則全收爲同普揀
爲別也三廢立普容異同教廢立者廢昔轉
照二三之麤味成立還照純一之妙味猶百
川水入海皆鹹法華云正直捨方便但說無
上道十方佛土中唯有一乘法無二亦無三
涅槃云迦葉是大涅槃即是諸佛甚深禪定
如是禪定非是聲聞緣覺行處善男子是諸

大乘方等經典雖復成就無量功德欲比是經不得爲喻別教普容者謂一乘義量無不含容如海深廣包含無外故隨一滴具百川味如大乘同性經云所有聲聞法辟支法菩薩法諸佛法如是一切諸法皆悉流入毘盧遮那智藏大海華嚴普賢三昧品云能令一切國土所有微塵普能容受無邊法界妙嚴品云譬如虛空具含衆像此喻佛身遍含諸法頌云或有國土說一乘或二或三或四五如是乃至無有量此約說教該攝無盡是則混二爲同非混爲別也四圓融無盡異同教明圓融無常即常無我即我三一同源權實不二法華云觀一切法空如實相又復不行上中下法有爲無爲實不實法是法住位世相常住涅槃云譬如一火因所然故得種種

殆六

二

名所謂木火草火糠火麩火牛馬糞火善男子佛道亦爾一而無二爲衆生故種種分別頌云諸佛常轉語爲衆故說麤麤語及轉語皆歸第一義如來今所說種種無量法男女大小聞同獲第一義別教明無盡一一事義各各攝入十法門重重主伴華嚴云若有無上心決定樂大事爲示於佛身說無盡佛法欲具演說一句法阿僧祇劫無有盡而令文義各不同等是則類似名同不類名別也五性具性起異同教顯性具謂一切諸法即是性中本具非由外來若色若香無非中道或佛或生同一乘性如盤中百味藏內七寶暗室什物名園花果法華云無漏不思議甚深微妙法我今已具得十方佛亦然楞嚴云我與如來寶覺圓明真妙淨心無二圓滿而

殆六

三

我昔遭無始妄想久在輪迴今得聖乘猶未究竟世尊諸妄一切圓滅獨妙真常佛告富樓那汝與衆生亦復如是寶覺真心各各圓滿涅槃經云一切衆生即是佛如窮子衣珠貧女舍寶等別教顯性起謂一切諸法全是性之所起法界性外更無別法故得塵塵交徹剎剎融通法法互收事事即入如彼水之變波金之作器風竅爲響彩畫成像圓覺云圓覺自性非性性有循諸性起善男子由彼妙覺性遍滿故根性塵性無壞無雜根塵無壞故如是乃至陀羅尼門無壞無雜如百千燈光照一室其光遍滿無壞無雜華嚴云百千億那由它不可說先住兜率宮諸菩薩衆以從超過三界法所生離諸煩惱行所生周遍無礙心所生甚深方便法所生無量廣大

智所生堅固清淨信所增長不思議善根所生起阿僧祇善巧變化所成就供養佛心之所現無作法門之所印出過諸天諸供養具供養於佛以從波羅蜜所生一切寶蓋於一切佛境界清淨解所生一切華帳無生法忍所生一切衣入金剛法無礙心所生一切鈴網解一切法如幻心所生一切堅固香周遍一切佛境界如來座心所生一切佛衆寶妙座供養佛不懈心所生一切寶幢解諸法如夢歡喜心所生佛所住一切寶宮殿無着善根無生善根所生一切寶蓮華雲一切堅固香雲一切無邊色華雲一切種種色妙衣雲一切無邊清淨梅檀香雲一切妙莊嚴寶蓋雲一切燒香雲一切妙鬘雲一切清淨莊嚴具雲皆遍法界出過諸天供養之具供養於

佛頌云心如工畫師能畫諸世間五蘊悉從
生無法而不造如心佛亦爾如佛衆生然應
知佛與心體性皆無盡若人知心行普造諸
世間是人則見佛了佛真實性若人欲了知
三世一切佛應觀法界性一切唯心造如金

拾六

色世界即是本性彌勒樓閣即是法門勝熱
火聚即是妙智等前性具中猶通理事相本
性具性相融通故後之性起唯局事事全性
成相相如性融故具是事法即理事皆理具
故起是事事攝入理隨事變故又具中無起

蓋內雖全具外猶未起故起必含具以外既
全起內豈不具故則此三義初二稱理名同
稱事名別次一一性名同異性名別統則共
具名同性本同有唯一理故異起名別性自
繁興成事事故餘如別說○

拾六

二略會數
門而例餘
五

上約諸宗各別所據則互相違反若會釋者
亦不相違謂一切諸法既皆真心緣起會緣
無性還即凝然真心始不異本知外無智就
機則三約法則一新薰成五本有無二若入
理雙拂則三一兩亡若依佛化儀則能三能
一教有偏圓同別之殊法無始終淺深之異
是故競執是非達無違諍○後總申開合二
初正示開合
又此六宗可開可合合唯二門第一合成五
宗又四初義中一隨相法執二真空無相三
唯識法相四藏心緣起五圓融具德此如起
信圖覺疏說二中一小乘法執二法相差別
三相想俱絕四性相無礙五圓融具德此如
華立鈔說三義一小乘法執二空相差別三
空相寂滅四緣起無礙五圓融無盡此則不
違護身法師立五宗矣四中一隨相法執二

空有差別三空有無礙四相想俱絕五法界
圓融第二合成四宗亦二初義一小乘因緣
二大乘法相三大乘無相四一乘法性則不
違大行立四宗矣二一中一隨相法執二空有
差別三性相無礙四圓融無盡開有六門第
一開成七宗一隨相法執宗阿含緣生經者
即小乘諸師二唯識法相宗方廣深密經者
即此方慈恩教等三真空無相宗般若妙智
經者如此方肇論師等四藏心緣起宗勝鬘
璉經者如此方南北諸師五真性寂滅宗
楞伽圓覺經者如此方禪教六會歸圓融宗
法華涅槃經者如此方天台教等七普融無
盡宗華嚴經者如此方光統教等此亦不違
者闡立六宗矣第二開成八宗一我法俱有
二無我因緣三因緣但名四唯識法相五真

空無相六藏心緣起七真性寂滅八圓融無
盡此亦如圓覺疏鈔說第三開成九宗又二
初義前七如上八會歸圓融九法界無盡二
義一我法俱有二法有我無三法無去來四
現通假實五俗妄真實六諸法但名七真空
無相八唯識法相九法性真實此則不違慈
恩立八宗矣第四開成十宗亦三初中前六
如上七一切皆空八真德不空九相想俱絕
十圓明具德此如教義章說二中前六亦如
上七三性空有八真空絕相九空有無礙十
圓融具德此如華玄疏說三中前六亦如上
七空有差別八性相無礙九相想俱絕十圓
融無盡第五開成十一宗前六如上七唯識
法相八真空無相九藏心緣起十真性寂滅
十一法界圓融第六開成十二宗前十如上

十一會歸圓融十二重重無盡今取其中故

分爲六宗也○

次別通妨難

問此之六宗何異五教而重辯耶答今此六宗對前五教互有寬狹一宗容有多教一教容具多宗又宗則一宗容具多經隨何經中

殊六

七

皆此宗故教則一經容有多教若局判一經以爲一教則抑諸大乘矣問若各有通局何不得以宗爲教以教爲宗耶答立教分宗各有體式教約佛在世時說意權實有殊宗就佛滅度後人心崇重各別又立教必須斷證

階位等異分宗但明所尚旨趣不同第二第三執法有異故開爲二宗斷證位次不離三道故合爲一教又初宗內二十部別宗可爲六而斷證位不離八輩教則爲一餘諸宗義如立教明故宗與教其旨自有別焉○

五三觀二

初總標

言三觀者一真空絕相觀二理事無礙觀三

周遍含容觀○

二別釋二先別示觀境法義二初正明觀境二先方便二

初標

於中先方便開爲十門○

二釋十一具外緣

一具足外緣謂衣食處衣則蔽形食則支命處則棲身三緣不闕修道無難衣如糞掃三衣或畜百一及畜餘長食如頭陀行乞檀那

送供處如蘭若空閑清淨伽藍等○

二懺除內障

二懺除內障欲修觀行先當如法懺悔宿障

宿障若除法界觀行從是女立如淨器中以諸湯水并雜灰香除去毒蜜後貯甘露又如淨衣汙諸垢膩必須浣淨方可染色然懺有二種一事二理事如方等佛名經等通於萬行理如淨名觀罪性空不在內外等普賢觀

經及隨好品具二種懺觀經中明晝夜精勤禮十方佛即是事懺觀心無心從顛倒想起若欲懺悔者端坐念實相即是理懺隨好品中等衆生界數善身語意業悔除諸障即是事懺觀諸業性非十方來止住於心從顛倒生無有住處等即是理懺事懺除末理懺拔

根○三發
大心

三發大心願經云於佛法中有二徒兒一者不作諸惡二者作已能悔又有二種白法滅除衆障一者慚自不作惡二者愧不令他作今既於三寶前生重慚愧發露先罪斷相續心已作者消除未起者不造障心若滅道心自發故懺障後次明發心發何等心所謂不發人天心聲聞辟支心權乘菩薩心唯依最上佛乘發阿耨菩提心願與法界衆生一時

結六

八

同得菩提此菩提心即是佛心若能發者定成種智若不發者終不能成譬如耕田不下種子既無其芽何處求實然發此心非止一過應當數發令續不斷或因慈心或因悲心或因施心或因慳心或因歡喜或因煩惱或因恩愛別離或因怨憎會合或因善知識或因惡親友或因見佛或因聞法或由供養衆僧或以大悲救苦或佛菩薩教令發心或二乘人教令發心或學他發心或常自發心是故發心名根名枝名葉名花亦名果亦名子

發六

九

四十願皆顯發心相也。若發此心，疾成佛道。故賢首品云：若有菩薩初發心，誓求當證佛菩提，彼之功德無邊際，不可稱量，無與等等。

○四受佛戒

四受持佛戒，謂既發大心，須修勝行。若不修行，願爲虛設。故願之與行，如鳥翼車輪，具足方能翔空致遠。然萬行中，戒禁居先，成就定慧律儀，當首經云：依因此戒，律得生，諸定慧尸羅不清淨，三昧不現前，是故願後應先淨戒。戒有在家出家，在家則三皈五戒，八關十善；出家則聲聞小戒，菩薩大戒，更有薩婆多說三戒，大智度列十戒，涅槃明五支地持出三聚華嚴顯十無盡戒藏，廣則三千威儀，八萬細行，略唯行止二門。故戒經云：一切惡莫作，當奉行諸善，自淨其志，意是則諸佛教能。

敬此者，佛法熾盛，結使滅除，能信此者，心地清淨，法身顯現，能受持者，即入佛位，能聽誦者，福慧頓足。故四分云：有智勤護戒，便得第一道華嚴云：戒是無上菩提本。梵網云：微塵菩薩衆，由是成正覺。○五修勝行二先始二初標

五造修勝行，修行有二：一始二終。先始有三

門○二釋三一捨緣

初捨緣門，義開爲六：一捨惡業，五根緣塵生五欲，身作惡業也；意識亂想起五蓋，心作惡業也；今則外訶五欲，內棄五蓋，名爲捨作惡業。二捨親友在家者，親戚朋友；出家者，門徒知識，皆不追尋，往還斷絕，眷屬尚爾，況於惡律邪見人等，樂親近耶？三捨名利，貪名聞則習學詩文，問荅今古，貪利養則資治生業，工巧技能，今也息學問事，棄生活緣，屏技術務。

即名為捨名利事也。四捨身命大患莫若於有身是故身為苦本。況此身中一切皆是不淨之物。口出唾鼻出涕眼出眵淚耳出垢膩大小便出屎尿身臭如死尸袋惟盛膿血赤白痰癢甚可厭惡。生熟二藏雜穢充滿脾胃。

右六

心肺肝膽腸胃一一皆有微細諸蟲。所謂黑

十

蟲毛蟲熱蟲臭蟲乃至八萬四千戶蟲更有大蟻蚋蟲窟穴身中誰有智慧者而樂着此身。愚人不知猶如廁蟲樂糞無異是故當忘身以求道。莫為身而結業。五捨心念由汝念慮使汝色身種種取像與念相應故捨外身不捨內念未為捨也。昔來所有自他人法是非好惡種種亂識雜思邪計妄想皆悉遣除以念遣念念不可得以心除心心亦不生無念無心名捨心。念六捨此捨上五緣所治妄

殆六

十一

病也。此捨法能治真藥也。五緣既絕此捨亦忘其猶病起藥與病差藥廢能所無寄名捨捨也。○二隨緣

二隨緣門義開為四。一隨捨緣謂還隨前六事而守心不染着。二隨作緣謂凡所作行遠離巧偽虛詐乃至一念亦不令有對彼捨門。此作亦有六重。一具五法門謂欲進念定慧身口樂慕精勤誦念決志善得於法界止觀身行善業也。意識欣習匪懈想念一心巧便於法界止觀心行善業也。二近善知識有

三一外護善知識經營供養善能將護不相惱亂。二同行善知識共修一道互相勸發增進無退。三教授善知識能以禪觀正助法門示教利喜。三求學佛法求佛有七一恭敬求三業虔懇也。二無相求離能所相也。三起用

求身心遍求也四內觀求內求自佛也五實相求內外一相也六大悲求普爲衆生也七無盡求帝網重重也學法有五一讀二誦三持四念五解也若不求佛多諸魔障善根不發若不學法不明止觀道亦不進四調和身息未坐禪前先調食睡調食不饑不飽調睡不節不恣既坐禪後應調身息調身不急不寬調息不澁不滑身息若調次當閉口唇齒相拄舌向上齟齬眼斷外光無令全閉正直端坐切勿搖動五攝伏心意有二一者不令心意馳散若馳散者即當攝來住於正念是正念者當知唯心無外境界心散不正得定無由是故令觀與理相應二者調令浮沉得所若心沉時舉心向上繫念鼻端若心浮時安心放下繫緣臍中若能調適心自安靜障患

不生定道可尅六作此作上五門所起行影也此作法能起心鏡也五門既開此作亦立其猶鏡去影藏鏡懸影現能所全彰名作作也三隨順緣謂凡於順情境下至微少順處皆應覺知不可染受設有利譽稱樂境來當觀法本無生唯心所現自然忍而不喜若此輕賊不離三昧亦不現前四隨違緣謂一切違情境乃至斷命等怨皆應守心歡喜忍受設有衰毀譏苦境來當觀三輪體空唯一法界自然忍而不瞋若此強賊不離聖智何以現前○三成行十六

三成行門謂得前二門成萬行也一成普賢十大願行諸未起者策發令起已起行者持令不退二成六度四無量行以前二門自度度他至無上覺也○後終

後終亦三門初捨緣門即止行唯觀諸法平等一相諸緣皆絕也二隨緣門即觀行還就事中起諸大悲大願等行也三成行門即止觀俱行雙融無礙成無住行真俗境不殊悲智心不別以法界門內無二相故平等性中

樂

三

唯一味故起信云雖念諸法自性不生而復即念因緣和合業報不失雖念因緣善惡業報而復即念性不可得以是義故是止觀門共相助成不相捨離若不雙具則無能入菩提之道

○

六明心境三初正明法界心境二先略明

六詳明心境方便助行既成應須揀正修中若境若智若止若觀若正若邪若因若果設不預知修時錯亂砂鏤金器事可徵也今先明境即以一真法界心爲境但在纏時名性淨法界爲所信境出纏時名最淨法界爲所

證境體即現前知見雖非心非境非佛非生而心境佛生一以貫之法界究竟是故此法界心能攝一切世間出世間法

○次廣引

若以義開有三法界一事二理三無礙華嚴疏云統唯一真法界謂寂寥虛曠冲深包博總該萬有即是一心體絕有無相非生滅莫尋其始寧見中邊迷之則生死無窮解之則廓爾大悟諸佛證此妙覺圓明現成菩提爲物開示不知何以名目強分理事二門而理事渾融無有障礙略爲三門第一事法界第二理法界第三無障礙法界第一事法界者不出色心萬象森羅依正境智相用顯然皆曰事也第二理法界者體性空寂頓絕百非略有二門一性淨門在纏不染性恒清淨雖遍一切不同一切如濕之性遍於動靜凝流

不易清淨恒常二離垢門謂由對治障盡淨顯隨位淺深分十真如體雖湛然隨緣有異如陶冶塵滓鍊磨真金第三無障礙法界者略有三門一相即無礙門二形奪無寄門三雙融俱離性相渾然門今初相即無礙門者

一法界心含真如生滅二門互相交徹不壞性相其猶攝水之波非靜攝波之水非動故二形奪無寄門者謂無事非理故事非事也無理非事故理非理也三融離渾然門者曲有十門一由離相故事壞而即理二由離性故理泯而即事三由離相不壞相故事即理而事存以非事爲事也四由離性不泯性故理即事而理存以非理爲理也五由離相不異離性故事理雙奪迥超言念六由不壞不異不泯故有初事理二界俱存現前爛然可

拾六

十四

見七由不壞不泯不異離相離性故爲一事理無礙法界使超視聽之妙法無不恒通於見聞絕思議之深義未曾礙於言念八由以理融事令無分齊如理之遍一入一切如理之包一切入一故緣起之法一一各攝法界

無盡九由因果法界各全攝故令普賢身中佛佛無盡佛毛孔內菩薩重重十由因果法界差別之法無不恒攝法界無遺故隨一一門一一行位各攝重重故廣剎大身輕塵毛孔皆無有盡以其後一總融前九爲第三渾

拾六

十五

融門也亦融前二不離此門○二通揀教乘心境二初揀

心境二先料揀五教心

衆生稟教者根性有利鈍悟入有淺深致令一心開爲五種一人天二乘教中假說一心實有外境二始教有二初相宗以異熟賴耶

爲一心遮無外境然有三類一相見俱存名

一心二攝相歸見名一心三攝所歸王名一

心此宗與前教俱唯事法界也次空宗以無

相爲一心不唯境空內心亦空以其照見五

蘊皆空無有界處入等法故此則唯明理法

界也三終教即以如來藏藏識名爲一心此

亦有二一攝七識浪歸藏識海故說一心二

總攝染淨歸如來藏故說一心此則兼通無

障礙法界中相即門及渾然門內二三六門

并七分也四頓教以泯絕染淨寂滅無寄性

爲一心此則兼通無障礙法界中形奪門及

渾然門內一四五門并七分也五圓教總該

萬有事事無礙故說一心即是無障礙法界

心也亦有三類一融事相入故說一心二融

事相即故說一心三帝網無盡故說一心此

即全通無障礙法界渾然中後三門也○後

揀八△將此五心略爲二境一倒境謂凡愚

乘境情計之境空有二相相違等即人天二乘教

事識心也二真境謂聖智所得之境有二一

三乘境謂空有不二融通等即三乘始終頓

教藏識心也二一乘境謂無盡緣起具德圓

融等即一乘圓教法界心也○二明△若捨

末取本唯觀後境若攝末歸本二境全觀若

本末圓融二三境中隨一即得全收法界具

足無礙楞伽云真如空實際涅槃及法界種

種意成身我說是心量○三結顯今境體相

所以現前一念知見心中當體具足百萬性

相即空即即遍非一非多而多而一今依

性有觀境起彼緣修觀境故即立此法界心

以爲所緣境華嚴七十一云我以饒益一切

衆生集諸善根助道法時作十種觀察法界
所謂我知法界無量獲得廣大智光明故我
知法界無邊見一切佛所知見故我知法界
無限普入一切諸佛國土恭敬供養諸如來
故我知法界無畔普於一切法界海中示現

瑤六

十六

修行菩薩行故我知法界無斷入於如來不
斷智故我知法界一性如來一音一切衆生
無不了故我知法界性淨了如來願普度一
切諸衆生故我知法界遍衆生普賢妙行悉
周遍故我知法界一莊嚴普賢妙行普莊嚴
故我知法界不可壞一切智善根充滿法界
不可壞故善男子我作此十種觀察法界時
了知諸佛廣大威德深入如來難思境界五
十九云菩薩摩訶薩坐道場時入三昧名觀
察法界此三昧力能令菩薩一切諸行悉得

殆六

十七

圓滿則知因地果位皆用法界性也

賢首五教儀卷第四之二

音釋

也	音子	也	音	肇	肇	肇	肇
濁也	也	也	也	論也	論也	論也	論也
麤	麤	麤	麤	頭陀	頭陀	頭陀	頭陀
麥	麥	麥	麥	撒	撒	撒	撒
麤	麤	麤	麤	煩惱	煩惱	煩惱	煩惱
富	富	富	富	抖擻	抖擻	抖擻	抖擻
樓	樓	樓	樓	抖擻	抖擻	抖擻	抖擻
那	那	那	那	蘭	蘭	蘭	蘭
滿	滿	滿	滿	若	若	若	若
願	願	願	願	翻	翻	翻	翻
平	平	平	平	閑	閑	閑	閑
同	同	同	同	靜	靜	靜	靜
交	交	交	交				
互	互	互	互				
也	也	也	也				

賢首五教儀卷第五之一

殆七

清浙水慈雲沙門灌頂續法集錄

○七棟觀智
五先正釋

七棟別觀智亦即以法界無障礙心爲智但迷時名本覺智悟時名始覺智證時名圓覺

殆七

智此三位中復有三智察事名無量方便智

照理名一道真實智理事渾融名權實無礙

智體亦現前知見不離知見起觀智故○引次

證二
先疏

華嚴疏云所入者法界緣起能入者有總有

別總即普賢行願願是大菩提心爲行本故

行是信解智等隨行起故若別說者略有五

重一身二智三存四泯五圓入樓觀而還合

身證也鑒無邊之理事智證也量同普賢而

周遍俱有也身智相即而兩亡雙泯也一異

存亡而無礙自在圓融也若以能對所一身

入法法界二智入人法界三身智俱存入人

法相在法界四身智雙泯入人法兩亡法界

五身智圓融入無障礙法界然身由心證次

廣辯心入心有三一者正信二者正解三

者正行此三無礙謂於此行門深忍樂欲淨

信不逾於斯行門曉了性相依之起行若能

一一信實解行相扶則無分別智行自然成

就今且略明無分別智證理法界以爲五門

一能所歷然謂以無分別智證無差別理心

與境冥智與神會成能證智證所證理如日

合空雖不可分而日光非空空非日光二能

所無二以知一切法即心自性以即體之智

還照心體舉一全收無有二相舉理收智智

非理外舉智收理智體即寂如一明珠珠自

有光還照珠矣。三能所俱泯，由智即理，故智非智，以全同理，無自體，故由理即智。故理非理，以全同智，無自立，故如波即水，動相便虛。水即波，故靜相亦隱。動靜兩亡，性相齊離。四存泯無礙，以前三門說有前後體，無二故離。相離性則能所雙泯，不壞性相，則能所歷然。正離性相，即不壞，故存亡無礙。如波與水，雖動靜兩亡，不壞波濕五舉，一全收上列四門。欲彰義異，理既融攝，曾何二源如海一滴具百川味。上但約無分別智證於真理，有此五門，若以無障礙智證無障礙境界，智圓融難可言盡。○次經△大經亦云：不起一切妄想，分別以清淨智普入法界。又云：以無著無縛解脫心入普賢菩薩行門，得無量法界甚微細智。演說一切法界甚微細智入廣大法界甚

殆七

二

微細智分別不思議法界甚微細智分別一切法界甚微細智一念遍一切法界甚微細智普入一切法界甚微細智知一切法界無所得甚微細智觀一切法界無所礙甚微細智知一切法界無有生甚微細智於一切法界現神變甚微細智如是等一切法界甚微細以廣大智皆如實知。○三科揀△既智與境一多無礙，若對揀之義，有四句：一智證一切境，二一切智證一境，三一智證一境，四一切智證一切境。智照境既爾，境發智亦然。○

殆七

三

四結成

所以現前一念知見心中，亦具百萬法界性相。即空即即遍心中，了無邊之境界，上顯難思之心，心境重重，帝網無盡。此以修緣境觀契彼性，有境觀故，即立此法界智以爲能

觀心也○五通妨

問此法界知見心與上有何揀別答法界知見心雖總是一約能所境智不無二別上所觀境中是性起法界靈知真見自心或名理實法界寂知靜見本心此能觀智中是緣起法界了知明見妙心或名離垢法界照知觀見覺心開雖如此合無二也問爲何不用六識觀耶答凡小用六識權乘兼慧所若圓頓實教唯以智慧觀問智識何別答分別爲識無分別爲智生滅爲識不生滅爲智積集爲識無積集爲智著境爲識不著境爲智得相爲識無得相爲智問法界知見心與智識在當人觀如何分析答心是名知見是體法界是總相真如性如來藏真空性唯識性偏空理是別相智識是用識則背覺合塵棄淨取

染分別妄想重故智則捨妄求真返迷歸悟覺照光明利故法界知見心等真妄染淨俱通問此之境智與下何別答此通能所境是所如萬象智是能如圓鏡兩相對待下唯局所以境智等十對俱爲所觀照境如人望當臺鏡中影象又此別揀華嚴圓教一宗境智爲初修入門方便下則通明十界五教一切境智爲正修所依事體○八辨止觀二初略辨法相二先止觀八辨析止觀境智若明止觀當悉蓋三門中一一皆含止觀如真空門即名真空止真空觀止則安住真空而不散亂觀則鑒察真空而不昏迷次無礙門亦名無礙止無礙觀止則停止無礙而離過惡觀則覺觀無礙而成德善三周遍門亦名周遍止周遍觀止則止息周遍而空我法觀則觀照周遍而證真俗

今不言止者攝在於觀故華嚴云如金翅鳥以左右翅鼓揚海水令其兩關觀諸龍衆命將盡者而搏取之如來出世亦復如是以大止觀鼓揚衆生大愛水海使其兩關觀諸衆生根成熟者而度脫之起信云若修止者對

第七

治凡夫住著世間能捨二乘法弱之見若修

觀者對治二乘不起大悲狹劣之過遠離凡

夫不修善根是故止觀相成不離○次性△

又此三止觀中復分性起緣起一法界性全

體起爲三重止觀名爲性起隨諸淨緣互相

發起三重止觀名爲緣起○二詳析修相二

性起修二先靜坐三初入

修此止觀然有二時一者靜坐一心復有入

住出三初入時心則從麤至細境則自動及

靜當麤動間應修三止以破除之修真空止

五

心無心相境無境相心境相無麤動緣息初止不破進無礙止心境無性依理成立離真理外無心境得次止不破進周遍止一一心境如性融通遂令圓遍無妄麤動止若不破即應修觀修真空觀麤動心境悉因緣生因緣無性相即寂滅初觀不除進無礙觀心境空無生性之理即是真如平等法界次觀不除進周遍觀全法界理爲心境事法界無礙心境亦融修此三止觀後麤動心境自然銷滅矣○中住二先治

二初細靜

中住時有二義先明對治麤動心境既息細

靜心境自現見此細靜生快樂想爾時應修

三止止之雖修三止猶起見愛應當增上三

觀觀之止觀方法並同於前此明對治細靜

心境法也○二浮沉二△若坐久時心或浮

初相對

動念外境界身亦覺得輕躁不安爾時應修三止止之心若沉暗昏瞢無記頭首亦覺低垂不起爾時應修三觀觀之○二隨便△設此相對用之一一不得其利亦當隨便不得疑滯如爲浮故而修於止心猶散亂無有法利當轉修觀若於觀中覺心寂靜即宜用觀安心如爲沉故而修於觀心猶昏暗無有法利當轉修止若於止中覺心明朗即宜用止安心止觀方法亦同於前此明對治心浮沉病法也○後修二初漸頓定不定二初漸頓二先境

後辨修法於中先辨漸頓不定謂動靜二相了然不生浮沉二病寂爾不起當此之際應觀法界法界境約心明心之意言曰教心之法相曰義心之一如曰理心之萬別曰事心之所緣曰境心之能照曰智心之遊履曰行

心之階級曰位心之初作曰因心之終成曰果心之歸托曰依心之主持曰正心之自性曰體心之幹能曰用心之荷負曰人心之軌則曰法心之違背曰逆心之和合曰順心之招致曰感心之酬還曰應心瞋恚是地獄心慳貪是餓鬼心愚癡是畜生心貢高是修羅心戒善是人道心禪定是天道心證滅是聲聞心獨覺是辟支心覺他是菩薩心圓覺是如來故修止觀但觀自心不須心外推窮尋逐心內境若明心外境盡徹○次觀△欲達此境有二止觀一者行布二者圓融行布者先真空次無礙後周遍圓融者三觀一心中得十對境法從緣所生空無性相名爲真空觀空心不息名真空觀妄想念不起名真空止緣起境法無自性故舉體即真名爲無礙觀

無礙顯現名無礙觀分別情歇滅名無礙止
真理容遍境如法界亦相容遍名為周遍觀
周遍圓明名周遍觀生滅心無生名周遍止
一而常三三而常一一三即離圓融自在○
定二不△然此漸次一念觀中有定不定定者

第七

七

空即遍三先後淺深決定不移故不定者遍
與即空隨便改轉初後不定故良以決定觀
中不斷見愛不得法利即轉為不定觀不定
觀中不成寂定不發觀慧即轉為決定觀皆
隨行者宜便修之○二止觀均不均

次辨止觀均齊謂因修三止故而心寂然安
靜禪定顯現若少觀慧心則昏沉是為礙定
不能斷諸結使證諸法門如覆盂水光影不
現爾時應速修觀破析即發真慧除煩惱成
菩提矣如澄江水則能載物現諸影像或因

修三觀故而心豁然開悟智慧分明若無禪
定心則散動是為狂慧不能遠離有為安住
寂滅如風中燈照物不了爾時應速修止破
析即得大定出生死入涅槃矣如室內燈則
能除暗照物分明○後出

後出時心則從細至麤境則自靜及動亦當
隨便修三止觀若善調治必得心神明淨身
體輕快執著空結業息也○二緣境二先略

二者歷緣對境緣有四一語二默三動四靜
該通三業也境有六一見二聞三嗅四嘗五

覺六知都攝六根也○次詳二初緣

△若語言時

應作念言由心覺觀鼓動氣息衝於咽喉唇
舌齒嚙故出一切音聲語言問答訊詰略說
廣說喻說直說因此語故則有讚毀善惡染
淨等法此語語業連帶緣起同時具足互相

攝入止周通即語顯心即心顯語止無礙理實語

心及語中一切煩惱功德等法皆不可得真

止則妄想息滅正念停住是名修法界止又

觀未語欲語正語已語皆無有相語心亦爾

不從內出不從外來既無內外何有中間處

所尚無體自空寂乃至語者及語中一切善

不善法皆從緣生空無自性真雖無自性

由心覺觀因緣力故而有語言或為毀戒或

為誑他或為眷屬或為勝彼或為義讓或為

善禪或為涅槃或為無生或為慈悲或為大

覺我今為何事故而語若是煩惱所使及為

不善無記之事即不應語若非煩惱所使及

為善德如法之事即應當語一一語業攬法

界成一法界依語業顯無礙是故吐納抑

縱高低清濁觸處遍周真言俗語顯談密說

始七

隨時無盡周通則慧光貫穿智心通達是名

修法界觀餘三止觀例語思之此歷四緣修

止觀也○次

若見色時應作念言由於見精發眼根中名

之為見因此見故則有眼識意識心生見識

形已即有明暗二種色相對待眼根令彼見

識趣外奔逸吸習中歸以是緣故根塵識三

同時具足交涉無礙周通蓋此圓融從法界

得離法界性事事相礙理能成事事能顯理

止無礙理真空故事亦絕相故見色時如水月

空華如夢像鏡影無有定實真若見順情

之色不起貪愛若見違情之色不起瞋惱若

見非違非順之色不起無明及諸亂想是名

修法界止又觀未見欲見正見已見皆不可

得以根塵空明中各無所見故見識亦爾不

始七

九

從內出不從外來設從內出奚待因緣設從外來與我何涉內外既無中間亦空處所莫尋體相豈有乃至見者及見中一切善不善法並屬緣起畢竟無性真空觀性雖空寂因緣和會不妨有生由於眼根發起見精轉生眼識意識即能了別諸色因此則有一切善惡染淨等法或見違情之色起諸瞋恚而造上惡或見順情之色起諸貪愛而造中惡或見中庸之色起諸癡迷而造下惡或見違情之色不起瞋恚生勝負心而作下善或見順情之色不起貪愛生歸戒心而作中善或見中庸之色不起癡迷生禪定心而作上善或見色塵能招苦集而慕滅修道或見色塵因緣流轉而觀緣悟道或見色塵能生業識無明煩惱即起慈悲而行六度或見色塵唯自心

現不從外得即轉二依而證二果我今爲何而見於色若煩惱使不善之事即不應見非煩惱使利益之事即應當見如是緣起體本自空畢竟一空空中而具足十緣具足十緣中而畢竟一空即空即有非空非有無礙觀空有性緣同時具足眼眼色色相即相入識識見見乎容乎遍主伴交參廣狹自在周通境既普融無盡智亦周圍無礙是名修法界觀餘五止觀例見思之此對六境修止觀也○二全性修成△以此坐行二時修緣止觀念念相續心心無間自然與彼一真法界性起止觀疾得相應○後結△此名觀察法界三昧亦名知一切法界所安立悉住心念際三昧亦名入一切法界無源底三昧又依十界修三止觀亦名海印三昧若依四大修三止觀亦名

塵舍三昧若依十度修三止觀亦名華嚴三昧若依四攝修三止觀亦名攝生三昧如是名義隨德用立非離法界別有體相故此法界三昧名爲一行以依是三昧故則知法界一相謂諸佛身心與衆生身心平等無二又

第七

法界三昧是一切三昧根本若人修行則能出生無量三昧以此三昧轉化衆生即名之爲普照法界修多羅教若人於此止觀能如是一切時處中自行化他則於世出世間最尊最上無與等者○九識魔病二初略明

九識治魔病止觀境智雖知仍須善識魔病若不覺悟被其惱亂若不對治無能破滅魔病事銷止觀道就○二詳釋二先

於中先辨魔又三初舉名數魔有多種法華明三一煩惱二五陰三生死大論開四於上

第七

十一

三中加一天魔罵意經出五名一天二罪三行四惱五死華嚴分十類一蘊二煩惱三業四心五死六天七善根八三昧九善知識十菩提法智楞嚴於五陰中各開十種共有五十色陰十者一出礙二內徹三離合四化佛五現土六暗見七無覺八遍觀九遙聞十變形受陰十者一悲慙二狂妄三沉憶四下劣五憂愁六喜樂七我慢八輕清九斷空十愛欲想陰十者一怪鬼二魅鬼三魑魅四魘蟲五疫厲六大力七神祇八妖精九靈物十天眷行陰十者一無因二圓常三二分四四邊五矯亂六有相七無相八俱非九斷滅十涅槃識陰十者一冥諦二慢天三自在四倒知五事火六無想七長壽八魔天九趣寂十獨倫具足論之魔有八萬四千乃至恒沙無盡

今總束之分爲二類一界內魔有十一精靈
二惡鬼三邪神四老仙五魔天六陰處七生
死八業障九煩惱十心念二界外魔亦十一
三昧二智慧三師友四化導五修諦六觀緣
七行度八報身九依土十果位△二境二
先界內

次釋魔境先界內魔境初精靈即木石禽獸
多年受天地日月精氣所成者或作美女或
變惡鬼現種種形像令可愛可畏惑亂行人
退失定心楞嚴云山精海精風精河精土精
石精一切草木積劫精魅或復龍魅金玉芝
草麒麟龜鶴經千萬年不死爲靈出生國土
年老成魔惱亂是以二三鬼神者即大力鬼
堆剔鬼蠱毒魔勝魑魅魍魎諸鬼神等或作
蟲蝎攢刺頭面或作怨賊捶擊腰腋或抱持
或喧怒或現諸惡禽獸或變衆善天仙令人

迷惑成其伴侶楞嚴云此名山林土地城隍
川嶽鬼神年老成魔或有宣姪破佛戒律或
有精進純食草木無定行事惱亂是以四五
仙天者即九十五種外道所依婆羅門仙及
自在天摩醯首羅吒枳迦羅諸天仙等或作
違情境界如夜叉羅刹師子虎狼等令人驚
怖或作順情境界如諸佛菩薩美貌男女等
令人愛著或作非違非順境界則平常情境
來破定心令壞善法又或化作三種五塵境
相一作違情事是可畏五塵令心恐懼二作
第七
順情事是可愛五塵令心貪戀三作非違非
順事是平等五塵令心搖動楞嚴云此名住
世自在天魔使其眷屬如遮文茶及四天王
毘舍童子未發心者現美女身盛行貪欲或
壽終仙再活爲魅或仙期終計年應死其形

不化他怪所附年老成魔惱亂是人起信云
或有衆生無善根力則爲諸魔外道鬼神之
所惑亂若於坐中現形恐怖或現端正男女
等相或現天像菩薩像亦作如來像相好具
足若說陀羅尼施戒忍進禪智或說平等空

第七

十三

無相無願無怨親無因果畢竟寂滅是真涅
槃或令人知過未之事得他心智辨才無礙
能令衆生貪著世間名利之事又令人數
瞋數喜性無常準或多慈愛多睡多病其心
懈怠或卒起精進後便休廢生於不信多疑
多慮或捨本勝行更修雜業若著世事種種
牽纏亦能使人得諸三昧少分相似皆是外
道所得非真三昧或復令人若一日二日三
日乃至七日住於定中得自然香美飲食身
心適悅不饑不渴使人愛著或令人食無分

齊乍多乍少顏色變異六陰七死者是生死
果八業九惱者是生死因十心魔者隨一念
起即一魔生因果本也此五種皆是世間之
常事亦隨人自心所生今且置之不論以易
知故○外 次界

次界外魔境三昧所緣智慧能緣中修也師
友上求也化導下化也此四凡聖因果俱通
諦是聲聞境界緣是辟支境界是菩薩境界三乘
聖人所修因也身土果三乘聖人所得果也
若爾何爲魔境但於此貪愛不捨功行不進
善根不增法性不顯即名之爲魔事楞嚴云
不作聖心名善境界若作聖解即受羣邪華
嚴云善根魔恒執取故三昧魔久耽味故菩
提智魔不願捨故善知識魔起著心故又云
自說爲是餘說悉非或以妙義授非其人是

爲魔業樂求二乘志尚涅槃是爲魔業惡心
布施瞋心持戒是爲魔業以懈怠故志意狹
劣不求無上大菩提法是爲魔業又云少行
生足魔所攝持受一非餘魔所攝持不發大
願魔所攝持樂處寂滅魔所攝持

賢首五教儀卷第五之一

音釋

搏音卜手 曹音蒙昏昧 嚀音郭口 魑音提
擊也 也長二三尺袒身目 魔音掩睡中 蝎音歇
在頂上行走如風 魔音掩睡中 蝎音歇
毒虫 吒音知 迦羅即大自 夜叉此云勇健 羅
也 吒音知 迦羅即大自 夜叉此云勇健 羅
刹此云速疾 遮文荼舊云嫉妬女 毘舍此
刹亦云可畏 遮文荼舊云嫉妬女 毘舍此
十四

吹精氣梁
言願鬼

賢首五教儀卷第五之二

殆八

清浙水慈雲沙門灌頂續法集錄

二三治二初釋

六一覺悟

後明識治開爲六門一覺悟無惑謂知彼是魔事不被其所惑也楞嚴云成就破亂由汝

殆八

心主主人若迷客得其便當處禪那覺悟無

惑則彼魔事無奈汝何若不明悟被魔所迷

則爲魔人破佛律儀問如現佛菩薩像說甚

深法或是宿世善根所發云何揀別定其邪

正答應以三法驗之一以定研磨謂定中境

相邪正難知者當深入定心於彼境中不取

不捨但平等住定若是善根發者定力逾深

善根彌發若是魔所爲者不久自壞二依本

修治如本修不淨觀今則還依本不淨觀若

如是修境界增明者則非僞也若以本修治

漸漸滅去者當知是邪也三智慧觀察觀所

發相推驗根源不見生處深知空寂心不住

著邪當自滅正當自現如燒真金益其光色

若是僞金即自焦壞故經說言欲知真金三

法試之謂燒打磨定譬於磨本治猶打觀智

類燒以此三驗邪正自知也○二識貴二初

時識

二善識訶責三先精靈二初約時識知即十

二時獸變種種形來惱行人然亦各當其時

而來子時來者多是鼠等丑時來者多是牛

等寅是虎豹卯是兔辰是龍巳是蛇午是

驢馬未是羝羊申多猿猴酉多雞鳥戌

多狗亥多豬彘等行者若見常用此時而

來即知其獸精說其名字而訶責之自當謝

滅也○二約心識△二約心識知即十習因獸此

則隨心樂欲而來心愛怪異而來魔者多是
土象破鏡等類心愛咎徵而來魔者多是鵠
鶴鳩鵲等類溜合狐狸降伏蛇蝎冥感螭蛔
食供雞豬服事牛馬顯應鴻燕休徵麟鳳傳
習猫犬乃至心愛神通種種變化而來魔者
多是山海風土精類心愛斷滅種種空寂而
來魔者多是金玉草木精類行者若見常因
此心而來即知彼精靈稱名訶責也○次鬼神
次鬼神若見堆剔鬼等來惱亂者應即閉目
一心陰而罵言我今識汝汝是閻浮提中食
火麁香偷臘吉支喜破戒律我今持戒終不
畏汝鬼便却行匍匐而去又三摩中心愛圓
明貪求善巧魔得其便來說經法此名怪鬼
心愛遊蕩貪求經歷魔得其便來說經法此
名魘鬼心愛綿溜貪求契合魔來說經此名

胎八

二

魘鬼心愛懸應貪求冥感魔來說經此名厲
鬼心愛根本貪求辨析魔來說法此名蠱毒
魔勝惡鬼心愛知見貪求宿命魔來說法此
名山川林嶽邪神心愛深入貪求靜謐魔現
未然說陰寂法此名為大力鬼心愛長壽貪
求永歲魔現生年說常住法此名為自在天
行者若見現形說經隨我定心之所施設禪
觀增勝即名為正非破律儀即名為邪便當
舉其名號以誠勸焉○三陰
後陰魔心生憐慈則有悲魔入其心腑心生
三猛利則有狂魔入其心腑沉憶憶魔憂愁愁
魔歡喜喜魔我慢慢慢魔少足知足魔輕安輕
清魔心生斷滅則有空魔心生貪愛則有欲
魔此等陰魔起於自心心念不起魔事銷歇
設有魔來但當責心如經頌云欲是汝初軍

憂愁爲第二饑渴第三軍渴愛爲第四睡眠
第五軍怖畏爲第六疑悔第七軍瞋恚爲第
八利養虛稱九自高慢人十如是等衆軍壓
沒出家人我以禪智力破汝此諸軍得成佛
道已度脫一切人陰魔若識餘自易知楞嚴
云此是先佛奢摩他中毘婆舍那覺明分析
微細魔事魔境現前汝能諸識心垢洗除不
落邪見陰魔銷滅天魔摧碎大力鬼神褫魄
逃逝魑魅魍魎無復出生○三止
三止觀破除謂於定中雖悟無迷稱名責之
猶不隱滅應修止觀二法却之一修止却者
凡見一切邪魔境界悉知虛誑空無生性定
中所緣一眞法界方爲眞實究竟堅固是故
一心停住法界雖見魔境不喜不怒不取不
捨亦不分別寂然不動彼即自滅二修觀却

者若見用止不去即當反觀能見身心無體
無處清淨本然就我所緣一眞法界亦無形
相圓常周遍彼向何者能爲惱亂如是觀時
尋當謝絕設或不去切勿生懼唯自深觀法
界而已故大品云菩薩成就二法魔不能壞
一者觀一切法空二者不捨諸衆生華嚴云
若具聖智無上道則能超出四魔境涅槃云
天魔波旬若更來者當以五繫繫縛於汝釋
曰五繫者即五停心觀治彼五種魔大集云
知苦壞陰魔斷集離惱魔證滅壞死魔修道
離天魔起信云行者常應智慧觀察勿令此
心墮於邪網當念唯心境界則滅終不爲惱
○四經
四經咒加持謂見如上說諸魔境雖用止觀
遲遲不去亦不須驚惶憂怖若出家者即當

一心默誦諸大乘經如華嚴梵行行願等品
法華安樂囑累等品或誦諸般神咒如楞嚴
隨求尊勝大悲等或用瑜伽教中遣魔印咒
或但觀想唵啞吽吽哩等字種加持身心脫
體便成毘盧彌陀阿閼觀音等身放赤色光

卷八

照觸諸魔如火焚草灰燼無餘或誦戒本或
念三寶若在家者隨其常所誦習而默持之
如金剛藥師觀音彌陀心經消災如意準提
往生六字一字咒等或誦三皈五戒十善或
念諸佛菩薩名號如彌陀藥師釋迦彌勒文
殊普賢觀音地藏等魔便隱去惡境歇滅以
正能治邪邪不干正故若出禪觀亦當誦持
經咒自防慙愧懺悔楞嚴云末世衆生樂修
三昧汝恐同邪一心勸令持我佛頂陀羅尼
咒若未能誦寫於禪堂或帶身上一切諸魔

咒

五

所不能動○五正念

五永固正念謂雖默持經咒佛名魔境不謝
亦不須憂但當一心住於定中正念不亂令
觀增明乃至經年累月不去我亦端心正念
堅固動靜不移憶忘如一古謂一念萬年萬
年一念是也當知魔境皆是幻化何者未曾
見有於坐禪中魔來化作豺狼虎豹噉食人
也亦未曾見魔來化作男女爲夫婦也愚人
不了或喜或憂因是心亂失定發狂皆自成
患非魔所爲今則不惜軀命住於禪觀正念
不動當處湛然如暗夜人處大明中彼幽隱
魔無奈我何楞嚴云然彼諸魔雖有大怒彼
塵勞內汝妙覺中如風吹光如刀斷水了不
相觸汝如沸湯彼如堅水煖氣漸隣不日銷
殞徒恃神力但爲其客明能破暗近自銷殞

如何敢留擾亂禪定又經頌云若分別憶想即是魔羅網不動不分別是則爲法印起信云當勤正念不取不著則能遠離是諸業障應知外道所有三昧皆不能見愛我慢之心貪著世間名利恭敬故真如三昧者不住見相不住得相乃至出定亦無懈怠所有煩惱漸漸微薄○六增進

六增進功行謂雖多時正念魔境猶現此由禪觀不深功行未至應當奮身努力加功用行於止觀中研究至極圓滿妙明迥無翳障到此之際唯是一片性天慧日有何魔霧爲迷漫耶華嚴云於佛深法信解不謗捨離魔業未曾忘失一切智心捨離魔業勤修妙行恒不放逸捨離魔業常求一切菩薩藏法捨離魔業楞嚴云色受想破天魔潛形行識陰

除心見魔滅況復魔界如即佛界如無有二如今則精進法界止觀於魔界無所取佛界無所捨無取無捨魔境自然消滅佛法自然現前故釋論云除諸法實相餘皆是魔事○後結△以上六門或漸次用而銷或一時用而

滅或少分用而止或全分用而破如是不遭邪慮發明圓定方名之爲善修止觀者矣○

次病二先心
二初病相

次辯病亦二先心病又二初明病行相病有二種一麤謂巧僞修行於中又二一內實破殆八

戒而外現威儀求名利故狡猾故護短故二假全不破而多有闕漏爲他知故伺狸故不直故二細謂存見趣理於中亦二一雖具直心而執我修行我見不破故二雖不執我而計有實法法見不破故○二治方△二治病藥

方亦有二種一麤謂眞實修行亦二一於諸過非並不覆藏而深懷慚愧懺悔往罪不敢復作二於所修行不雜巧偽皆質直柔輒作下下意不顯已德二細謂不存執見亦二一修諸行時知無我人盡未來際不計疲苦二

觀察諸法平等不二一相無相入理究竟二

通說者但住於法界深觀諸法平等之時於

上諸病無不治盡○

後身二初病相

後身病亦二初明病發相病有三種一四大五藏得病又二先四大增損病相若地大增者則腫結沉重身體枯瘠等百一患生若水大增者則痰癰脹滿腹痛下痢等百一患生若火大增者則煎寒壯熱支節皆痛口氣大小便利不通等百一患生若風大增者則身體虛懸戰掉疼痛肺悶肚脹嘔逆氣急等百

一患生故經云一大不調百一病起四大不調四百四病一時俱動次五藏所生病相從心生患者身體寒熱頭痛口燥等心主口故從腎生患者咽喉噎塞腹脹耳聾等腎主耳故從肺生患者身體脹滿四肢煩痛心悶鼻塞等肺主鼻故從肝生患者多無喜心悲思瞋恚頭痛眼昏等肝主眼故從脾生患者身中面上遊風遍體瘡癢疼痛舌嘗飲食無有滋味等脾主舌故蓋此二種病起通因內外發動若外感寒暑風雨濕熱飲食不消而病從二處發者當知因外發動若由用心不善調適身心息三内外有所違犯或觀行乖僻乃至勞傷而成病患或因定法發時不知取與致此患生當知因內發動若四大有病因由今用觀心息鼓擊發動本病此則通因內

外而有二鬼神所作得病三業報所感得病如是等病初起即治甚易得差經久結成雖

治難愈○二治方二先正三

一大藏三初止

二治病藥方法有二種先正治法三初治大藏病三一修止治病有一師言但安定心止在病處即能治病所以者何心是一期果報之主譬如王所到處羣賊進散又有師言臍下一寸名憂陀那此云丹田若能止心守此不散經久即能多有所治復有師言常止心在足下莫問行住坐臥即能治病所以者何皆由心識上緣故令四大不調多諸疾患今則安心在下四大自調衆患除矣更有師言但知諸法空無所有不取病相寂然止住多有所治所以者何由心憶想鼓動四大故有病生息心法界百骸適悅衆病即差故淨名

第八

云何爲病本所謂攀緣云何斷攀緣謂心無

所得如是等說皆用止治○二

觀

二作觀治病有一師言但觀心想用六種氣以治病者即是觀能治病謂一吹二呼三嘻四呵五噓六咽此六種息皆於唇口之中想心方便轉側而作綿微而用頌曰心配屬呵腎屬吹脾呼肺咽聖皆知肝藏熱來噓字至三焦壅處但言嘻次有師言若能善用觀想運作十二種息能治衆患一上息二下息三滿息四焦息五增長息六滅壞息七煖息八冷息九衝息十持息十一和息十二補息此十二息皆從觀想心生云何對治衆患上息治沉重下息治虛懸滿息治枯瘠焦息治腫滿增長息治羸損滅壞息治增盛煖息治寒冷息治熱衝息治壅塞不通持息治戰動不

第八

九

安和息通治四大不和補息資補四大衰耗
善用此息諸患遍治又有師言善用假想觀
可以治衆病如人患冷想身中火氣起即能
治冷等此如雜阿含經七十二種治病祕法
中說復有師言但用真空法界觀想檢析身
中四大病不可得心內五藏病亦非有經久
修持衆患自差如是等說皆用觀治○三藥
三藥石治病謂上所說止觀二法若善其意
無病不治若不得意則草木金石之藥與病
相應亦可服餌息諸患也○三鬼神△次治鬼
神病當用大強威德力心加諸靈咒大經佛
號以助治之○三業報△後治業報病當用慚
愧大懺悔心加諸念佛發願修福以助治之
○後助
二助治法謂坐中用心治病仍須兼具十法

一者信謂信此法必能治病二者用謂隨時
常用三者勤勤用不息取差爲度四者常住
緣中謂細心念念依法而不異緣五者別病
因起如上所說六者方便謂吐納氣中運心
緣想善巧成就不失其宜七者久行謂若用
之未即有益不計年月常習不廢八者知取
捨謂知益即勤有損即捨亦須微細轉心調
治九者護持謂善識異緣不令觸犯十者遮
禁謂得益不向外說失損不生疑謗若依此
十法行所治必有效也○十顯果相二初示善根三先明發相
三初與空相
十顯示果相謂止觀中一切魔病所不能動
於大菩提涅槃妙果自可成證有因有果法
爾然故略開二義一先示善根發相於中初
明發相謂能如是善修真空觀者則於坐中

身心寂靜爾時當有無量善根開發今略明之相有二種一者外善根發相所謂不殺盜淫妄言綺語不貪色聲香味觸法不求三界報不樂五欲樂身口七支恒沙煩惱皆能止息二者內善根發相所謂不貪瞋癡慢疑惡見不起喜怒哀樂等心不隨六情根不執七識我意地一切見愛無明皆悉絕滅華嚴云以智神通現身清淨無所依止無有攀緣住者摩他最極寂靜恒住一相所謂無相又云以心爲本心若清淨則能圓滿一切善根於佛菩提隨意即成○二無礙相

於八

十一

能具足二者內善根開發所謂慈悲仁讓柔順和雅信念慚愧智慧等心常修四無量常懷於六念無數恒河沙性功德悉願圓成華嚴云菩薩勤求最勝道動息不捨方便慧一同向佛菩提念念成就波羅蜜發心同向是布施滅惑爲戒不害忍求善無厭斯進策於道不動即修禪忍受無生名般若同向方便希求願無能摧力善了智如是一切皆成滿○三周遍相

若能善修周遍觀者則於坐中身心遍融爾時亦有諸善根相一者外善根開發所謂四攝十度百萬行中隨一一行具足衆行皆不取相稱性遍周如離世間品說五逆十惡百萬業中隨一一斷具足衆斷亦不取相稱性遍周如普賢行品說二者內善根開發所謂

三心十念百萬德中隨一一德具足衆德皆
不取相稱性圓融二障十惱百萬惑中隨一
一治具足衆治亦不取相稱性圓融華嚴云
觀諸因緣實義空不壞假名和合用無作無
受無思念諸行如雲遍興起不取衆相而行
施本絕諸惡堅持戒解法無礙常堪忍知法
性離具精進已盡煩惱入諸禪善達性空分
別法具足智力能博濟滅除衆惡稱大士問
何義證知答不淨因緣慈心念佛尚有無量
善根開起况觀法界無發相耶○二辨真偽
二初偽相

二初
先定器

二辯真偽先明邪偽禪所發相謂發如上諸
境界時隨因所發之法或身重如物鎮壓或
身輕如毛翻飛或不安如束縛如坐鐵床如
飲毒藥或適悅如觀妓如遊花園如食珍饈

或搔動虛懸或沉滯下墜或煎寒或壯熱或
頭疼或腦悶或如越牖透垣或似火燒刀斫
或同虛空豁達或像大地障礙或睡或行或
進或懈或不禮塔廟摧毀經像或手執刀劍
割裂自身或路傍歌舞或入山避人或見日
月蓮花或見山河深險或鼻嗅異香或食噉
酒肉或得香美飲食數日不饑不渴或聞微
妙法音歸向無因無果或瞋或喜或慧或癡
或生大枯渴沉憶不散或發無窮悲流淚不
依或心意暗蔽或動諸惡覺或起大我慢志
看八
士
齊諸佛或生無盡憂不耐見人或憶惡觸身
毛驚豎或想樂境昏醉不醒或思內幽閒諸
妙好事或念外散亂諸雜惡事或起輕安意
或生知足想如是種種無量形境與善俱發
皆名邪偽此邪定法若生愛著即與天魔鬼

神外道之法相應由是失心狂迷顛倒○次魔

或時諸邪魔等知彼念著其法即加勢力令發邪境或發邪定或得邪智或辯才無礙或相好端嚴或說陀羅尼或入三三昧或令傍

第六

十三

見佛土或令遠聞經聲或令知過去善惡或令知未來禍福或觀天宮或瞻地獄或神力或無畏此皆魔力惑人非有真實行者愚迷謂得道果由是顛倒惑亂世間魔心生厭離其身體威德既無陷於王難命終之後還墮魔道輪轉三途永不值佛○治二△是故行者若發善時有此邪相當即却之一者止却謂此諸邪偽境虛誑不實唯自正心住於法界不受不著不憂不喜二者觀却自以智慧明觀諸法實相離法界心外別無境可得如是

止觀時境自謝滅矣○二真相

次明真正禪所發相若於觀中發諸善時無有如上諸邪法相一一皆與自定相應定心顯現觀智分明身體輕利安隱快樂意地柔和寂靜明朗自覺功德巍巍法喜充滿無有覆蓋亦無障惱破諸執見得大解脫厭患世間無常苦空唯求出世佛涅槃樂普度衆生同成正覺是爲正禪相也譬與惡人共事始美終惡若與善人同謀久則愈妙邪正發相亦然邪則正受漸失妄想漸興正則煩惱漸滅觀智漸增也○三示長養

三示長養謂於定中若有一切善根發時應用止觀二法修令增長若宜用止則以止修之若宜用觀則以觀修之善根得長障蓋自除矣○二顯妙果二先初心證境三一真空境

次正顯妙果成相二先初心證境謂能如是
精進修時即能證知一切諸法空無自性皆
從心生離此心外無一切法然心無相法亦
無相即有法相亦如影響以知心法皆空寂
故即不得一切名相所謂非心非境非色非
空非時非處非身非方無自無他無一無多
無大無小無染無淨離修離證絕教絕理由
此斷煩惱滅生死悟入理性無礙法界是名
真空止觀證成境也○二無礙境
又知心性雖然空寂因緣和合亦能生法以
事無別體要攬理成真理隨緣能成事法是
故色聲香味發於性空猶如空花起滅見聞
覺知生於覺心宛同夢像隱現以知心法皆
無礙故即得一切融通所謂即真即俗即性
即相即心即色即一即異亦常亦變亦滅亦

殆八

古

生亦空亦有亦智亦境是實是權而體而用
由此起萬行度衆生悟入理事無礙法界是
名無礙止觀證成境也○三周通境
又知心性本來周遍法界含吐十虛隨諸緣
起成一切法亦如心性遍容無礙以諸大小
法相無非一法界心是故於一小器出生一
切飲食資具佛宮殿中頓現衆生居處屋宅
毛端容刹塵裏轉輪一多即入廣狹隱顯以
知心法皆包通故即得一切周圓所謂教義
遍容智斷遍容行位遍容因果遍容依正遍
容方隅遍容時劫遍容感應遍容逆順遍容
人法遍容由此圓融斷普遍修悟入事事無
礙法界是名周遍止觀證成境也○次後心證境
次後心證境謂能如是證知一切諸法空即
遍容即是自心空即遍容於止觀中重加功

殆八

十五

行修令滿足猶如鍊金斷惑證真超凡入聖
由修止以成定轉生死依而證涅槃斷果號
曰善逝爲福足尊由修觀以成慧轉煩惱依
而證菩提智果號正通知爲慧足尊故華嚴
云知一切法即心自性成就慧身不由他悟

法華云定慧力莊嚴以此度衆生○

次正修
二先所

依事境二初正
釋十對三初標

次正修中開爲二門先明所依事體總爲十
對一教義二理事三境智四行位五因果六
依正七體用八人法九逆順十感應○

二釋
十初

教義

初教義者教則地獄畜生餓鬼修羅四惡趣
聲人乘天乘小乘聲聞中乘緣覺大乘菩薩
初教終教一乘頓教圓教最上佛教教義則三
途上中下五逆十惡三道下中上五戒十善

二乘七十五法始教立相八識十如五位百
法破相四見三空八十一法終教四位六染
三大九相頓教一百八句四十一門一一離
言唯談真性圓教二智十如六相十玄如來
二身四智五眼十力法等○

二理
事

二理事者理則六道本覺性二乘偏空法性
始教二空法性終教中道妙真如性頓教離
言真如第一義空真勝義性圓教法界圓融
無障礙性佛界一乘佛性事則六道有漏五
蘊四聖無漏五蘊小教亦有漏亦無漏五蘊
身土始教有爲無漏五蘊終教無爲無漏五
蘊頓教非有漏非無漏五蘊身土圓教法界
圓融無盡五蘊如來報應法性身土○

三境
智

三境智者境則三途上中下惡逆果報逼迫
之苦三道下中七禪善果報適悅之樂小教

四諦偏真涅槃始教二諦終教三諦頓教第一義諦圓教融無盡法界如來具四涅槃智則三途惡業習心觀三道有漏善心觀聲聞四諦觀無漏慧緣覺因緣觀自然慧始教二空觀加行根本後得智終教三諦觀權實

第八

太

無障礙智頓教真性觀第一義空離言之智圓教法界觀十無盡智如來二三四五智等

○四行位

四行位者行則地獄作五逆阿鼻純情無想無間九情一想有間八情二想餓鬼造十惡至七情三想畜生起三毒至六情四想人道修戒善至五情五想想明斯聰情幽斯鈍修羅行福施地行羅刹等類六想四情飛行夜叉等類七想三情大力鬼王等類八想二情仙天修禪觀仙則休止山海存想固形超至

第九

十七

九想一情天則六事行觀四禪八定直至純想無情二乘略則戒定慧廣則三十七品始教六度萬行終教四信五行頓教三自性俱空二無我並遣圓教無盡一攝一切一切一如來覺他位則地獄八寒八熱餓鬼三財三障畜生四類四生人道四洲四姓夜叉品在三行修羅階攝四趣仙列十種天分三界小始教歷資加見修究竟五位但我空法空差別終頓圓超信住行向地等六位亦有漸頓圓融不同佛唯妙覺○五因

果

五因果者因則三途造上中下十習惡業三道造下中上十習善業二乘七方便始終頓圓三賢四加佛界等覺已還種種定慧福智莊嚴果則地獄阿鼻無間受六交報苦痛割鋸凍冽煎燒餓鬼遇蟲畜等受盡魅形口中

賢首五教儀卷第五之二

結八

十八

烟燄饑渴逼迫畜生爲服食類酬償宿債乘
 騎鞭杖刀砧烹煮修羅等三道受下中上本
 愛習果酬善業報小教見修證中須陀洹等
 四果始終頓圓歡喜等十地如來即一念相
 應大覺朗然無上菩提爲習果大般涅槃禪
 定三昧一切具足是報果也○六依正
 六依正者依則三途黑業變化土三道白業
 變化土二乘淨變化土始教劣受用土終教
 勝受用土頓教法性土圓教無障礙法界土
 如來五土正則三途惡業變化身三道善業
 變化身二乘淨變化身始教劣受用身終教
 勝受用身頓教法性身圓教無障礙法界身
 如來四身

音釋

砧 音真 持石也 禪 此云靜慮定 羝 音低 羊也
 羝 音雅 豕也 獍 音竟 孟康曰 梟鳥 鵠 音商 鵠鵠
 大溜 音混 合也 吉支 此云所作 三庫 華言謚密
 靜語也 奢摩他 翻止 毘安舍那 翻觀 匍匐 音蒲 匍匐

地 貌 唵啞吽訖哩 音菴亞烘隔里前三即加
 三佛後二即加 悶 音促 梵語 阿爐 音津 餘 魔
 心成觀音菩薩 悶 音促 梵語 阿爐 音津 餘 魔
 羅 此云殺也 狡猾 奸詐也 狎 音洽 狎 瘠 音脊 瘠 瘡
 音昔小 四 音戲 搔 搔 音騷 搔 列 音列 氣 瘡

結八

十八

賢首五教儀卷第六之一

殆九

清浙水慈雲沙門灌頂續法集錄

○七體用

七體用者體則三途招上中下惡業苦報之身三道招下中上善業樂報之身二乘五分

殆九

法身始教有爲無漏變易五蘊之身終教無爲無漏變易五蘊之身頓教無生法性身圓教圓融無盡身如來三四十身用則地獄登刀上劍餓鬼吞銅噉鐵畜生魚鱗相咀強者伏弱負重牽車構造諸惡修羅我慢顛倒與

天爭權人持五戒天修八定二乘勤策斷煩惱障證小涅槃三明六通應真無礙始教發四弘誓修六度行乃至現起三十二相八十種好終教稱性建修六度廣興萬行爲化群生運大慈悲乃至現起八萬四千諸妙相好

頓教離相修一切行無作妙力起諸變化力通自在猶如虛空無有分齊圓教一斷一切斷一行一切行乃至現十蓮華藏世界海微塵數相彼一一相皆遍法界業用亦爾如來三輪不思議化○八人法

八人法者人則火途血途刀途修羅人道天道聲聞辟支定不定性始終頓圓初心後心諸位菩薩如來法則三途上中下十惡三途下中上十善小教四諦十二因緣始教相宗五位百法空宗八十一法終教一心二門頓教一真如性圓教十不可說無盡法門如來十力四無所畏十八不共法等○九逆

九逆順者逆則地獄跋陀增慢婆藪罪者畜生無慈鹿王餓鬼半偈夜叉修羅婆稚騫馱質多羅睺人有六師十仙央崛屠兒等天有

自在無想摩醯首羅二乘六群比丘始終頓

圓梵志尼健盧迦登伽婆須無厭勝熱婆羅

門等佛如提婆達多順則地獄蒙光天子挽

火車者畜生菩薩鹿王金獅龍女餓鬼說咒

羅刹啓教面然修羅幻術大力出現好聲人

有四衆法眷天有護世釋梵二乘五百羅漢

始終頓圓維摩大慧地藏彌勒文殊普賢勢

至觀世音等佛如藥師彌陀

○十威應

十感應者感則六道同分類生二乘同分初

心有學及異分六道凡夫始終頓圓自類根

熟初心有學及他類二乘六道如來九界衆

生應則六道同事之者及四聖身二乘四果

四向菩薩如來始終頓圓三賢十聖五智如

來佛有五眼十身

○三結

此十對中初一爲總後後漸略初謂如來說

拾九

二

能詮之敘詮所詮之理則無法不盡法有教

理行果行果並在所詮義理中故二就所詮

中雖復衆多不出事之與理即性及相無法

不攝三理該下八且置勿論就其事中不出

境智四智觀於境便有造修之行所成之位

五歷位未極總屬四收極則爲果六果中多

法不出依正七正中所有不出體用體者法

報用者應化八用中自有人法不同以法成

人以人知法九就於法中逆化順化十就順

化中自有感應矣若依後後開一成二則法

拾九

三

彌多謂如果分依正爲二因亦如之則有四

矣隨依正中皆有體用正中體者法報等身

用者應化隨宜依中體者法性等剎用者應

物隨現果門既爾因門例然則成八矣正體

用中自有人法不同依亦如之即成十六矣

又於人中逆化順化法亦如之便爲三十二
矣人之逆順必有感應宜逆化之感則婆須
等應之宜順化之感則文殊等應之人感應
爾法感應然積爲六十四矣如是相望展轉
成多然猶約次第辯若依圓融論開合者即
成無盡又此十對不唯十界於一界中隨一
法上即有此十如一蓮葉或一微塵皆具教
等十對相也○二結融無盡

又將此能含十對法中取一教義對具餘九
對餘理事等九對亦具餘教義等九對則爲
百門一一門中各有所含十法界則爲千門
千門中隨取其一亦具一千則有百萬如一
千錢共爲緣起一錢爲首則具一千餘亦如
是即成千千若以所具十對例能具十界則
十法界亦成百萬法界華嚴云一念瞋心起

百萬障門開一念非瞋心百萬法門就又此
百萬門中一一皆有六相圓融如理事對一
即具多名理總多即非一名理別互不相違
名理同彼此不濫名理異共相成就名理成
各住本性名理壞共爲一法名事總諸法宛
然名事別多種不異名事同各不相同名事
異諸緣辦就名事成不離自位名事壞餘教
義等九對及十法界具百具千乃至百萬六
相例知如此無盡圓融法相皆爲三觀所依
事體經云若人欲了知三世一切佛應觀法

界性一切唯心造○

次能依觀門二初總標

次明能依觀法門有三重○

二別釋三一真空二先正釋觀

法三初標

第一真空絕相觀者於中略開四句十門○

二釋四一初句四門二先列

第一句會色歸空觀復開四門○次釋四一幻色非斷空

一色非斷空門色不即是斷空以色舉體即

是真空故○二實色非真空

二色非真空門青等非是真空之理以青黃

無體莫不皆空故○三實色斷空非幻色真空二初當門

三色空非空門會色歸空空必無色故○

二總結

上三門以法揀情訖○四實色斷空即幻色真空二先正顯

四色即是空門凡是色法必不異於真空以

無性故○次結例

如色空既爾一切法亦然○次二句四二先列

第二句明空即色觀亦有四門○次釋四一斷空非幻色

一空非幻色門斷空不即是色以真空必不

結九

五

異色故○二真空非實色

二空非實色門真空理非青黃以空必不異

青黃故○三真空幻色非斷空實色二初當門

三空非空門空是所依非能依必與能依

作所依故○二總結

上三門亦以法揀情訖○四真空幻色即斷空實色二先正顯

四空即是色門凡是真空必不異色以是法

無我理非斷滅故○次結例

如空色既爾一切法亦然○三二句一門

第三句空色無礙觀謂色法舉體全是真空

色即空而色不盡真空舉體不異色法空即

色而空不隱無障無礙為一味法○四四句一門

第四句泯絕無寄觀謂此所觀真空不可言

即色不即色即空不即空一切法皆不可此

不可語亦不容受迥絕無寄言解不及以生

心動念乖法體故○三

結

前四句中初二句八門皆揀情顯解第三句一門解終趣行第四句一門正成行體由解成行行起解絕○

後結融無盡

將前所依十對中取一理事對具此能依觀中十門而彼理事對中又具餘教義等九對各有此十觀門則爲百門理事既爾餘教義等九對具百亦然則爲千門千門之中隨取其一亦具一千餘亦如是則有百萬一即具多名總相多即非一名別相彼此不違名同相互不相濫名異相共相成辦名成相各居自位名壞相此等六相百萬法門皆爲真空絕相觀相經云法性本空寂無取亦無見性空即是佛不可得思量○

二無礙二先正釋觀法三初標

第二理事無礙觀者但理事銘融存亡逆順

通有十門○二釋十初

理遍事

一理遍於事門謂無分限之理全遍有分事中以彼真理不可分故故一一纖塵理皆圓足如一大海全在一小波時而海非小又不妨舉體全遍諸波而海非異故出現云譬如法界遍一切不可見取爲一切此明一性全在五性中也又云如來智慧無處不至此明一乘遍於三乘中也又云如來成正覺時於其身中普見一切衆生成正覺乃至普見一切衆生入涅槃皆同一性所謂無性此明理遍同於事故一成一切成也○

二事遍理

二事遍於理門謂有分限之事全同無分之理以事無體還如理故故一一纖塵皆遍法界如一小波全市於大海時而波非大諸波亦各俱時全市而波非一故出現云聲聞與

獨覺及諸佛解脫皆依於法界法界無增減
此明五性全在一性中也又云無一衆生不
具如來智慧此明五乘遍於一乘中也又云
譬如虛空無成無壞菩提亦爾無相非相無
一非一此明事遍同於理故說都無所成也

○三理
或事

第七

三依理成事門謂事無別體要因理成以諸
緣起皆無自性由無性理事方成故如攪水
體成立波相覺林菩薩偈云心如工畫師能
畫諸世間五陰悉從生無法而不造覺首菩

薩偈云法性本無生示現而有生○四事
顯理

四事能顯理門謂由事攪理成故事虛而理
實以事虛故能顯實理如波相虛令水體現
夜摩偈云分別此諸蘊其性本空寂空故不
可滅此是無生義衆生既如是諸佛亦復然

佛及諸佛法自性無所有須彌頂偈云了知
一切法自性無所有如是解法性即見盧舍

那○五理
奪事

五以理奪事門謂事法既全攪理成則理性
現而事相皆盡以離真理外無片事可得故
如水奪波波相全盡出現品云設一切衆生
於一念中悉成正覺與不成正覺等無有異
何以故菩提無相故若無有相則無增減不
增不減經云一切愚癡不如實知一法界故
起邪見心謂衆生界增衆生界減皆顯平等

理性無有高下法也○六事
隱理

六事能隱理門謂真理隨緣而成事法遂令
事顯理不顯也以諸事法違於理故如水成
波動顯靜隱財首偈云世間所言論一切是
分別未曾有一法得入於法性法身經云法

身流轉五道名曰衆生○七理即事

七真理即事門謂凡是真理必非事外以是

法無我理不異色故如水即波舉體皆動須

彌偈云觀察於諸法自性無所有如其生滅

相但是假名說回向品云法性不違法相又

云無有智外如爲智所入皆顯理即事故雖

空不斷也○八事即理

八事法即理門謂緣起事法必無自性無自

性故舉體即真如波即水無動而非濕也須

彌偈云一切凡夫行莫不速歸盡其性如虛

空故說無有盡回向品云法相不違法性又

云無有如外智能證於如皆顯事即理故雖

有不常也○九理非事

九真理非事門謂即事之理而非是事以真

異於妄故所依非能依故實非虛故如濕非

結九

八

動真實慧偈云於實見真實非實見不實如

是究竟解是故名爲佛第四回向云於無爲

界示有爲法而不滅壞無爲之性○十事非理

十事法非理門謂全理之事而恒非理以相

異於性故能依非所依故虛非實故如動非

濕慚愧林偈云如色與非色此二不爲一如

相與無相生死及涅槃分別各不同回向品

云於有爲界示無爲法而不滅壞有爲之相

○三結

上之十義同一緣起約理望事有成壞即離

約事望理有隱顯一異逆順同時無礙自在

一具十爲總十非一爲別互不違爲同各無

濫爲異衆成就爲成住本位爲壞然上十對

皆悉無礙今且約理事以爲之顯耳○後結融無

盡

又此能依觀中十門取一理遍事門具前所依體中十對而此理遍事中又具餘之事遍理等九門各有前十對法則爲百門理遍於事既爾餘之事遍理等九門具百亦然即爲千門千中取一亦具一千餘皆亦爾則成百

萬一合多是總相多非一是別相各無異是同相不相同是異相共成辦是成相不離位是壞相此諸圓融無盡法門皆爲理事無礙觀相經云如金與金色其性無差別法非法亦然體性無有異○三周遍二先正釋觀法二先十觀三初標

第三周遍含容觀者事如理融遍攝無礙交參自在畧開十門○次釋十一如事

一理如事法門謂事法既虛相無不盡理性真實體無不現此則事無別事即全理爲事是故無盡事相即是無盡法界理也遂令法

界全體在於一切塵中同時顯現周遍無礙

○二如理

二事如真理門謂諸事法與理非異故事隨理而圓遍遂令一塵普遍法界如一微塵既爾一切事法亦然○三事合

三事合理事門謂諸事法與理非一故存本一事而能廣容如一微塵其相不大而能容攝無邊法界刹等諸法如一塵爾諸法亦然

○四通局

四通局無礙門重開第二謂事與理非一非異令

此事法不離一處而全遍十方一切刹塵之內全遍十方一切刹塵之內而不動本位即遠即近即遍即住無障無礙○五廣狹

五廣狹無礙門重開第二謂事與理非異非一令

此一塵之事不壞一塵而能廣容十方刹海

廣容十方法界而微塵不大即廣即狹即大

即小無障無礙○六遍容

六遍容無礙門合前二三四五謂此一塵望彼一切

由普遍即是廣容故此一塵遍彼一切法時

還復攝彼一切諸法在一塵內又由廣容即

是普遍故此一塵攝彼一切法時還即遍在

自一塵內一切法中同時無礙○七攝入

七攝入無礙門翻第六門謂此一切望彼一法由

入他即是攝他故此一切全入一法中時還

攝一法在一切內由攝他即是入他故彼一

法攝在一切中時還令一切恒入彼一法內

同時無礙○八交涉

八交涉無礙門兼前六七謂一法望一切有入有

攝通有四句第一一攝一切一入一切第二

一切攝一一入一第三一攝一一入一第

殊

士

四一切攝一切一切入一切謂此一法正攝

彼一切令彼一切入一中時還即令彼一切

攝此一法能令自一入一切中又彼一切正

攝此二令此一法入彼一切中時還即令此

一法攝彼一切能令彼一切法入此一中初

二句攝入隱顯既爾餘後二句攝入亦然能

所交涉同時無礙○九相在

九相在無礙門翻第八門謂一切望一法亦有攝

有入亦有四句第一攝一入一第二攝一切

入一第三攝一入一切第四攝一切入一切

謂此一切法正攝餘一法時還令攝餘一之

一切入彼一中又彼一法正攝餘一切時還

令攝餘一切之入此一切法中攝一入一

攝一切入一切二句既爾餘二句亦然攝入

相在同時無礙○十普融

十普融無礙門近收八九二門謂一切及一

普皆同時更互相望一一具前兩重四句第

一一攝一切一入一切攝一切入一切第二

一切攝一一入一攝一入一第三一攝一

一入一攝一切入一第四一切攝一切一切

入一切攝一入一切謂此一法正攝餘一切

餘一切入此一將入彼一切時還即令彼一

切攝餘一餘一入彼一切將入此一法中又

此一切法正攝餘一餘一入此一切將入彼

一中時還即令彼一法攝餘一切餘一切入

彼一將入此一切中初二句既爾後二句亦

然同時相應普融無盡○後結

然上十義展轉相生而成十門理爲事本理

如事現故有初門事依理起事如理遍故有

次門不唯理事相如亦且理含事理事合理

事故有三門二中唯遍故有第四不動而遍

三中唯包故有第五不大而包二四唯遍三

五唯容故有第六亦遍亦容六但以一望多

故有第七以多望一六則一能入攝七則多

能攝入故有第八一多俱爲能入能攝八則

俱能故有第九多一俱爲所攝所入六七一

多互無八九能所各關故有第十一多相即

能所雙融初二門即爲總意能成後之八門

猶兼理事無礙有此二故得有事事無礙之

義屬事事攝○後十立
三初標

古德準此十義重開爲十立門一同時具足

相應門二廣狹自在無礙門三一年多相容不

同門四諸法相即自在門五祕密隱顯俱成

門六微細相容安立門七因陀羅網境界門

八託事顯法生解門九十世隔法異成門十

主伴圓明具德門

○次釋四初釋相十一同時

第一同時具足相應門者教等十義同時相應成一緣起無有前後始終等別具足自在參而不雜故妙嚴品頌云一切法門無盡海同會一法道場中○二廣

狹

三

第二廣狹自在無礙門者十對事體或廣或狹於一句中演無邊教至大身刹涉入無內極小塵毛包納無外如是遍容無礙自在七十六摩耶夫人云我身形量雖不逾本然其實已超諸世間量同虛空悉能容受七十七善財歎樓閣云不動本處而能普詣一切佛刹十住品云金剛圍山數無量悉能安置一毛端又云佛於一一句法中經無量劫說不盡等○三

容

第三一多相容不同門者此上諸義隨一門

中即具攝前因果理事一切法門然此一中雖具有多仍一非即是其多耳多中一等準上思之由一與多互爲緣起力用交徹遞相涉入故曰相容不壞其相故曰不同餘一一門中皆悉如是故經頌云以一佛土滿十方十方入一亦無餘世界本相亦不壞無比功德故能爾普賢行品云一切世界入一毛道一毛道入一切世界十行品云能於一一三昧中普入無數諸三昧無量無邊諸國土悉令共入一塵中○四

即相

第四諸法相即自在門者上十對事一即一切一切即一圓融自在故得十身歷然而相作六位不亂而更收經云初發心菩薩一念之功德深廣無邊際如來分別說窮劫不能盡何況於無邊無量無數劫具足修諸度諸

地功德行又云以衆生身作刹身而亦不壞
衆生身以刹身作衆生身而亦不壞於刹身
不思議法品云諸佛知一切佛語即一佛語
十住偈云一即是多多即一文隨於義義隨
文如是一切展轉成此不退人應爲說○五

顯

第五祕密隱顯俱成門者即上十義此全攝
彼此顯彼隱彼全攝此彼顯此隱以一攝多
一顯多隱以多攝一多顯一隱如是彼此一
多攝入隱覆顯了俱時成就不相妨礙祕密
自在雖各不同亦不雜亂故云隱顯俱時而
成體無前後故云俱成各得其所自在無礙
故云祕密經云此方入正受他方三昧起眼
根入正受色塵三昧起男子身中入正受女
子身中三昧起於一微塵入正受一毛端頭

結九

十四

三昧起又云十方世界有緣故往返出入度
衆生或見菩薩入正受或見菩薩從定起又
云於彼十方世界中念念世現成正覺轉正
法輪入涅槃現分舍利度衆生夜摩偈云十
方一切處皆謂佛在此或見在人間或見在
天宮十定品云或見佛身其量七肘或見佛
身其量八肘或見佛身其量九肘乃至或見
佛身不可說不可說大千世界量○六微細
第六微細相容安立門者如前十事於一念
中具足始終同時別時前後逆順等一切法
法九
門於一念中炳然同時齊頭顯現無不明了
猶如束箭齊頭顯現耳一能含多法法皆爾
故曰相容一多法相不壞不雜故云安立經
云菩薩於一念中從兜率天降神母胎乃至
流通舍利法住久遠及所被益諸衆生等皆

悉顯現又云一毛孔中無量佛刹曠然安住
又云於一塵內微細國土悉於中住○七釋

第七因陀羅網境界門者上諸義中體相自在隱顯互現重重無盡如天帝殿珠網覆上一明珠內萬像俱現珠珠皆爾互相現影影復現影而無窮盡十中唯此從喻受名若就法立應名重重映現無盡門經云一切世界廣大無量麤細亂住倒住正住若入若行若去如帝網差別十方無量種種不同現前知見智皆明了第十云諸佛知一切法界中如因陀羅網諸差別事盡無有餘阿僧祇品云於一微細毛端處有不可說諸普賢一切毛端悉亦爾如是乃至遍法界一毛端處所有刹其數無量不可說盡虛空量諸毛端一一處刹悉如是又云一塵中刹不可說如一一

切皆如是此不可說諸佛刹一念碎塵不可說念念所碎悉亦然此塵有刹不可說普賢三昧品云佛身所現一切國土及此國土所有微塵一一塵中有世界海微塵數佛刹一一刹中有世界海微塵數諸佛一一佛前有世界海微塵數普賢菩薩等○八託事
第八託事顯法生解門者前來諸事隨託一種便顯多法即依即正即法即人即理事等一切法門以隨一事即是見於無盡法界法界無盡法亦無盡故隨一事名多法門非是託此別有所表經云從超過三界法甚深方便法無作法門出過諸天供具供佛無着無生善根所生一切寶蓮華雲一切堅固香雲一切清淨莊嚴具雲皆遍法界供養於佛又云彌勒菩薩前詣樓閣彈指出聲其門即開

命善財入善財入已見其樓閣廣博無量同
於虛空又見其中有無量百千諸妙樓閣一
一嚴飾皆同虛空不相障礙亦無雜亂善財
童子於一處中見一切處一切諸處悉如是
見等○九十

世

始九

十六

第九十世隔法異成門者此諸雜義徧十世
中同時顯現具足別異以法與時不相離故
言十世者三世各有過現未來名爲九世然
此九世迭相即入攝爲一念前九爲別一念
爲總總別合論故云十世十世區分名爲隔
法而互相在即是異成故晉經云過去無量
劫安置未來今未來無量劫迴置過去世普
賢行云過去中未來未來中現在三世互相
見一一皆明了又云無量無數劫解之即一
念發心功德品云無量劫即一念一念即無

始九

七

量劫十地品云一劫入多劫多劫入一劫長
劫入短劫短劫入長劫等○十主

伴

第十主伴圓明具德門者前之事體隨舉其
一即便爲主而居其中餘者爲伴周而圍繞
由其爲唱爲隨無雜無礙故云主伴彼此隱
顯主伴交輝故云圓明一多攝入連帶緣起
故云具德如經中一方爲主十方爲伴餘方
亦爾又現相品佛眉間出勝音菩薩與無量
諸眷屬俱出即人眷屬遮那品明法界修多
羅以佛刹微塵數修多羅而爲眷屬即法眷
屬出現品中佛放眉間光明無量百千億光
明以爲眷屬即光明眷屬故隨一一法中皆
有其眷屬也

賢首五教儀卷第六之一

音釋

咀

音睢 嚼也 含味也

跋陀

具云跋陀 羅華言寶護

婆藪

此云 天慧

亦

云廣通 高妙

婆稚

此云 團圓

騫馱

具云 羅

斷

智剛柔 慈悲

質多

具云 毘摩質多 羅

羅

此云 羅

陰

亦云 障持

尼捷

此翻 離繫出

盧迦

此云 世論

朕

亦云 覆礙

尼捷

此翻 離繫出

盧迦

此云 世論

登伽

此云 本性

婆須蜜

此翻 婆須蜜

提婆達多

此云 天

天

摩耶 或云 大幻

舍利

此云 身骨堅固

肘

此云 肘

音

扭臂 節也 一肘 一尺 五

迭

音 迭 迭 迭

迭

代 互 更

賢首五教儀卷第六之二

殆十

清浙水慈雲沙門灌頂續法集錄

○二事明
三初標

今又於前十中取一事法明具十門○
次釋十一

時同

第十

一同時門者如華嚴中一蓮華葉或一微塵
即具教等十對同時相應具足圓滿亦具後
之九門及彼門中所具教等以是總故華藏
頌云華藏世界所有塵一一塵中見法界一
塵尚具况一葉耶○
二廣狹

二廣狹門者即彼花葉普周法界而不壞本
位以分即無分無分即分廣狹自在無障無
礙十定品云有一蓮華盡十方際而又不妨
外有可見是故或唯廣無際或分限歷然或
即廣即狹或廣狹俱泯或具前四以是解境

故或絕前五以是行境故下皆準此然此廣
狹亦名純雜義普周法界故純一無二不壞
本位則不妨於雜萬行例然○
三三相
三相容門者即此華葉舒已遍入一切法中
即攝一切令入已內舒攝同時既無障礙是
故鎔融或有四句六句思之十定品云微塵
數三千大千世界悉入是菩薩身是菩薩身
亦入是諸世界離世間品云以一切衆生身
入已身無礙用以已身入一切衆生身無礙
用等若一與一切對辨則攝入各具四句謂
一入一切一入一一一切入一一一切入一切互
攝亦然○
四相即
四相即門者此一花葉廢已同他舉體全是
彼一切法而恒攝他同已令彼一切即是已
體一多相即混無障礙解行境別六句同前

○五隱顯

五隱顯門者花能攝彼則一顯多隱一切攝花則一隱多顯顯不俱隱隱不並顯顯顯隱同時無礙全攝俱泯存忘俱成句數同前

○六微細

六微細門者此花葉中微細剎等一切諸法

炳然齊現○

七羅網

七羅網門者謂此花葉與一一微塵中各現無邊剎海剎海之中復有微塵彼諸塵內復有利海如是重重不可窮盡非是心識思量

境界○

八託事

八託事門者見此華葉即是見於無盡法界經云此花蓋等從無生法忍之所起等○十九世

九異成門者即此一花既具遍一切處亦復

殆十

二

該一切時謂三世各三攝爲一念故爲十世以時無別體依花以立花既無礙時亦如是

○十主伴

十主伴門者謂此華葉理無孤起必攝無量眷屬圍繞經云此花有十世界微塵數花以

爲眷屬○

後例

舉花既爾一塵等事亦然事法既爾餘教義

等亦然○

三喻顯

斯則十門義極深遠若非譬喻奚能了徹炳然齊現猶彼芥餅具足同時方之海滴一多

三

相入等虛室之千光隱顯俱成似秋空之片

月重重交映若帝網之垂珠念念圓融類夕

夢之經世法門層疊如雲起於長空主伴遍

周例星圍於北極彼此相即像百般之具體

依一金廣狹融通比徑尺之鏡影現千里○

四辨
次

所以次第者一同時門以是總故冠於九門之初二別中先辨廣狹門者此是別門之由由前初二門事理相遍故生餘八門且約事如理遍故廣不壞事相故狹故爲事事無礙之始三由廣狹無礙所遍有多以已一望彼多故有一多相容相容則二體俱存但力用交徹耳四由此容彼彼便即此由此遍彼此便即彼等故有相即門五由互相攝則互有隱顯謂攝他他可見故有相入門攝他他無體故有相即門攝他他雖存而不可見故有隱顯門此三皆由相攝而有爲門別故相入則如二鏡互照相即則如波水相收隱顯則如片月相映六由此攝他一切齊攝彼攝亦然故有微細相容七由互攝重重故有帝網

無盡八由既如帝網已隨一即是一切無盡故有託事顯法九由上八門皆是所依所依之法既融次辨能依能依之時亦爾故有十世異成十由法法皆然故隨舉其一即便爲主運帶緣起則有伴生故有主伴○後結二先結顯此十立門同一緣起無礙圓融隨其一門即具一切○次開立△又此十立準前開立亦有三義一準前一門圓開爲十且約事如理門事如於理同時具足多種義門故開同時如理遍應故廣住一故狹開廣狹門一事普容一切有相容門如理廢已同他有相即門事如於理能所隨緣故開隱顯事如於理一切齊攝故開微細事亦攝入重重即帝網門事亦具足無盡即託事門如理該徹十世具十世門如理帶眷屬生具主伴門事如於理一

門既爾餘之九門開立亦然此約十門中義各全具故圓開爲十立也二於前十門或開或合分立爲十謂由前三總成諸門事理相如故有廣狹門事如理遍故廣理如事小故狹事合理事故有微細門第四不離一處即

爲十

遍有相即門五即廣狹門六具相即廣狹二門七開相即相入二門第八交涉互爲能所有隱顯門九即因陀羅網門十即同時具足門隨爲十首有主伴門顯於時中有十世門諸法皆爾故有託事門此約十門中義有兼具故分立爲十立也三於前十中各開爲十初則託事二乃相即三立微細四分十世五還廣狹六爲相入七成隱顯八開主伴九屬帝網十是同時此約十門中義自別具故各開爲一立也○

後結融無盡三
初顯無盡相

略十

五

將前能起十觀門中取一理如事門具後所起十重立門而此理如事中又具餘之事如理等九種觀門每門各有十重立門則爲百門理如事門既爾餘之事如理等九門具百亦然即爲千門千門之中隨取其一亦具一千餘皆例爾即爲百萬若以能顯十重立門例前所顯十種觀門亦成百萬又以能依十立門中取一同時門具餘九門餘廣狹等九門亦具餘同時等九門則爲百門一一門中各有所依教義等十對法則爲千法門千中取一亦具一千餘皆亦爾則爲百萬若以能依門例所依法亦成百萬又以十觀門與十對法互成百萬義例可知一總該一切是總相各別從其類是別相據理皆同成是同相隨緣各異體是異相衆緣和合成是成相壞

各歸自位是壞相是故於此圓明顯了則常

入法界重重之境○

二明其所以
四初總標

問有何因緣令此諸法得有如是混融無礙
答因廣難陳略提十類一唯心所現故二法
無定性故三緣起相由故四法性融通故五
如幻夢事故六如影像現故七因無限量故
八佛果證窮故九深定大用故十神通解脫
故○二別釋十
一唯心現

初唯心所現者一切諸法真心所現如大海
水舉體成波以一切法無非一心故大小等

相隨心迴轉即入無礙○二無定性
二初大小

二法無定性者既唯心現從緣而生無有定
性性相俱離小非定小故能容太虛而有餘
以同大之無外故大非定大故能入小塵而
無間以同小之無內故是則等太虛之微塵

含如塵之廣刹有何難哉十住品云金剛圍

山數無量悉能安置一毛端欲知至大有小

相菩薩以是初發心○二例
餘△一非定一故

能是一切多非定多故能是一邊非定邊故

能即中中非定中故能即邊延促靜亂等一

一皆然○三緣起由
四初標門

三緣起相由者謂大法界中緣起法海義門

無量就約圓宗略舉十門以釋前義○二釋
相十

一諸緣
各異

一諸緣各異義謂大緣起中諸緣相望要須

體用各別不相雜亂方成緣起若雜亂者失

本緣起緣起不成此則諸緣各各守自一位

經云多中無一性一亦無有多○二互遍
相資

二互遍相資義謂此諸緣要互相遍應方成

緣起如一緣遍應多緣各與彼多全爲一故

此一即具多箇一也若此一緣不具多一即資應不過不成緣起此則一一各具一切經云知以一故衆知以衆故一○三俱存無礙二先本門三俱存無礙義謂凡是一緣要具前二方成緣起以要住自一方能適應適應多緣方是

七

一故是故唯一多一自在無礙銘融有其六句一或舉體全住是唯一也二或舉體遍應是多一也三或俱存四或雙泯五或總合六或全離皆思之可見經云諸法無所依但從和合起○次總△此上三門總明緣起本法

竟○四異體相入四一總釋

四異體相入義謂諸門力用遞相依持互形奪故各有全有力全無力義緣起方成如地論云因不生從緣生故緣不生自因生故○二反△若各唯有力無無力則有多果過一

一各生故若各唯無力無有力即有無果過以同非緣俱不生故○三正△是故緣起要互相依具力無力如闕一緣一切不成餘亦如是○四示相三初明一△是故一能持多一是有力能持於多多依於一多是無力潛

入一內由一有力必不與多有力俱是故無

有一而不攝多也由多無力必不與一無力

俱是故無有多而不入一也○次例△如一

持多依既爾多持一依亦然反上思之○二例

多望△如一望多有依有持全力無力常合

多在已中潛入已在多內同時無礙多望於

一當知亦爾○三結成△俱存雙泯二句無

礙思之○五異體相即四一略明

五異體相即義謂諸緣相望全體形奪有有

體無體義緣起方成○二反△若闕一緣餘

不成起故緣義則壞○三五△得此一緣令

一切成起所起成故緣義方立○四示相三

多二先△是故一緣是能起能成故有體多

緣是所起所成故無體由一有體不得與多

有體俱多無體必不與一無體俱是故無有

不多之一無有不一之多○次例△一多既

爾多一亦然反上思之○二例多△如一望

多有有體無體故能攝他同已廢已同他同

時無礙多望於一當知亦爾準前思之○三

成句△俱存雙泯二句無礙亦思之可見○

六體用雙融

二先本門六體用雙融義謂諸緣法要力用交涉全體

融合方成緣起是故圓通亦有六句一以體

無不用故舉體全用則唯有相入無相即義

二以用無不體故舉用全體則唯有相即無

相入義三歸體之用不礙用全用之體不失

體是則無礙雙存亦入亦即自在俱現四全

用之體體泯全體之用用亡非即非入圓融

一味五合前四句同一緣起無礙俱存六泯

前五句絕待離言冥同性海○次通△此上

三門於初異體門中顯義理竟○七同體相

義體

七同體相入義謂前一緣所有多一與彼一

緣體無別故名爲同體○次釋△又由此一

緣應多緣故有此多一所應多緣既相即入

令此多一亦有即入也○三明相入二初明

一有△今且先明相入謂一緣有力能持多

一多一無力依彼一緣是故一能攝多多便

入一○次例多△一入多攝反上應知○二

多望△餘義餘句準前思之○八同體相即

多二初明
本一有體

八同體相即義謂前一緣所具多一亦有有
體無體之義故亦相即以多一無體由本一
成多即一也由本一有體能作多一令一攝
多○二例多△如有一有多空既爾多有一空

亦然○後制多望一△餘義餘句並準前思之○

九俱融無礙
二先本門

九俱融無礙義謂亦同前體用雙融即入自
在亦有六句準前應知○次總結△此上三門
於前第二同體門中辨義理竟○十同異圓滿二先本門

十同異圓滿義謂以前九門總合為一大緣
起今多義門同時具足故有同時門由住一
遍應故有廣狹自在門由就體就用故有相
即相入門由異體相容具微細門異體相即

具隱顯門又就用相入為顯令就體相即為
隱即顯入隱亦然又由異門即入為顯令同
體即入為隱同顯異隱亦然又由異體相入
帶同體相入具帝網門由此大緣起即無礙
法界故有託事顯法門顯於時中故有十世
門相關互攝故有主伴門○後結屬△此第十
圓滿一門就前第三門中以辨義理○三結顯
△故知緣起法要具此十義緣方起故關則
不成○四引證△經云菩薩善觀緣起法於一
法中解眾多眾多法中解了一等皆其義也
○四法性融二先總明
四法性融通者謂若唯約事則互相礙不可
即入若唯約理則唯一味無可即入今則理
事融通具斯無礙謂不異理之一事具攝理
性時令彼不異理之多事隨所依理皆於一

中現若一中攝理不盡則真理有分限失若

一中攝理盡多事不隨理現則事在理外失

今既一事之中全攝理盡多事豈不一中現

也華藏品云華藏世界所有塵一一塵中見

法界法界即事法界矣○

後別釋三初
結前生後

斯即總意別亦具十玄門○

次正顯別相
十一同時

一既真理與一切法而共相應攝理無遺即

是諸門諸法同時具足○

二廣
狹

二事既如理能包亦如理廣遍而不壞狹相

故有廣狹純雜無礙門又性常平等故純普

攝諸法故雜○

三相
入

三理既遍在一切多事故令一事隨理遍一

切中遍理全在一事則一切隨理在一事中

故有一多相容門○

四相
即

四真理既不離諸法則一事即是真理真理

一
萃

十一

即是一切事故是故此一即彼一切事一切

即一反上可知故有相即自在門○

五隱
顯

五由真理在事各全非分故正在此時彼說

為隱正在彼時此即為隱故有隱顯門○

六
微

細

六真理既普攝諸法帶彼能依之事頓在一

中故有微細門○

七帝
綱

七此全攝理故能現一切彼全攝理同此頓

現此現彼時彼能現所現俱現此中彼現此

時此能現所現亦現彼中如是重重無盡故

有帝綱門以真如畢竟無盡故○

八言
事

八即事即理故隨舉一事即真法門故有託

事門○

九十
世

九以真如遍在晝夜日月年劫皆全在故在

日之時不異在劫故有十世異成門况時因

法豈有法融時不融耶○十主件

十此事即理時不礙與餘一切恒共相應故

有主件門○後總以結成

故一理融通十門具矣○五如幻夢二先幻

五如幻夢事者適如幻師能幻一物以爲種

種幻種種物以爲一物等經云或現須臾作

百年等一切諸法業幻所作故一異無礙○

父△言如夢者如夢中所見廣大未移枕上

歷時久遠未經斯須故攝論云處夢謂經年

覺乃須臾頃故時雖無量攝在一刹那故知

時處等皆如夢自在○六如影像

六如影像現者一切萬法略有二義一皆如

明鏡含明了性一心所成故二分別所現如

影像故由初義故爲能現由後義故爲所現

故一切法互爲鏡像如鏡互照而不壞本相

經云遠物近物雖皆影現影不隨物而有遠

近等○七因無限

七因無限量者謂諸佛菩薩昔在因中常修

緣起無性等觀大願迴向等稱法界修及餘

無量殊勝因故今如所起果具斯無礙○八佛

果

八佛果證窮者由冥真性得如性用是故一

即一切無所障礙經云以一佛土滿十方十

方八一亦無餘世界本相亦不壞無比功德

故能爾○九深定用

十

九深定大用者謂彼海印定等諸大三昧力

故令於小處而現大法無礙自在賢首品云

入微塵數諸三昧一一出生塵等定而彼微

塵亦不增於一普現難思刹又云衆生形相

各不同行業音聲亦無量如是一切皆能現

海印三昧威神力等○十神通力

十神通解脫者謂由十通及不思議等解脫力故小處現大皆無障礙不思議法品十種解脫中云於一塵中建立三世一切佛法等

○三會通三初總標

為十

三

故上十中隨舉一因即能令彼諸法混融無礙自在○二料揀

十

△十中前六通約法性為德

相因法爾如是後二皆是業用義通因果七約起修義通德相業用八約果德唯是德相故○三問答

三問

△問前十立門於德用中通耶局

耶開耶合耶答前之十門德相業用通而不局合而不開約佛則用亦德相德上用故約機則相亦稱用令知相故即用之相染淨雙融即相之用能染能淨故相及用不分兩別

○四結答

由上十因令前教義等十對具前同時等十

門圓融無盡○三引經結成

此等百萬六相立門皆為周遍含容觀相經

云一中解無量無量中解一了彼互生起當

成無所畏○次結顯修益三初正明觸處是觀

然此三觀觸處可修如心之生住異滅身之

行住坐卧正報生老病死依報成住壞空乃

至二時衣食六根緣境一切法中皆可成觀

以本不離此法界故○二別揀修法不同

但漸教人作行布觀頓教人作圓融觀圓教

人作無礙觀又初心者行布觀久修者圓融

觀後心者無礙觀又根鈍行布觀根利圓融

觀根熟無礙觀皆隨機異非法有別○三結示成

就利益

真空觀成斷現行障成一切智證泯相理實

體法界無礙觀成斷種子障成自然智證融
相緣起用法界周遍觀成斷習氣障成無礙
智證一真無障礙法界○後總顯教
觀依持

又依真空觀義而得成立小始二教依無礙
觀義而得成立終頓二教依周遍觀義而得
成立同別圓教又由小始二教方能詮顯真
空觀中所具義理由終頓二教方能詮顯無
礙觀中所具義理由同別圓教方能詮顯周
遍觀中所具義理是故教觀並行不悖如人
目足闕一不可未有無觀而有教者也此如

法界觀門及華玄中釋○

三結略指廣
二先結略

所以唯有此五門者三時能依時也儀觀所
說法也又十儀化儀也教宗化法也又教宗
所稟教也三觀能修觀也如是等義散在藏
文今依賢宗諸大部典略錄綱要若能知此

殆十

十四

則賢家宗旨思過半矣○後指
廣
欲廣明者當考華嚴圓覺起信立談疏鈔及
教章等餘不繁贅

賢首五教儀卷第六之二

音釋

舒音書伸
也放也悖音倍違
背逆也贅音醉附贅
疣瘡也

殆十

十五

集刻五教儀緣起

五教儀者諸佛說法之規矩歷祖判釋之權衡也教理智斷皆出乎此行位因果亦不離此一乘由之而成三覺大乘依之而階三道二乘隨之而超三界人天仗之而越三途是知捨此無以瑩煜乎自體去此無以化導乎衆生外此無以弘揚乎佛法絕此無以傳持乎祖印遠此無以津梁乎末世背此無以救療乎饑時故此一書誠法門中之要典也噫諸祖教部卷多義廣末學驚心罔知所適予初叅即以爲慮自庚子夏蒙先師授清涼玄談遂錄出賢首教義誦之辛丑春偶於坊間得賢首五教儀檢之乃西蜀道閑潛法師本也亦全依華玄中教儀宗趣義理三門疏鈔錄成八卷持呈於先師師曰此乃清涼教儀

非賢首教儀也現具華玄何勞多此乃復授以賢首教章予即錄出分教開宗所詮差別二門到此始知有賢首宗清涼宗之別壬寅間閱佛祖統記謂賢家有教無觀無斷無證遂以此說請決先師師以五教解誦論賢宗未知圓義解二章開示之癸卯春復將賢首清涼二祖判釋時儀宗教及杜順法界觀合錄一帙求證先師師曰觀師集四教儀錄義也非錄文也汝今集五教儀文義雙取可謂得矣非昔人單錄華玄單錄教章之可比也汝再研之還有無盡妙意得焉乙巳年有一同學在蓮居聽唯識語余清涼十宗似爲錯謬余未之對重爲考華嚴起信般若行願諸疏及圭山圓覺廣略鈔高原真唯識量等解始知清涼立無差忒但後學膚淺讀彼不讀

此致多譏刺耳丙午夏重治教儀將三寶章之方便會入觀中取禪源詮之辨異會入宗中圓覺疏之空性五門教義章之機益會玄記之通妨並會教中會玄記之出沒三照指歸中之經時禪源詮之說意並會時中就正

殆十

十六

於先師師首肯曰賢家要旨今方備矣較前覺得教觀斗星時宗眉目斷證位次猶如鏡像性相空義似爲掌果丁未痛師逝閉戶數載再四研磨逐一對會弗令要義有所遺漏缺者增之溢者潤之倒者次之訛者正之復刪出五教儀開蒙一卷日爲常課庚戌春排五教斷證圖一紙使人觀覽壬子冬天溪景淳和尚至亦以五教儀并開蒙斷證圖請正和尚合十稱曰賢首家之得人也毘盧佛之遣使也癸丑春至甲寅冬楞伽圓談十卷稿

殆十

十七

成乙卯秋脫五教儀六卷稿兼講一遍乙卯冬至戊午夏出五教儀科註四十八卷書成矣未梓迨己未秋欲論教儀諸弟子苦錄不及改演楞嚴因而請先募刻予亦發心未果偶見雲棲集中有云工大施微心力多則功自不朽遂於九月望旦立千佛願單一願一錢一單十願時帖瞻戴先生并大公即仁長並加讚善願領數單繼而警中法師同門諸兄及餘知識檀護各各樂助即於庚申正刻始及門中月標指又哲賢啓南詢三人閱至八月告成是則纂集此書也十五六年募刻此書也三百餘日所冀學者從凡入聖回小向大轉權成實自因至果生生利生世世救世是所願也果能依此修持不入毘盧性海乃至讀誦一言半句不解其教不悟其理

我墮耕犁受妄語報倘有見聞生疑起謗所
招罪報緣佛法致願我代受其苦所植善種
因自發心願彼早成其果覽者鑒之將欲流
通詳記集刻之事如此時

康熙庚申年仲秋下弦日灌頂行者續法識

刻賢首五教儀跋

昔世尊正覺始成十身初滿時即嘆曰奇哉一切衆生具有如來智慧德相但以妄想執着而不證得由衆生妄想執着故如來於無言說中示其言說一以暢自本懷顯人人有此德相一以機之利鈍不同教設偏圓接引有異自大教東漸此方分宗判教者不一唯陳隋時智者大師以五時八教判釋一代聖教尚矣洎乎有唐賢首祖師起而以五教判釋之又盡善也台賢二宗並轡海內然習台宗者或以賢家有教無觀譏之習賢宗者以五教之名不濫而觀義自彰機收盡而理致圓備吾慈雲法主百亭兄喟然嘆曰台宗四教原在大部後人錄而成集曰四教儀使人易曉吾宗五教亦在諸部特未成錄耳於是

殆十

十八

味教觀之神髓脫筌蹄之陋習集爲五教儀所謂五教之斷證三時之通別六宗之揀濫三觀之圓漸化儀井井燦若日星成一家言善夫天溪老人之言曰毘盧佛之遺汝來者賢首祖之功臣也書旣成己未秋過慈雲訪百兄出此相眎一大藏教如指諸掌余因茲有感焉今海內習賢家之說少者恨無全書人難湊泊縱讀教義章華嚴大鈔轉增浩歎此後吾知崇說如雲宗嗣似兩端在是矣何慮妄想不破十身正覺之不成滿哉亟勸先以五教儀之六卷付梓其註四十八卷以俟續刻因領募願單請自隗始而爲之跋

殆十

十九

東臯月明宗弟清珠謹題